

國

朝

文

匯

國朝文匯甲集目錄

卷十三

計

東字甫草號改亭江蘇吳江人順治丁酉舉人有政亭集

籌南論四

論全是形勢

謁呂新吾先生祠堂詩序

董文友文集序

贈彭元定序

送吳生虞升歸吳門序

武氏三烈記

明兵部侍郎葉公墓誌銘

前明忠烈吳公墓誌銘

唐

甄一名大陶常以字行更字鑄萬四川雙州人順治丁酉舉人官長子縣知縣遷還疏為吳中有國亭集別署潛書仿周秦諸子與文體稍異故未錄

海氏廟記

徐華國傳

邵長衡

字子湘號青門江蘇武進人諸生有青門麗稿旅稿刺稿

褚遂良論

十四

君子醫說

十四

盤山志序

十五

魏叔子文集序

十六

陳椒峯文集序

十六

廬山遊記一青玉峽記

十七

廬山遊記二黃巖記

十七

廬山遊記三玉簾泉記

十七

廬山遊記四三疊泉記

十八

廬山遊記五小三級泉記

十八

廬山遊記六棲賢谷記

十八

夜遊孤山記

十九

菱溪草堂記

十九

明少司馬葉公家傳

二十

書金谿兩烈婦紀畧後

二十二

武進三忠合傳

二十三

房景春阮之錕合傳

二十五

賀向峻汪參傳

二十七

歐敬竹石士鳳傳

二十七

八大山人傳

二十八

闕典史傳

二十九

侯方域魏禧傳

三十一

書龔先生事

三十二

族兄靜山提學哀辭并序

三十三

國朝文匯甲集卷十三

籌南論四 論金楚形勢

長江萬里其源之發於蜀者不具論論其出蜀之後其流有三曰荊州漢水之南也曰武昌曰九江中流之重鎮也曰建康曰京口下流之重鎮也而襄陽之屏蔽荊州蕪黃之屏蔽武昌九江亦猶揚儀廬和之屏蔽建康也而上流中流之唇齒建康亦猶淮東西之唇齒建康也蓋嘗熟稽古事見西北之欲取東南者其出師之道不越淮荆二路如晉之滅吳雖六道並進隋之滅陳雖九道並進元之滅宋雖五道並進而要其大概未有踰兩淮荆襄而他向者兩淮守鎮之距金陵多不過五百里少不過三百里荆襄之距金陵一則二千一百七十餘里一則三千七百里遠近懸絕險阻亦殊故敵之自淮而來者彼則無所不攻我則無所不守尺寸寸寸為禦至難為患最迫而敵之自荆襄來者我遠則鏖絕樊夏近則立柵淝浦又近則固守梁山似為守差易而為患差緩然晉之舉吳其徑趨石頭者必王濬之順流武昌元之舉宋其先入臨安者必呂文煥之先驅入鄂而王伯之出涂中劉整之出淮南多不若是捷者僅一隋之滅陳廬州和州兩總管先入金陵而楊素之師後至亦以陳宣帝時先失淮南故使韓賀竟截江而渡無取淮之勞而楊素不能及是則師之自淮南而

來者似近而實難。師之自荆楚而下者似遠而寔易。敵之所近吾為術以遠之。其說已見於兩淮矣。敵之所易吾為術以難之。之術不出乎昔人險要必爭之地所云九江武昌江陵襄陽者。然推昔人所以重此四郡之說則非我之所以重也。故昔人以四郡為必爭。而今以為四郡之不必皆爭。而必爭亦不盡于四郡也。昔人以為豫章西江與鄱陽之浸浩瀚吞納而匯于湓口。則九江為之都會。沅湘合衆水之波而輸之江。則武昌為之都會。江水源于岷山下夔峽而抵荆楚。則江陵為之都會。岷江導漾東流為漢。漢沔之上則襄陽為之都會。此四郡之重重以都會似矣。又謂守江陵則可以開蜀道。守襄陽則可以控川陝。守武昌九江則可以蔽全吳。此四郡之重重以形勢又似矣。而今以其未解于都會要害之所以重輕。遂未明于四郡之孰為輕孰為重也。蓋天下有踞一城而可睥睨四面者。守一境而伸縮進退左顧右視皆可震動天下者。有死守之而使敵必不敢越我而過者。當天下無事則為八達之衝。有事則為兵交之衝。而我得之則可以制敵。敵得之則遂可以塞我者。夫是之謂要害。顏師古所云在我為要在敵為害也。有守一城而可連絡四面者。又為商賈之所集。財貨之所湊。舟楫之所必由。可以都天子而會萬國者。夫是之謂都會。非以諸水所合。遂曰都會也。大約都會之地以宅中國外為王。則當集重兵而高壘深池。弗

輕與敵戰。而為堅守之計。要害之地。以扼險而護內。拓外。則當選驍騎而電掣風馳。且戰且守。以固都會之外勢。兩者似所並重。然稽諸往冊。但見都會之命懸于要害。未見要害之命懸於都會也。則四郡之不盡為都會。不能皆要害可知。而全楚都會止一武昌。全楚要害首在襄鄆。次在江陵。次在蘄黃。蓋襄鄆者。全楚之首領。江陵者。全楚之腰腹。蘄黃者。全楚之肘腋。人未有無首而能生者。則襄鄆之形勢。一日不立。江陵未可一日而安。江陵未可一日而安。則全楚未可一日而為我有也。敢救舉往代之得失。一切寔言之。楚之興也。以其滅鄆子之國。而有襄陽。滅麇子之國。而有夷陵。故並秦而為二虎。及其亡也。北獻上庸于秦。使秦得開武關而南下。西失夷陵于秦。使秦得浮岷江而東下。而楚郢全震矣。劉表之初踞荊州。蒯越亦勸其北據襄陽。南據江陵。其餘荊州八郡。傳檄而定。及劉琮之舉襄陽而降操。操乘勝順流南下。大敗于江夏而歸也。宜計不返顧。乃尚命曹仁死守江陵。樂進死守襄陽。則操之于荊楚。雖當極敗而不忘後圖。所以為守者極密。後竭瑜亮之力。止得江陵夷陵。而襄陽不可復覩。故吳蜀終不能越此而侵魏。魏之所以制吳蜀之命者。襄陽也。則操之才。其于天下形勢。攬之確。握之固。後雖瑜亮羽蒙竭智力以爭之。不得也。至于晉之誤吳。則命羊祜鎮襄陽。及其滅吳。又命賈充仗節出襄陽。為諸軍節度。而東晉以

國朝文匯

卷十三

二

國學扶輪社印

荆楚為西門得以保此西門者始有桓宣守襄陽繼有桓溫鎮襄陽也而桓溫之師得東至灞上修洛陽諸陵柳元景之師得直據潼關而戰于陝下南國之立威于北者惟此二舉而非藉襄陽之形勢師可以進乎苻堅窺晉之初亦知命重兵臨襄陽執朱序矣以此浮漢入江桓冲將求死不得乃徒引軍而歸則其失策已甚固不俟泚水喪師而後知其亡也後蕭衍之南篡起兵襄陽隋之滅陳唐之滅蕭銑皆出師襄陽至于南宋初立趙鼎張浚輩所疾呼以圖固守者惟曰襄陽襟喉地也一時中興諸將稱開擴功者岳飛第一則以命飛之鎮襄陽原授以進取中原之勢四戰之地及滅金之後孟珙收復襄陽呂文煥繼之當時元之侵宋誓必破襄城而後南下至攻之五年不克而不去亦以必破此南下然後無內顧憂也而劉整策之亦曰攻宋方略直先從事襄陽既已破襄則阿里海涯以為漢水上流已為我有順流下驅宋必可滅自是果破鄂破郢無不應手掉斃雖言者紛紛曰鑠漢口岸曰城荊門州而元人破襄竟從郢鄂直下置江陵于後而不顧矣合觀乎數朝之往轍有如此而謂襄陽不扼全楚之命我不敢信也但自秦漢以來迄於明成化之十二年鄖陽之地分析沿革之故不一而或隸秦或隸蜀或隸楚或屬治于襄陽其大較也土地既分形險亦夷故昔言楚勢要者僅自推襄陽而無一語及鄖自原傑討平劉千斤後

合秦蜀梁楚四撫臣駁議割四郡交錯之地為立鄖陽郡設撫治行臺遂傑然為天下重鎮其詳見於王世貞之記者可謂措置盡善而鄖陽之治東至襄陽西至陝西南至四川北至河南可以左右前後顧而跳盪天下未有以一郡而當四省之交者有之自鄖陽始苟戰守之勢屹立而不可犯則襄陽反恃以為外蔽不僅為唇齒之勢矣漢昭烈之取漢中也始亦有上庸乃不命重臣重兵守之而屬之劉封孟達兩孺子及關羽之進攻襄陽移文命劉孟出師夾攻可謂得算而孟以宿志故阻兵不進使時有重臣提重兵出上庸而攻其右則襄陽豈能勝此兩面之敵耶及達舉上庸降魏諸葛亮百計取之而先為司馬懿所躡則自蜀入秦之路舍祁山無由而蔣琬代相出征亦欲集舟師溯漢水取魏興上庸地固亦入秦一道而無如襄陽之襲其後也是蜀之不得志于關中也由失鄖陽故也今當事者而但欲為保守荆揚之計其勢其理固不可失鄖襄而一日居若苟有北伐之志僅如晉庾亮宋張浚其人則所以為襄鄖計者尤當以全副精神策之而何其泄泄于此也總之全楚幅員之廣幾半天下為郡一十有五六在江北九在江南而江北六郡自襄鄖之外惟德安稍緩若承天之介于荆襄黃州之介于淮楚其形勝亦不亞襄鄖若荊州濱江西北而控制江南尤全楚之門戶則楚鄖之在江北者無一不當嚴守而在江南之九郡雖

最著若武昌。若漢陽岳州。皆仰安危于江北耳。今襄鄖險要之說。已悉於前。而承天黃州荊州。所以當重之故。則請再陳其形勢。羊祜之伐吳也。先侵吳之石城。以奪吳人之資。蕭行之起兵襄陽。張宏策說蕭懿早圖鄧州。曰鄧州控帶荆襄。西注漢江。而蕭衍亦謂必先拔鄧州。然後席卷沿流。南宋呂祉條議中興。亦以鄧州通遶江陵。西抵襄陽。又僅百里。脫若經緯漢江之間。必當以鄧城為重。及元之圍鄧。張世傑死守不克。伯顏欲舍而南下。諸將以鄧城我之襟喉。不取必為歸路患。則承天要害之說。非徒為陵寢重地而已。黃州之重於全楚。不過謂其可為武昌之援。而所屬蘄州。則又可為九江之蔽也。而亦知齊桓討楚之先。必先結盟黃人之故乎。齊桓之於楚。未嘗一日忘之也。而其為霸之久。自魯莊之三十八年以內。未嘗一加兵于楚。則以楚之國。西起鄖襄。東盡淮壽。中據唐鄧。數千里內。乘險而守。無間可入。僅一蔡為入楚必由之路。而蔡亦死心為楚守。惟黃州居楚肘腋之間。陽奉之而不為用。遂不憚一盟于貫。再盟于陽穀。以結之。齊黃之交固。而楚內外皆敵矣。一旦潰蔡伐楚。楚豈不能與齊抗乎。其遂來盟者。畏黃人導齊而襲其郢也。是黃之係于楚。非小也。況今又介在淮楚之交耶。夫今東南形勢。私憂其不立者。以東南數省之聲勢。不相呼吸。而數省之形。要不相連絡也。今欲連絡數省之形。要莫若鄖陽。欲呼吸淮楚江右之聲。

勢莫若斬黃。且斬黃北至江南僅四百里。得重兵而守之。不但可為九江武昌之蔽。且與襄鄆並控中原。若五關（疏而關黃土關本此）一堡（陽通）之險。北跨汝南。南衛江鄂。惟所用之宋李璣之疏可倣也。晉陶侃之不肯渡江北而取郢城。姑黃者。以石勒相逼至近。恐一舉而擣其鋒。故但堅守武昌。憑江為阻。然亦甚單露矣。今中原勁敵未有如石勒者。奈何不及此時早固其守。遂使淮楚中隔。武昌孤寒耶。此黃州要害之當講也。若江陵宿為重鎮。昔人無不言之。但今者蜀幸未失。則江陵兵勢要當以通連蜀勢。領制下流為重。若巴蜀少有不測。則歸施之間。盡屬要害。陸遜所云西陵建平國之門戶。失之則全吳震動。非僅荊州可憂。夫敵之犯楚。不過兩道。一由夔峽而出。一由襄漢而下。由夔峽而出者。不得江陵。則不可以窺楚。由襄陽而下者。以一兵牽制江陵。便以大兵浮漢至鄂。此元滅宋故事。然伯顏破鄂東下。必留阿里海涯以四萬人守之。且命其規取江陵。及其既得。元主喜謂荊南既定。吾東兵始無後患。若前者朕嘗憂之。則江陵不但控敵楚邦。而護全吳矣。夫曹操之至江陵。距武昌尚千有餘里。張昭輩亦一時之傑。何至遂欲以全吳迎操。亦以吳之所恃以為固者。長江而操得江陵。則長江之險與我共之。以重兵順流而下。不可或遏也。及既破操。而有江陵。魯肅必欲以昭烈鎮之。呂蒙必不欲關羽取之。雖前後異用。皆為吳計耳。是

江陵形勢之急。所以同承天黃州而並亞于鄖襄也。約言之。全楚都會。既推武昌。則當以武昌為言。而武昌之左蔽為黃州。右蔽為荊州。襄鄖似不相及。然守在荊黃。戰在襄鄖。則武昌安而建康亦安。戰在荊黃。守在武昌。則武昌危而建康亦危。此楚吳形勢之大略。攷古証今。實原本之說也。則昔人論上流險要。必爭之地。以為不出九江。武昌襄陽。江陵者。自今觀之。惟襄鄖為必爭。蘄黃江陵承天為必守。而九江武昌直可緩弗論。然或如晉王述之議。武昌寔江東鎮戍之中。非但捍禦上流。兼可駁奔緩急。與建康為臂指。而蕭關又以尋陽姑九地居中流。密邇徽甸。若留屯湓口。內藩朝廷。外為四方聲援。亦要地也。則兩郡亦當屯兵一二萬。以為宅中勁後之勢。若襄鄖之間。非有一二十萬之師。如古岳飛孟珙者。統之以堅守兩城。恐不能濟。蓋制人之與制于人。所爭在尺寸之間。我能保襄鄖。則南陽歸德金州漢中。皆我進戰掃蕩之地。敵且備我不暇。若我不能保襄鄖。則荊州武昌無日得安。而京師時有震動。制人與制于人。其機安可不辨哉。嘗請史至晉成帝咸康之時。歎庾亮規取中原之略。措置極當。深有合於今日。安可以成敗論英雄也。已則坐鎮武昌。而表桓宣為司州刺史。鎮襄陽。表其弟庾悅為梁州刺史。鎮魏興。魏興縣名又表其弟翼為南郡太守。鎮江陵。又命樊峻帥精兵萬人守邾城而已。又欲移鎮石城。以逼後趙。而竟齎志以歿。悲夫。

謁呂新吾先生祠堂詩序

東八九歲時。見先君子手一編曰四禮翼者。曰。聖子識之。此近日理學大儒甯陵呂大司寇新吾先生所著書也。東自是始知有先生矣。稍長。從學於念臺劉先生。命讀吾鄉高顧兩先生遺書。及鄒忠獻公集。往往見有與呂先生往復論學書。乃益習知先生之學。以篤敬為本。以踐履為宗。以救世及物為體驗。以脩明禮法敦倫彰教為已任。非空談性命為講學者也。蓋是時天下承王文成講學之後。皆直指本體。其流弊至泰州王艮之徒。顏山農何心隱輩。尤任尚自然。好言不學不慮。舉凡慎獨主敬之學。皆訶之為增添。為外鑠。為桎梏。天下利其便於私也。翕然而宗其教。高顧兩先生崛起。深憂人心之陷溺。乃一以程朱為宗。而救之。而一時王南塘輩。矯激之過。遂以文成之書。甚於洪水猛獸。亦非其平也。獨呂先生生長中原。身肩正學。既不惑於泰州之徒之說。亦不偏袒高顧為過激之論。博實深醇。循循勉務。求其學之至是者。以一身為天下後世所宗式而已。東為黃岡夫子所取士。而夫子又先生孫比部公所得士。予獲以淵源之誼。事先生之孫。遂得登先生之祠。縱觀遺書。以大慰其三十年來仰止之至願。東不甚幸且樂矣乎。獨是東敬詢先生之里人云。今比部公之容貌。甚類其祖。而東竊默然念吾黃岡夫子之容止氣度。又甚類其師。未知我夫子

之學於師而得之耶。抑未知天下之道深而厚德者其容止氣度。孫必有以類其祖而弟子必有以類其師也。昔司馬遷自以遊山東。觀孔子廟堂車服禮器。徘徊不忍去。而小子東乃得逮事先生之孫。以自附於門下士之後。又豈僅車服禮器之陳跡歟。細讀諸名公謁先生祠堂詩。首唱若大宗伯王文安公。次和若今相國柏鄉魏公。太司寇東谷白公。少宰念東高公。光祿環極魏公。太史吳廬王公。大參愚山施公。太守草樓李公。暨吾黃岡夫子。凡數十篇。皆斐然可誦。東徘徊其間而不能去也。乃奉比部公之教。為序其詩。以比於史遷之賦高山焉。

董文友文集序

夫所謂文章者。立其質而文附之。有諸中而後章諸外也。自非至聖其生平各有所得力之處。故其著之於言也必專。若曾子得力於孝。則孔子以孝經屬之。子夏得力於詩。則專序詩。孟子獨有見於性善。則專言性善。下及賈誼鼂錯專言經濟。言兵法。董仲舒劉向谷永匡衡專言天人言災異。言五經五行。其生平所立說及其旁通而曲暢者。總不離其得力之處。太史公曰。此皆誠壹之所致。不具然哉。譬之於賈。猗氏專以鹽。郭縱專以鐵冶。烏氏專以畜牧。寡婦清專以丹穴。既擅其利。饒於貲矣。然後其家中纍旄玉石沙犀漆絲聲色之玩好珍異無不具。此有本者之所以無不有也。今

之為文章言者。我未見其所為。誠壹者何在。所謂本者何在也。而其文殆無所不欲言。自以為洋洋纒纒矣。及按其實。則皆空疏贅亂。有似於今之為制舉策者。相率而號於人曰古文。我甚傷之。毘陵董子之文。其所為序記書論傳誌之文。無異於唐宋明諸大家之序記書論傳誌之文也。其矩矱變化。無異於唐宋明諸大家之為矩矱變化也。而予讀其文。按其所得力之處。意其所專言。可卓然自成一家。以昭示天下而傳後世者。莫若其言天文言律麻諸書諸說諸辨。有非當世空疏勦襲為文章者之可及。蓋確乎其有本者乎。夫天下精微要渺之學。莫有過於天文律麻。然自其有得於性命者視之。則皆所云形而下者之器也。邵子之專精於麻。蔡氏之專精於律。原其得力。皆先有見於形而上者之道。故雖旁通曲暢。分緒各魁。而終與程朱為一致。今董子之學。精於麻律。以著之為文。吾知其誠壹致力之所在。尤必更有其本也。夫董子殆幾有得於道也。

贈彭元定序

泰邱彭容園先生有丈夫子五人。而元定才譽先發。尤慨然有當世之志。能敘述故明神光兩朝以來人物邪正。所愛憎臧否甚當。又能周知四方之人文。及各郡邑姓氏。一覽無所遺。其趨舍又甚正。年典謁遊吳門。我吳同學諸兄弟。見元定皆驩然與

結交既歸里門。受知於海陵李公草樓。出其近藝數十首。授之吳門。劄劄氏以廣其四方之志。且語予曰。子為我序之。予曰。予何足以序子哉。以爾師草樓先生與予論子之言。序之可也。元定曰。唯唯。草樓先生問於予曰。元定之才。誠優矣。其志誠大矣。雖然。不可以定之也。少年之人。即勤學猶未足。子在泰邱。亦見元定之勤於學否乎。甚念之也。予曰。某之至泰邱也。彭先生方在哭泣之際。元定亦儼然在展經之中。未及見其學。然予知元定之必勤於學也。元定生而有勤學之責。有勤學之資。有勤學之時。有勤學之用也。草樓曰。其勤學之責奈何。予曰。彭氏之先。自江石移家泰邱。以科名世其家。逮元定之身五世矣。科名者。勤學則得之。不學則不能得也。此其責不能旁貸之我兄我弟。不能下貸之我子也。此其有勤學之責者也。其有勤學之資奈何。曰。予觀往古之勤學者。貧而無書。或丐之於人。或竊之於友。或鈔之於市。或請之縣官。其幸而得之也。或無火。燃糠以燭之。或無師。則數千里裹糧負笈重趼。爾足以求之。或不暇。則戴經而鉏。負薪而讀。惟日不給也。先生宦禾數年。上自六經三史之書。下及嘉隆才子之集。必聚而藏之。予見中州被寇禍之後。即相國第宅中。不能備四部之書。元定幸而家中有藏書。即使勤學十年。并日而讀。不必丐之於人。竊之於友也。又經師有魏用熙者。當今之醇儒。晨夕在家塾。有疑即可問。有問即可悟。不必

裹糧負笈之勞也。未鹽瑣屑之事。內外門戶之務。自有總持之人。其身甚暇。不必經而鉏薪而讀也。此所謂有勤學之資者也。其勤學之時奈何。人之智慧聰明。能強學多識。博覽深校者。必在年力壯盛之候。年過三十。則智慧聰明銷其半矣。故昔賢謂晚年讀書能用。而苦於不能記憶。夫至不能記憶。臨文索莫。其苦已甚。元定年未弱冠。又身無疾病。心無雜營。此所謂有其時者也。其勤學之用奈何。曰。夫元定所謂有慨然當世之志者也。所謂能臧否往昔人物者也。所謂能留意四方之人文者也。則其勤學之用。誠大矣。使有當世之志而不學。則臨變而無術。急聲名而不知大體。我虞其僨也。將尚論往古人物而不學。則俯聲臨虛。胸無定識。未見其必當也。將與四方之文人遊。則當良辰勝流。置酒高會之時。談辭如雲。詩篇倡酬。百端俱發。四方之士。有深窺其長短者。不學則無以應也。且同人氣類之盛。莫過漢之延熹。宋之元祐。元祐矣。黃門北寺之役。黨人三百人。至今知名者。李范張杜等三十五人而已。其餘無可得也。端禮門外黨碑之上。一百二十人。迄今知名者。上官軾。餘官頤等三十人。其餘無可傳矣。夫諸人亦常隨波震蕩於諸君子之中。而當時既不甚見。垂沒世而又無聞焉。甚可哀也。蓋諸人之學。實不足以自立。而欲附正人自重。其於伸屈之用。誠短也。此所謂有當世之志。有四方人文之志者。其學之用甚大。而有其責有其資。

有其時者誠不可不自勤於學也。惟元定也可以語此。予故知元定之必將勤於學也。憶予與尊樓往復之言如此。今述以序子。子勿惡其切直乎。元定曰。微予與子之交也。子言不及此。予曷敢不祇承。乃受而為序。

送吳生虞升歸吳門序

澆澆之金錫。融之澄之。塊漫之泥沙。堅之陶之。朽彫之皮張之平之。壘腫空辭之什。木攻之剔之。美其實。既虛其中。則皆有聲聞之道焉。聲作乎我也。聞應乎人也。或美其實而猶未能虛其中。以清越其聲。則人之聽之也。有聞有不聞焉。此即學問之說也。予門人長洲吳謫字虞升。家世為名諫官。而家甚貧。少失父母。學為文於其舅氏宋太史孝廉兩公。頗得其術。文漸有聲。且兩從舅氏遊京師。京師近日之工文章。倡後進。若山東王主客。我郡汪農部。海南程舍人諸公。見生著作。交口稱之。聲譽日益起。忽以事將歸。有問予者。曰。以虞升之才。固將求聲聞於天下也。歐陽子所云。據其會就其名者。必於京師。今舍此而又奚之焉。予笑曰。使生而未美其實。雖日逐逐長安塵壙中。其聲聞未可作也。使誠美其實。而又能虛其中。以受人之直言。求益工於既工之後。即日鍵戶塞竇於荒江寂寞之濱。而聲聞日隨之。今天編鐘續鼓。祝嘏之既陳也。鍾師典同之官。辯其磬緩散斂衍。詳甄石之節。其大者節郊廟而和神人矣。

其細者一磬之可擊。一瑟一琴之可彈。亦得以奏於房中。御於君子。莫有聞其聞者。既以語或人。而即以是告吳生曰。生歸矣。但患爾未能蘊其聲也。況患天下之莫聞爾聲也耶。爾學成而舉於鄉。再遊於京師。則爾為在懸之編鐘也。有廟堂諸公在。為爾鐸師典同之官。成爾之節奏焉。爾學成。即優游鄉國間。予雖非君子。其亦能發爾之聲也。生歸矣。

武氏三烈記

崇禎八年乙亥。流賊破潁州。殺戮縉紳士民甚衆。婦女之守死不受辱自殺或殺于賊者。不可勝記。其有姓氏及死節狀炳然可述者。一百二十八人。見於撫按奏疏。我友孝廉武威遠母甯氏。妻劉氏。及妹之適於王生者。聞賊入城。相攜入井。死二幼女。從母劉亦死。凡三世五人。後御史旌其門曰。一門三烈。蓋二女不與焉。此一百二十八人中之三人也。劉考功作潁記。記之既詳。而孝廉復請紀于予。予紀之如右。且嘆曰。苟或言潁川為四戰之衝。天下有事。最先受禍。當崇禎七八年間。流賊之毒未遍中原。而潁已受禍若此。或言不可信哉。明有天下。一統全盛。二百八十年。人不知兵革。一旦變起倉猝。其婦女見聞不習殉節死難之事。而能皎然不污。闔門就義。若武氏一門。豈不異哉。死者人所畏。大丈夫當死生之際。猶有不能自引決者。況婉弱婦

女乎。武氏固世胄。孝廉之父亦將也。豈其家教然乎。然彼一百二十餘人者。幸而死於崇禎乙亥之間。賊退之後。尚有其夫與子及州郡大吏。一一詳誌其死節情狀。姓氏至於今不朽。若甲申乙酉兵燹之中。我鄉婦女之吞刀雉經。不稍屈辱。蹈水火以死。而泯沒不得傳者。無算也。豈不悲哉。願舊有六貞祠祀范孟博母以下諸人。今以一百二十八人配食。予過其祠。肅然動容再拜。祠在潁州東門外二里。慧湖之濱。然范母者。但可謂天下賢母耳。列於死節。不屈諸貞烈婦之間。此亦潁州祀典之過也。

明兵部侍郎葉公墓誌銘

公姓葉氏。諱廷桂。字東來。號菴寶。河南商邱人也。世居江西泰和縣。自諱受者。漢武初遷商邱。祖贈通議大夫右副都御史如蘭。配贈太淑人任氏。父司訓贈通議大夫右副都御史呈春。配封太宜人贈太淑人夏氏。生萬曆十三年乙酉十一月十八日。任淑人夢衣緋衣秉笏者來。曰我居汝家。俄火燭室。驚寤。生公。成天啟壬戌進士。授戶部福建司主事。丙寅選東司郎中。十二月陞陝西右參議。分巡關內道。丁卯三月。丁太宜人憂。崇禎三年己巳。服闋。庚午。補陝西督糧道。九月入覲。時三秦流寇熾起。在廷共推公邊才。可任方面。年未調。分巡關內道。特勅監軍。陞陝西靖遠兵備道副使。駐靖遠。壬申陞參政。陝西河西道。駐鄜州。調山西河東道。甲戌。以平寇功。陞陝西

按察使。在建復共推公邊才。五月陞都察院右僉都御史。巡撫大同。六月出師大捷。詔賜銀幣。丁丑敘大捷功。廕一子錦衣衛副千戶。世襲。疏辭不許。加右副都御史。贈大父母父母如其官。廕一子入監讀書。己卯以秋防功加二品服俸。賜銀幣。自丁丑四月至己卯五月。乞休疏十三上。始予告。八月歸里。明年庚辰九月。即家拜公戶部右侍郎。督理邊餉。十一月。召對平臺。賜銀幣。辛巳五月。敘剿寇功。轉左侍郎。十月。改兵部左侍郎。病甚乞休。再予告。壬午將再歸里。商邱已陷賊。無家。乃僑居金陵。老病且阻。兵輟轉江淞間。順治三年丙戌。將歸里。十月十九日午時。次衢州。卒於逆旅。丁亥三月。長子金吾公元滋等奉公櫬歸。五月。葬公于贈公墓之南阡。公性至孝。友愛家貧。力學。顧獨好談兵。故自成進士。服官二十餘年。在兵間之日居多。其分巡關內奉勅監軍時。上條議十二事于撫軍練公。皆行之。督諸將趙允昌張金季密張令艾穆等先後殺賊神一魁。點燈子。老徊徊。滿天星。過天星。一斗谷等。於梁家嶺。獲賊首七郎。復敗之于中郎。卻陽。芝川。韓城。賊慟哭奔潰。復追殺之。淳化。延安。澄城。宜君。商南。斬首無算。故事。監軍道在行間。率嫖睨觀勝負。公衷甲身先士卒。策馬崩崖。斷壑間。攻圍中部。流矢中胸。飛礮及股。不稍却。賊突圍犯官軍。公自起。執礮擊殺數人。賊乃退。軍氣百倍。復具渠李老砦。獨行狼一條龍。可天飛等。獻俘闕下。當是時。秦寇

國朝文匯 卷十三

九

國學扶輪社印

幾盡公請之撫軍。願假精兵三千人。松山谷盡殲之。可永絕寇患。而撫議起格不行。嗣後秦寇躡入晉地。勢遂張。始悔不用君策也。其備兵河西時。鄜州被寇。患尤甚。當築滿城。狼白晝行市中。城臨河沙。不可築。公為文禱之。脫所衣緋衣覆諸地。而厭之。更築城。遂成。流亡大集。鄜延乃平。其調山西河東時。寇犯垣曲。及絳夏。援兵復大擾。公外捍強寇。內輯兵民。所向必捷。故事冬防河邊。寇民之避寇難者。率乘河水未合。求渡。守令輒遣之。公獨縱令畢渡。約數萬人。是歲河冰竟不合。父老以公忠仁所感。前此未有也。歲大旱。無麥苗。公步禱于天。泣下雨亦下。歲乃熟。其按察陝西時。兩月清積牘三百餘事。吳公姓歎曰。霹靂手也。其巡撫大同時。請開馬市。給代藩宗人祿食。擒左衛邪教法王。大開諸軍。簡精銳汰老穉。儲糗糧。嚴哨探。大同一軍。獨稱雄中外。皆倚公為重。獨以失武陵相意。徵調無度。公擐甲率枵腹之卒。一月中行萬餘里。其不敗衄。皆公勝算。其乞休十三疏。大概謂臣自即署。歷監司至開府。皆萬死一生之身。當大兵大荒之地。積勞之後。病且不支。弗以病臣。悞封疆。天子亦深知公。故特許移疾歸。前封疆諸大臣所未有也。當邊境多故。廷臣每會推邊才。必首推公。然未有能盡公之才者。公任方面。討秦晉賊。破家財。募敢勇死士。薛敏忠等百餘人。置麾下為選鋒。每戰輒先奔賊。及凱旋。驗賊首級。割賊鼻及耳如墳。血淋漓滿前。公對酒。

慷慨自若也。一夕臥起。手擗櫺櫓。上有物纍纍。膠結不可去。舉大視之。則墜然所割賊鼻也。又諸死士窮追賊。暮歸。適公臥。未及驗級。復恐有竊之者。率挽結賊首鬚。置公臥榻下。公酣臥其上。自若也。嗟乎。公起儒生。生長中原晏安之日。目不見兵革。一旦歷行間。當劇寇。忠勇奮發。有以奪宿將悍兵之氣。可謂天下之奇才也。公自言為孝廉時。潛心周程張朱諸大儒之書。最後嗜陽明王先生書。默契不動心之旨。故能身處鋒鏑之中。意氣不稍挫。則公之所得深矣。世亦未易知公也。獨惜公條議平寇方略。及佐樞部奏疏。皆軍國碩畫。鑿然可傳。遭時播蕩。盡散失之。俾後世無從見公之深思妙算。而歎公才之未盡用者。嗚呼。又可悲也。公之懿行。不可殫述。具在公子金吾公所敘行實中。尚論者可以知公大略矣。其子孫聘娶嫁字。具詳家乘中。銘曰。是惟河嶽馳精靈。蛻蟪蛄巢公篤生。艱大軼掌投孤臣。天顧既移志未伸。三衢之旁稱完人。全歸爾邱息爾形。克昌厥後答忠貞。

前明忠烈吳公墓誌銘

嗟乎。故明天啟四五年間。宦寺之禍烈矣。下至窮鄉小邑。十家之市。三人耳語。輒搖手咋舌。相戒勿及崔魏事。乃有抗疏指斥容魏崔田交結肆惡之狀。若以身為鴻毛。投烈燄中。浩然無所惜。若江夏吳磊石先生。可謂成仁取義之君子矣。當先生抗疏。

時自度於國事無補。且身與熊經略廷弼為嫺親。又與應山楊忠烈公同鄉。必羣奸所深嫉。熊楊既前死。先生即絕意仕進。身為言官。結舌而去。亦可不死。而先生志在必死。若不可須臾忍者。此先生之忠所為不可及也。攻次輔丁紹軾。所以翦崔魏之羽翼。奪魏廣微顧秉謙諸人之氣。人謂紹軾實啖崔魏殺先生。夫崔魏何待啖乎。既抗疏攻客魏崔田矣。夫甯有生理乎。故人以先生為攻奸相死者。非也。先生能死後三日。即擊殺紹軾。殺紹軾而崔魏輩氣奪矣。故丙寅秋冬之後。崔魏殺人之謀稍怠。幸留一二骨鯁未死之臣。若我鄉文文肅倪文正諸公。為國家後日之用。皆先生擊殺紹軾之威靈。能使羣奸怵心於冥報。夫先生之忠。大於身後若此。而人無知之者。此予所慷慨太息。欲為闡幽之論者也。按吳氏之先。自江右萬載縣移家來江夏。有真七公者。為先生七世祖。六傳至璧山公。與太淑人徐氏生先生。諱某。為季子。以乙卯舉鄉試。己未成進士。起家廣東順德令。以清惠著聞。舉卓異。兩為鄉試同考官。行取考選。授江西道監察御史。天啟乙丑七月。差巡視京城。十二月二十五日。疏劾次輔丁紹軾略云。當今內有客魏之交。通外有崔田之暴橫。人情慘於蝸螻。國勢危於累卵。紹軾絕口不肯言。不敢言云云。一十八日。矯旨杖一百。創甚而絕。越七日丙寅正月初二日。紹軾見先生緋衣直入其坐。擊之即死。長安人聞者莫不驚相告也。崇

積戊辰改元贈先生太僕寺卿祖父如其官久之謚忠烈廕一子賜祭葬以崇積十一年十二月葬某鄉某阡其諭祭文及議謚冊藏於家冊詞有云憫楚人之多忠而冤死如吳某者為最酷且以先生為從忠烈後而死者嗟乎此先生所以必死之志也元配尹氏生子某某季子琮為任邱令知名先生之垂絕也以誌銘屬相國黃東崖琮幼未獲詣越四十八年琮始自任邱求百泉山孫徵君撰墓表又為序述年譜彙次高陽孫忠烈公定興鹿太常公等輓詩一編乞誌銘於予予不敢以不敏辭銘曰

七月言官嗜死如飴當其始進人或疑之及其既沒人咸信之不有諍也何以能死
不有進也何以能諍人之大節蓋棺論定嗚呼先生實張三楚芝蘭既焚資施盈戶
詠彼九歌豈惟荼苦克成令名赫赫今古煌煌寵命錫茲坏土惟此坏土忠臣之墓
松耶柏耶永言勿斁

海氏廟記

唐甄

君子之言。以章美也。亦所以風也。海氏徐人也。而顯節於常氏美。句有彊者誘離其夫。將犯之。自知不免。裳衣履襪。彌縫各一。而自殺於舟中。不及於汙。有司論彊者罪死。繫獄後。以赦免。常人莫於龍背。即墓左廟焉。此其事也。邯鄲鄭衛之女。古所稱美也。曳裳褰縵。偷袂飄風。倉庚喈喈。姆嬭郊儻。男女相錯。司馬遷曰。目挑心招。相如曰。色授魂與。男子不制。莫之為恥。雖有剛者。亦蠱惑喪志。汪佚之行。風所成也。唐子入秦。道南鄭。南鄭鄭也。宿於東門之舍。同旅者有窺王婦於房。婦告主人。仗挺而出。幾殺窺者。邯鄲之道。朝歌之邑。七年三過。不見婦人。所聞周漢之風。蔑於今矣。然則女子無知。漸於流風。非其罪也。徐濱河土。薄俗厚。女子尚貞。無失行。聞海氏有行在塗。而立不避舍。雖志也。亦其風使然也。使其身殉於鄉。亦無所表異矣。作廟致金。逮於徵發。賔惠拜觀。婦女祈請。肩摩不絕。童歌里謠。徧於吳越。是可以為風乎。唐子曰。然。海氏之行。吾不以風女子。而以誅丈夫。詩美共姜。春秋褒紀叔姬。女子微也。何為著諸經。班於君王賢人乎。觀其夫。乃知聖人重女子之節也。請舉事以實之。昔者祝融佐高辛氏。光耀天下。其後建楚也。子有餘歲。至考烈王。而黃歇竊之。伯益治鳥獸草木。開稷契之緒。其後建秦也。亦千歲。至莊襄王。而呂不韋竊之。羊羸之宗。固於衛。

華枉席一遺遂殄其祀考烈莊襄實誰之父負芻政亥實誰之子怙斯驚實誰之臣百什鬼神繞咸陽降鄢郢號哭而不得飲食項籍王翦之兵不為毒矣既有於國亦有於家丈夫稍有知識者能不戰懼於斯

徐華國傳

徐元英字華國吳江人也。大父誥父士烈。及華國之身三世以剛直傳。華國為人尤仁厚。少貧。與二弟仲季分田。仲曰。季田腴。必易之。相爭不決。華國謂仲曰。我田亦腴。可畀汝。母與季易。於是兄弟以和。其教授生徒。有不率教者。則為之憂悒不食。弟子皇懼改過。乃色喜。以是教行而從之者眾。當出。有坐而拱之者。則謂之曰。拱者。所以為敬也。君既不為我起。何以拱為。其人慚謝。里中無賢不肖。皆曰。徐君長者。也有富者。欲以女妻之。華國曰。非吾姻也。及吳氏庚帖至。不發緘。照放日中。識其姓曰。此吾妻矣。遂娶之。生三子。長那次松次良。華國曰。吾惟一子爾。那良果殤。惟松成立。人怪而問之曰。君預知妻姓吳氏。惟有一子。其故何也。華國曰。吾昔夢神人使吏與我一牒。有文曰。室吳氏。年終四十三。子兩耳佳。兩耳一人也。天定之矣。及病革。家人請禱。不許。曰。命乃在天。何以禱為。遂卒。年果四十三。華國孱居東郊。其地多荒冢。有鬼數迷人。有至死者。向暮。人不敢過其處。一日華國夜歸。聞桑中空舍。有若魔呼聲。疾趨

視之。見一人轉側於地。土塞其鼻。將死矣。乃負歸。救之得活。生平勇力過人。有石四重三百餘斤。人不能舉。華國挾之而趨。如挈餅然。有悍馬逸入田中。踐食禾稼。牧者不能羈。華國聞之。徒手往。捋其鬣而繫之。以歸於廐。其勇力如此。唐子曰。人有恒言。邪不勝正。予屢徵之。則不然。若華國奪人於惡鬼之手而生之。豈果以正勝邪。夢有徵者。亦偶耳。牒言明告。畢生皆協。抑又何也。兩耳為一人。其占巧矣。然猶未盡。以予觀崧之困窮。無所成就。而名聞於世。則兩耳之言。又且盡崧之終身矣。豈不異哉。

褚遂良論

邵長蘅

大臣當國。不幸視其君有過舉。及其事之未遂。而匡抹之。則諫行而身安。待其勢之已成。而逆折之。則諫未必行。而身危。孔子曰。成事不說。遂事不諫。江河之議。始焉涓涓。童子捧土塞之。可以有功。及乎橫溢四出。決隄防。壞城郭。廬舍。而無可如何。何則。其勢之已成也。唐高宗立武昭儀為后。褚遂良諫不聽。竄逐以死。吾悲其忠。而惜其諫之不蚤也。武氏本太宗才人。高宗以太子入侍悅之。太宗崩。武氏為尼。上詣寺見之。武氏泣。上亦泣。王皇后陰令長髮。勸上納之後宮。以間蕭淑妃之寵。未幾大幸。按武氏為后。在永徽六年。時太子宏生已三年。則高宗初年。武氏已入宮矣。踐祚日淺。梓宮未寒。嗣君過舉。孰大於是。遂良顧命大臣。當於是時力諫曰。臣竊聞之道路。陛下納故才人武氏於後宮。武氏經事先帝。十有餘年。天下莫不知。一旦復侍陛下。捐先帝之聖德。累陛下初政。國人述之。太史書之。天下後世謂陛下何如主。夫四海之大。六宮之富。詎無才色如武氏者。臣愚受先帝付託。死不敢奉詔。陛下幸聽臣。願出武氏謝天下。不聽。則以去就爭之。又不聽。則以死爭之。高宗雖昏。必為悚然改容。且是時武氏之寵未固。蕭淑妃之愛未弛。奸人德儉義甫。李勣敬宗之徒。羽翼未成。左石武氏者。僅一王后爾。淑妃必且傾之於內。夫內有淑妃之間。外無德儉義甫李勣。

敬宗之援。以未固之寵。納必死之諫。如轉圜矣。惜乎遂良計不出此。顧遲之五六年。後迨立。后議起。武氏之勢已成。中外蟠結。堅不可拔。然後欲以一身障其橫淵。叩頭流血。請死。嗚呼。晚矣。吾觀高宗。非甚愎諫者。嘗欲特置宸妃。以武昭儀為之。韓瑗來濟諫。以無故事。乃止。李勣入見。上曰。朕欲立武昭儀。遂良固執。以為不可。遂良既顧命大臣。事當且已乎。勣曰。此陛下家事。何必更問外人。然則帝始終於遂良。猶有忌憚。惜遂良諫之不蚤爾。太宗聘鄭仁基女為充華。魏徵聞其嘗許嫁士人陸爽。遽上表諫。帝大驚。手詔停冊使。夫污先帝之嬪御。與納許嫁之女。過孰大小。魏徵諫而遂良不諫。律以春秋之義。遂良能辭逢君之罪乎。雖然。遂良李勣長孫。無忌同受顧命。無忌中金帛之餌。囁嚅脂膏。李勣且贊成之。臨軒冊后。勣躬齎璽綬。而遂良特立不回。卒以諫死。嗚呼。非忠臣能乎哉。

君子醫說

吳君允成。儒而以醫名。今大中丞商邱公雅重君。扁其廬曰君子醫。而君又欲得余一言以張之。乃為說曰。古之為此名也。所以命天下之有德。故有德者。通謂之君子。宋儒蓋嘗云爾。今夫醫之為道。其理甚深。其視疾有切脈望色聽聲表形之微。其治有湯液醪醴鑊石。擣引毒熨之方。其得失係人之生死。而其人。有君子有小人。按

繩墨調陰陽守診籍之效者而變通之治其本不急其標甯使已無旦夕功而不可
以人命試君子也。小人則不然。滅裂古法。矜智徇臆。苟一時之效。貽終身之患。而不
恤其尤者。未疾也。藥之而疾焉。疾未甚也。藥之而甚焉。而因而乘之以邀利。諺云。學
醫人惜。儻謂若輩耶。余觀昔之為國者。莫急於辨君子小人。君子用則寬大和平。與
世休養。以無事。其時即有旱旱兵革。世未大治也。而必不至於亂。小人用則好事喜
功。用一切苛碎刻覈。括克之術。而任之以鷹鷂之夫。施之庸有小效。而及其敗也。勢
如潰癰決壅。而喪亡隨之。聞覽宋史。熙甯之初。天下無病也。王安石新法行。而病始
生。繼之呂惠卿章蔡之徒。興利開邊。黨禍大獄相尋。而病乃百出。雖有元祐諸君子
不能拔也。卒釀成靖康之禍。宋幾以亡。顧愚以謂宋之亂。安石諸人釀之。而亂而不
遽亡。猶得延南渡一百五十餘年之國脈者。蓋元祐諸君子不為無功。嗚呼。士大夫
多君子。則國治安。醫多君子。則疾可已。人可活。君子所係重矣哉。吳君謹厚長者。與
人無貴賤。必以誠試其藥。皆精良多驗。人翕然信之。予夙有肺病。氣逆上壅。而為喘
過秋輒作。作則為憑几危坐。瞠目搜肩。擗膈呀吸。累晝夜不能就枕。少間輒復作。冬
至乃已。今年君治之。護其元氣。補以復苓。屏去疏快耗削之劑。而疾漸減。未涉冬而
愈。所為治其本不急其標也。其謂之君子醫也。固宜。唐時有宋清者。長安藥市人也。

居善藥。疾病疔瘍者。皆與就清。雖不持錢來。必與善藥。人謂清類有道者。語在柳子厚所為傳。夫清市人耳。得子厚傳之。而名至今不朽。余文雖不逮子厚。顧如吳君。詎能已於言耶。君名某。允誠其字。世為吳門人。

盤山志序

盤山在京城東二百里而近。一曰盤龍山。以蜿蜒盤薄故名。一曰四正山。山特立無倚。峰竄蓮瓣。四面如一。故名。一曰田盤山。三國田疇所盤桓。去田從盤。俗省也。或曰古有田盤先生。自齊來。栖隱於此。而疇避難處曰徐無山。在今遵化北。或曰盤山即徐無山。今感化寺古碑。猶載田氏事云。其山多怪石。其樹多松。石之昂者。欲翔。欲飛。欲墜。欲壓。綿谷亘巖。松生石罅。腫腫蜷蜷。感怒而不得逞。則往往作蛟蚪。擎攫勢其水。皆奔泉。從高處下。廊道元所稱望。山上水可高二十餘里。素湍浩然。其閒梵宇罕堵之勝。神燈鬼火。謠詭幻怪之觀。與夫龍蛇之神。虎豹鼯狸之窟穴。高僧隱士之盛。騷人墨客之所錫鑣。山皆擅而有之。其與江南之廬阜黃海。閩之武夷。越之台宕。粵之羅浮。巴蜀之峨眉。諸名山。爭雄長於域內。宜也。然而亘千百年來。山志亡有。探奇之士。每以為憾。詎非閱興抑山之靈有所待。如釋氏之所謂緣興。拙公來自江左。卓錫茲山。既闢青溝禪院居之。毅然以山志自任。而少司農阮亭王公。太史竹垞朱公。曹

伙助之。凡屢削橋閣。九寒暑而志成。然後山之深。水之秀。樹石之幽奇。與夫梵宇罕
堵之勝。神鎧鬼火。謠詭幻怪之觀。龍蛇之神。虎豹豺狸之窟穴。高僧隱士之廬。騷人
墨客之錫鑊。一旦若挾別洗濯而出。而獻奇效靈於茲山。以與江南之廬阜。黃海關
之武夷。越之台蕩。粵之羅浮。巴蜀之峨嵋。爭雄長。而盤無媿色。則志之功。顧不偉哉。
為之序。所以幸茲山之緣也。杜公名智朴。受記別於青龍之百愚。為曹洞宗九工詩
阮亭以清畫靈一方之論者以為然。

魏叔子文集序

環海以內。名山五。大川四。皆能出雲雨潤澤物。故方望視公侯至一邱一壑之勝。載
在圖記。供奇士之游覽。然不能出雲雨潤澤物。則不敢與名山大川齒。文章在天地
間亦然。其大者日月星辰陰陽之所以序。墳壙壤墳之所以奠。君臣父子夫婦之所
以定位。禮樂刑政之所以行。其小者亦必係治亂關利弊。考鑒成敗得失。為斯世有
用之言。故隨其立言之大小。皆足以不朽於世。曹子桓曰。文章經國大業。不朽盛事。
蓋必可經國者。可不朽也。若夫歌散靡麗。佶屈無益之文。亡論不能傳傳。亦速朽爾。
都魏叔子兄弟。皆以能文章名海內。客冬叔子來毘陵。余識之。寓樓握手語移時。恨
相知晚。蓋余亦喜為文章。持論頗與叔子合。顧余碌碌。度無所用於世。聊以文墨自

嬉。叔子磊落喜豪傑士。其智畧輻輳之氣。時露眉宇間。故發為文章。每至談說經濟。讓天下古今之變。率整整副名實。不為無用之言。嗚呼。才如叔子。而僅以空言自表見度。非所甚願。然已足不朽矣。余平居有五嶽之慕。鬱鬱未遂。嘗一登泰山。所偕非人。不能盡其奇。至今以為憾。及讀叔子文。稱其季弟和公登太華絕頂。日月從兩耳升降。視黃河如襪帶。委地而峯。剪削劣詭秀。拔地倚天。則又未嘗不惘然神往也。

陳椒峯文集序

堪輿蜿蜒磅礴奇秀之氣。於北戒多山。於南戒多水。顧其勝往往不相兼。今夫嵩之高。華之削。泰岱之崇巖。號稱中州巨鎮。而原陸千里。不得水以涵之。故山峻極而不秀。洞庭沅湘之區。千里一碧。日月出沒。極汪洋瀟灑之觀矣。而君山一卷。不能與水爭奇。故水瀟灑而無涖。獨吾吳之澤。不然。環三州境。吐吞三萬六千頃之波濤。而羣峯矗立其間。山挾湖而增秀。湖挾山而增奇。蓋堪輿蜿蜒磅礴之氣。於是焉兼。而湖之中山之最大者。其東曰兩洞庭。其西曰馬蹟。茲二山予皆未及遊。而馬蹟距予家為近。凭高而眺。則湖光山霽。時時望見之。夫既為氣之所鍾。意必有瓌偉特立自命之士。生於其間。而惜予未見也。既稍與山之人遊。益知其山之風土人物。其產宜紫栗柑橘楊梅來禽之果。蹲鴟杭柰之饒。其人闊達而多智。起家至大官者相望。而猶疑未

是以當之也。椒峯陳先生山之人也。一出而成進士。負盛名。遂以文章雄視一世。學者宗之。殆所為環偉而特立者歟。椒峯集最富。多至二百餘卷。其為文不名一體。大要主於明經論史。而識力卓絕。余與椒峯生同邑里。論交二十餘年。每有所論著。婉不及也。按山誌湖中有峯曰夫椒者。與馬蹟相近。因以自號。雖然。椒峯重先生耶。先生重椒峯耶。余幸未老。異日扁舟草履。一覽湖山之勝。當醉山靈而問之。

廬山遊記一青玉峽記

距開先寺西百餘步為青玉峽。峽之源有二。其一馬尾。水出鶴鳴峯側。水從石罅迸射。數十百縷如馬尾。因以名。余未至其下。然望見之。其一即黃巖瀑布。瀑下與馬尾合。然後劈峽出。奔注谷底。兩潭遞受之。激者沸白。渟者沈黛。砰雷轉輟。澎湃千狀。夾峙削壁百仞餘。嵌壁雜樹。經新霜。作丹碧色。相間。樹葉墜潭中。滌漩洄狀久之。乃急溜而去。峽之右有亭曰漱玉。余與周生同遊。觀廬山瀑布。自茲峽始。是日宿開先寺。夜大月。涼影如水。挾周生復走潭上。蹣跚竹樹間。影離立如山。隨搏人。葉聲蔽款。周生心悖欲還。強之前。籟寂谷虛。瀑聲益奮。對面語不相聞。余大聲呼曰。天壤間自有此峽以來。乘月坐石上聽瀑。如吾兩人者。亦不多得。捫崖石題石而返。周生名濤。工畫。嗜山水。遊以壬子九月二十日。

廬山遊記二 黃巖記

黃巖之水其源出雙劍峯側。未至黃巖寺北三十步下注為小潭。巨石橫當潭口。過石五六步。又注為小潭。泉聲淙淙然。自此狀流亂石間。逶迤而南一里許。石壁挽之。泉從峭壁下墜為瀑布。太白詩飛流直下三千尺。蓋指此。此其上流也。潭各圓廣倍尋。潭石橫滑離立。如羊如牛。馬如几如榻。如熊羆者不可名數。四面竹樹環蔭。日光穿漏。石子平布潭底。皆作五色。或星星如金晶可愛。坐磐石掬水噴面。從倚不欲去。踰間折而北百餘步。巨石突出。上偃而中空。旁有竇從竇中遠出石背。巨石又覆之。亦上偃而中空。如畫重累屋然。茅屋半楹踞石上。俗呼空生閣也。循澗南下。登文殊塔。塔與瀑布相對。瀑垂千餘尺。深秋水瘳。猶作虬龍蜿蜒勢。轟聲如雷。回視雙劍峯。益逼肩睫。石火峻嶒如筍。峯頂一池。人跡杳絕。六七月間有蓮花從空飄墜。導僧云。

廬山遊記三 玉簾泉記

玉簾泉在歸宗寺東北五里。徑皆行松葉水聲中。未至泉里許。望小閣如燕巢。仰綴崖石間。即泉庵也。庵石跨澗為小橋。過橋偃偃穿石罅。下坐潭側。仰望玉簾縣空五丈許。如急雨。如珠旋雪。已注潭。復激射倒躍上五六尺。然後折而去。泉旁石壁橫展數百丈。若列屏。丹碧渲染之對面。巨石突出。勢峻嶒然。下仄而上砥平。廣可

布二席。雜樹四五株。斜映其旁。日照高樹。正與泉射。泉腰一綫如玦。如斷虹。青碧相半。已復散為五色瑩瑩。光景奇絕。昔蘇子瞻以三峽青玉當廬山第一。而不及茲泉。意子瞻時泉猶翳。虺蜴榛莽間耶。然則山水雖勝。顯晦固自有時耶。

廬山遊記四 三疊泉記

遊玉簾後十日。乃往尋三疊泉。先一日宿觀音閣。晨起。維僧導行五里。抵玉川門。玉川門者。峭石撐拄成洞。旁有竇。人偃僂穿竇中如門焉。門內小庵。正瞰鐵壁峯。峯皆谷削。橫亘二三里。如張大屏障。色黑類鐵。因以名。聞春夏山鵲開景。最奇麗。庵後俯澗。行里許。抵一潭。石多異狀。泉作三級下注。十餘丈。僧曰。是三疊泉也。余意盡去之。仍憩玉川門。老衲元公詢遊狀。笑曰。外龍潭耳。泉距此尚五里。然險絕。近罕遊者。乃賈勇復往。元公操杖從。尋舊徑。抵潭。揭澗而北。踰一石。齟不能受趾。腹帖石。翕翕然。過此皆鳥道。榛莽不及頸以下。三之一。磴礫而滑。每陟磴。必攀援上。膝幾拄頤。茅簪刺十指。至血濡縷。不顧矣。澗濶十餘丈。寒衣履渡。從石上。猿接猿。騰。湍壯石。巉。為之股栗久之。先見下疊。轉絕壁。三疊俱見。至此則兩壁削峙。青天逼狹。如罽泉從天落。奚止千仞。山志稱初級自崖口縣注。晨晨垂練。既激於石。則如雨。如霧。噴灑二級石上。然後匯注龍潭。轟轟如萬人鼓。乃三級之半。石又軋之。別似一級。則志未之及也。

泉於廬山最奇。最後出太白樂天晦庵諸公皆未及觀。茲遊余似有厚幸。然使襄驛信導僧所給。即不之信而不遇元公導之。遇矣。而或怵於險。泉之奇。迄無由觀也。噫。噫。天下一閱其藩。遽信為是。與夫困於無道。興休險而卻者。蓋什且八九也。斯又重可慨惜也哉。

廬山遊記五 小三級泉記

小三級泉在玉川門內里許。舊名外龍潭。即導僧指余三疊處也。語在前記中。俗以三疊泉下為內龍潭。故此外之云。泉從高山凹處作三級下墜潭。每級可二三丈。初級循崖蜿蜒如白虹而差短。二級怒輒於石噴數尺許。跳珠急雪。注潭面不復循三級下。而三級乃在其裏。蜿蜒滙於潭。相傳潭有龍。歲旱磔狗投潭中。輒雨。潭三面拒壁。轟聲如在巨甕中。震激異他泉。余與元公觀三疊泉返。復憩其旁。語元公曰。茲潭倘置之吳會之區。遊觀之士日集。名必藉甚。今處是山也。介玉簾三疊間。曾不足比數。談者遂不之及。庸非不幸耶。然茲潭亘千百年而適與余遇。詎非潭之幸耶。既出語南康守廖公。錫小三級泉四字潭石上。今後遊者知泉之名。自毘陵邵長蘅始。

廬山遊記六 棲賢谷記

尋三疊泉之明日。由白鹿洞西行十里。抵棲賢谷。谷無奇也。然以三峽澗勝。跨澗而

橋曰棲賢橋。澗金石為底。出兩崖各數十丈。石多紫黑色。李夢陽所云澗石肝爛是也。窪者為潭。為井。為釜。為杵臼。為破甕形。突者為磯。為石梁。為几榻。為陂陀坻島。水觸石澎湃。若與之角。久之不勝。乃潒潒紆行。澗之奇於是為最。並澗一里許。至玉淵潭。潭深無底。相傳甌沈潭中。後乃從洞庭湖浮出云。潭西為棲賢寺。寺僧石公能詩。喜文章。與余語甚洽。飯罷仍偕澗行百餘步。微徑新闢。下達澗中。有巨石如砥。緣石而上。復有巨石。可列坐二十人。竹樹交蔭。鏗鏘之音。泠然會石下。石公曰。茲勝新得之。未有遊者。余屬石公醵響雪磯三字崖壁間。夜就宿中。清話竟二鼓。明日送余過玉淵潭。笑曰。師過虎溪矣。石公欣然相視大笑。揖別去。壬子十月四日。

夜遊孤山記

余至湖上。寓輞川四可樓已半月。輞川者。家學士尺戒庵別業也。樓面孤山。暑甚未能住。七夕後五日。雨過微涼。環湖峯巒皆空翠如新沐。望明月上。東南最高峯。與波溶漾。湖碧天青。萬象澈澈。余游興躍然。偕學士呼小艇渡孤山麓。從一美童登放鶴亭。徘徊林處士墓下。已捨艇取徑沮洳間。至望湖亭。凭檻四眺。則湖圓如鏡。兩高南屏諸峯迴合如大環。蓋亭適踞湖山之中。於月夜尤勝。亭廢。今為龍王祠。西行過陸宣公祠。左右有居人數十家。鐙火隱見林薄。並湖行二里許。足小疲。坐西泠橋石閣。

學士指點語余曰。宋費似道後樂園廢址在今葛嶺。又記稱水竹院在西冷橋南。左挾孤山。右帶蘇隄。當即此地。嗟乎。嵐影湖光。今不異昔。而當時勢敵之赫奕。妖冶歌舞亭榭之侈麗。今皆亡有。既已蕩為寒煙矣。而舉其姓名。三尺童子猶欲唾之。而林逋一布衣。垂六百餘年。遺蹟顧至今尚存何耶。相與慨歎久之。孤山來經僧舍六七梵唄寂然。惟鳳林寺聞鐘聲寥寥也。作記以游之明日。

菱溪草堂記

菱溪在毘陵郭東五里。為漕渠南注之支流。按邑志曰。米菱港。或曰菱港。而無菱溪。爾雅曰。水注川曰谿。則茲水名溪固宜。曰港。或從俗也。漕渠自京口來。東西亘郡境。入吳越界。史稱隋煬帝穿江南河。自京口至餘杭八百里。廣十餘丈。可使通龍舟。今漕渠是也。而溪旁則相傳隋離宮故址云。予族子龍文居漕渠門外。邪直菱溪。僅十數武。乃於所居堂之東偏稍南。別構三楹。為讀書之所。而名曰菱溪草堂。中貯書千餘卷。其前隙地廣袤各及尋。而三之。鑿石為峯者及尋。環以小池。如峭壁巉巖峙澄潭中。旁植雜花木十餘株。常欲請予記。鑿石壁間未就也。今年閏夏。予舟行自吳閶。歸信宿草堂。會暑甚。侵曉獨坐池上。市聲未竟。露氣晨流。游鱗百餘頭。皆噉嚼水面。如霞駭。遠聞行舟欸乃聲。與漁歌相互答。官然移情者久之。間考隋史。大業十二年。

春詔昇陵通守路道德集十郡兵數萬人於郡東南起宮苑周圍十二里內為十六離宮。倣東都西苑之制。而奇麗過之。按之圖記與郡邑志所載皆可信。不虛度其時。聚斂之繁。急督趣之峻酷。與夫臺殿樓閣窮極壯麗之觀。大概可想見。而宮成而盜起。竟未及一臨幸。莽為邱墟。然則侈汰者速亡。而富貴之不可恃如是哉。而菱溪一勺。隋至今且千一百餘年。而草布之士猶得私而有之以名其堂。試與子繞河遠眺。其所當訴然而賦慨然而興。今昔盛衰之感者。蓋百端交集矣。龍文恬淡不撓心俗務。養親讀書之暇。將謀耕東舉以自娛。亦時喜從予論詩。初字九儀。今別字東耕。以見志。即其人可知。康熙壬午七月二十日青門長衡記。蓋堂成之歲也。

明少司馬葉公家傳

公諱廷桂。字青來。七世祖諱受。自江西太和徙河南之商邱。為商邱人。考諱呈春。以貢投訓導。後贈如公官。公少有文武大志。喜論兵。負膽義。中天啟壬戌。進士授戶部主事。連郎中。歷郎署四年。大著聲績。出為陝西分巡道。以內艱歸。服除補陝西督糧道。當此之時。流寇起秦中。延綏南北所在充斥。渠魁則王左掛。點燈子。王嘉。穎神一。元又有不沾泥。可天飛。紅軍友李老柴。上天猴。獨行狼。一條龍之徒。黨屯城聚大者二三萬。小者數千人。奔突飄忽。郡縣不能制。中外方亟。邊才秦撫練公國事。疏薦公。

有將畧可倚。一面調公巡關內道。特敕監軍。是歲崇禎四年二月也。公首條議用兵十三事。皆中機宜。練公題之以公督諸將趙大允張全昌艾穆等。三月從擊賊於中部。四月從擊賊於邵陽。又從急擊賊於韓城。於柳村。於上峪口。每戰公被甲先登。屢急叱咤大呼。衆皆應聲騰赴。因馳騎合擊。賊輒大潰。十日五捷。凡斬級七百有奇。國獲器甲輜蓄無算。點燈子跳而免。乘夜渡河去。公長軀偉腰。腹高七尺餘。面方顴垂耳。戟髯警歎如洪鐘。臨陣儼若神人。敵望之氣懾。戰勝諸將上首功。擲級滿前。血淋漓。積骸突兀如邱冢。公路上座。引卮浮滿。意氣慷慨。諸將功多者。自起酌卮酒酬之。一日將士追賊暮歸營。公已寢未及驗級。相率挽結賊首髻置公牀下。公駒寢達曙。晝夜起摘襦褌。間有物累累然。燭之則所割賊鼻耳也。宿將捍卒皆咋舌。竊語曰。不意文官中有此人。先是文臣為監軍者。不親行陣。從容坐幕府治文書而已。遇賊嘗蹙諸將後。問離賊遠近。諸將亦以書生心輕之。及見公所為。乃大驚服。故爭樂為之用。七月賊李老柴等陷中部。練公以公督諸將合總兵王承恩軍攻圍之。城堅久不下。公親率騎薄城。流矢中胷。飛礮及左股。不為卻。夜大雨。賊突圍犯營。軍中亂。公手斬一校以徇。又自製礮擊殺數十人。賊乃退。明日攻益力。榆林道張福臻總兵曹文詔亦提軍至。軍聲大振。百道並登。克其城。生得李老柴一條龍轡致之京師。礮都市是

役也。攻圍逾三閱月。公之功為最。總督楊鶴方堅主撫議。公爭之力。且引段頌語。以為狼子野心。難以恩結。勢窮雖服。兵去復動。惟當長矛挾脅。白刃加頸。今日事勢。正與相同。不聽。因與制府郝公退歎曰。所謂治疾而必遺種者也。後當思吾言矣。既而受撫者多畔云。上怒其誣飾。楊逮訊。論戍。練公亦戴罪。益服公先識云。靖遠盜劉瘤子。本衛弁倡亂。外連猢猻。詔書名捕。數年不能得。會公以副使移駐靖遠。公曰。吾未抵任。盜不吾備。可擒也。密授計遣壯士縛以來。猢猻氣敗。五年二月。鄺州亂。初楊鶴所撫賊上天猴。其部二千人散處鄺。至是突發。劫庫兵殺一監司。總督洪公承疇念賊亂非公不可。請於朝。移分守河東道。駐鄺州。始至。居民裁三百家。蒿萊滿城。狼白晝行市上。城半壁下臨流沙。築輒圯。公為文禱於神。脫所著緋衣覆地。承土築之。城遂成。已乃招流移設方畧。禽斬賊渠六十七人。上天猴誅死。鄺延復平。八月。從督師追殺賊於鐵角城。獨行狼可天飛誅斬。明年二月。以晉寇故。調山西河東道。移鎮甫十日。賊突犯垣曲。絳夏間力戰卻之。七月。賊大至。援兵亦屢集。公晝夜募芻粟。飭樓櫓。又厚養間諜。訶賊動靜。悉知之。出奇邀擊。多斬獲。賊逡巡遁去。公策曰。賊雖卻窟穴如故。難未艾也。乃躬厲將士。輜河津。剋稷山。擄標聞喜。大析其枅枿。賊在公境者。鞭門抵壁。爬梳畧盡。會冬。防河難民擁河干求渡者數萬。公悉令結衣渡。有司慮賊難。

其中力陳不可狀。公笑曰。吾在此。脫有變。吾自當之。是歲河竟不冰。父老說以為異。始至歲。苦旱。斗米直白金七錢。公出步禱。泣下雨亦下。又多方振貸。所稟活甚衆。羣擢本省按察使。大同巡撫缺。廷議難其人。部擬推公。上命改推京堂。召對平臺。部臣頓首言。葉某智勇兼贍。五年監軍。身踐戎馬。廷臣無出其右者。七年五月。命以右僉都御史巡撫大同。大同為沿邊重鎮。公至適有甯恩之警。乃閱諸軍。汰罷伍。完聚檣起亭障。謹烽燧。一鎮屹雄中外。遂請開馬市。歲獲馬十萬匹。籍馬價之贏六萬金。上於朝。詔褒之。自後以獲級功。再賜銀幣。又以叙捷功。陞一子錦衣衛副千戶。世襲。又以入衛京師。賜銀幣飛魚服。而武陵相方枋中樞。數騎齎公。猶以其父鶴督秦時。郊也。公力乞休。前後疏十三上。得予告歸。甫謝鎮。營卒以缺餉。夜半撞監司門。將為亂。公聞變。遽躡履出。遣一卒傳呼曰。中丞來。亂卒問公安在。公命舉燭火。大聲慰遣之。卒投戈伏地。請死。戮其首亂一人。餘還伍。公定變於臨去。不動聲色。由威信素著也。歸一年。召起戶部侍郎。督理邊餉。改兵部右侍郎。總督諸軍務。公生平耿介。孤立不植黨。不旁門戶。故其再出也。益齟齬。屢有奏請。輒不報。以病再予告歸。而中州臨賊。公歸已無家矣。嗚呼。思陵末年。黨禍益烈。其時非乏才也。不入其門戶。雖才不必用。用亦必不盡其才。責之愈重。則肘之也愈力。使必無成功。誰生厲階。至今為極。詩人

所為太息也。甲申三月，公浮家江南。時已病，聞燕都之變，慟哭累日，幾不欲生。自是公益病。明年五月，王師渡江，破金陵。公由杭入閩，欲卜居東甌。航海遇盜，乃泊台州。趨黃巖，又從溫陵再航海。久之，還至衢州。以順治三年十月日歿於逆旅。年六十二。是時，本朝定鼎，公固知天命有歸，閩越相繼建號者，皆庸才，必無濟。蓋決之蚤矣。自以通播老臣，既不忍為再醢之孀楚，又不欲向小朝廷苟延旦夕，而乃踣蹢轉徙，漂泊經年，幾幸速死，且以謂客死勝於家死。嗚呼！夫獨非人情哉？公固大不忍於此也。蓋至易嘗逆旅，公於是乎為全人矣。此論世者所以悲其志，而惜其遭逢之不幸也。歿且五十年，公子金吾元滋、孫增英，函公行狀及孝廉計東所為誌銘，走千餘里，請為之傳。予故撮拾其大者傳之。其他治行尚多，畧不書。公在娠時，母任淑人，夢緋衣秉笏者曰：「我居汝家，俄火光燭室，驚胎而公生。」為諸生，受知郡守鄭公。壬子榜發，置騎馳賢書至。鄭公曰：「姑勿言，解元其業生乎？」已而果然，則大喜。二事其鄉人至今豔稱之。乃附著云。

論曰：公生於明神宗之世，海內晏安，又起家儒生。一旦當劇寇顧懷，慨自奮功名，可謂奇士。方官戶部郎，奉命理御馬監三草場。張奄者，魏忠賢黨也，乘間達忠賢指，欲交公。公峻拒。一日，餽以內庖，公愕曰：「使者誤矣，吾不識魏公。」曷餉我，揮之去。明日，遽

謝草場等嗚呼其時義子乾兒蒲伏呼九千歲者接跡也彼其人堪辱公唾否耶嗚呼豈易及哉

書金谿兩烈婦紀畧後

兩烈婦為金谿孝廉張君冠王之母故娣姒也皆姓吳氏皆蚤寡奉姑以孝稱順治丙戌冬故中丞揭公重熙起兵襲撫州不克走金谿金聲桓王得仁躡之縱兵大掠兩烈婦踉蹌掖姑出遇遊卒拔刀刼姑驚仆地烈婦遽奪持其刀以身蔽姑呼曰甯殺我卒怒殺烈婦次刼娣娣罵不絕口亦被殺而姑竟得免嗚呼兩烈婦之死烈矣無待區區詩文以傳況張君能致詩文如是之夥又奚藉余言顧其間議論有刺謬者是不可不辨時江鄧吳之言曰兩烈婦之死死於金王之卒而階之厲者實中丞也又曰於家國無所濟而於鄉鄰大有所禍以是為中丞罪嗚呼斯言也決天下後世忠義之防而有意之士為之掩腕案牘泣下而不能止也自古忠臣烈士遭離百六明知事不可為然且逆天命犯首禍慷慨赴之瀕九死而不悔者其心固有所大不忍也人情莫親於父母妻子莫愛於身夫人至捐軀命忍其父母妻子以舉事而又違計成敗利害哉今夫匹夫慕義奮袂而起不旋踵而異快觀望蹈賊而不敢前者則計較利害之念沮之也而謂豪傑之士然乎哉以余所聞中丞公告廟興師破家出走崎嶇江閩萬山中屢蹶屢奮造勢窮力拙計無復之然後以一死謝天下嗚

呼處死如公。亦可告無罪矣。而吳猶云然。鄉人以愛憎為毀譽。固如是哉。如吳言則睢陽之屠。空阮之敗。不能追荼毒生民之罪。而凡史冊所載。媿生苟免。全軀保富貴之徒。皆可自詡明哲。而開門乞降。責君父以求榮者。且得以保境安民論功矣。是烏可哉。是烏可哉。吳才識庸陋。又不曉古文法。其文必不能傳。而是編已有從而附和之者。況於世之以文章名者。其立言可不慎與。

武進三忠合傳

劉熙祚字仲緝。號劬思。世為武進人。天啟甲子。舉於鄉。筮仕得興甯令。以治行徵。思陵召對稱旨。擢監察御史。入臺。忼慨言事。章數十上。尋奉命按楚。歲崇禎十六年也。當此之時。賊張獻忠已陷荊州。臨承天。焚燒陵寢。襄陽再陷。屠斬糜黃。全楚河決魚爛矣。五月。賊陷武昌。乘勝陷岳州。獻忠謀過湖。卜於洞庭神者三。不吉。投玦大詢。欽千艘於湘潭。焚之。遂騎而逼長沙。會熙祚於長沙。聞警投袂起曰。吾按臣也。當急護宗藩。是時親王聞邸於長沙者曰吉藩。聞邸於衡州者曰桂藩。而惠王故邸荊州。荆陷投吉藩。亦在長沙。兩王相對。日涕泣憂賊。顧不知修備。惟堞宮垣。晝夜擊柝。傲巡而已。熙祚急檄總兵尹先民以萬人守羅塘河。孔道貴屯三稍磯。而命推官蔡道憲立柵斷陸道。柵未及成。賊驟至。先民解甲降。道貴走。勢不支。熙祚急護兩王走衡州。

國朝文匯

卷十三

二十三

國學扶輪社印

而長沙臨蔡道憲不屈死。蔡道憲者晉江人。崇禎丁丑進士。賊傳城下。憫之。降道憲。手注弩斃一賊。尋被執。嚼齒大罵。賊怒。磔之。健卒凌國俊九人侍道憲不肯去。賊并殺九人。內四卒奮曰。願冀主骸而死。賊義而許之。四卒解衣裹道憲骨。冀南郭已。乃自剄。熙祚至衡州。賊尋破衡。乃急護惠吉桂三王入永州。賊命拆桂卽殿材入長沙。而親提銳卒追三王於永。熙祚晨朝三王泣且拜曰。永以南非楚境。過此一步。非臣死所矣。臣誓與此城俱碎。王幸自愛。乃遣其中軍護三王入西粵。而已死守。永賊至。森人內聞城陷。賊縛熙祚去。題詩永陽驛。至甯鄉之孔廟被殺。一曰。賊執熙祚檻送獻忠營。熙祚大罵不屈。賊以繩曳足倒拖地。剖腹剗出腸死。烏乎。明季流寇之禍。慘極於親藩。而宗社隨之。當崇禎十四年正月。洛陽陷。福王殞焉。賊薦王於俎。洵其血雜鹿醢飲之。曰。此福祿酒也。同月襄陽陷。賊坐王於堂下。屬以卮酒。曰。吾借王頭使楊嗣昌以臨藩伏法。而襄王殞矣。其後陷南陽。而唐王殞於麒麟閣。陷汝甯。而崇王及世子道陽及陷蘄州。而荆王先以悖死。陷武昌。而楚王為賊執。置所乘輦昇而沈之江以死。楚宗屠戮靡孑遺。其他陪命失國。竄身媮生者。所在見告。蓋自辛巳訖癸未三年間。所稱豫楚十二王。大畧盡矣。其時上相握劍印專征。所在巡撫及諸大帥擁重兵環賊壘。而軍者相望也。無能一紓親王之禍。而熙祚以無兵無將之按臣聞。

關險阻擁護三藩俾道於粵而後以一死身障其衝可謂忠矣議者或以不能死守長沙為熙祚咎誤哉熙祚死明年三月北都陷帝后死國同時以文臣徇節者武進又得二人曰王御史章金主事鉉

王章字漢臣崇禎戊辰進士初令諸暨有惠政臺使者疏調繁改鄞鄞人來逆暨人逐之曰王君我父也鄞何與鄞人爭之力曰王君今我父也暨安得留章兩慰遣之而乘夜啟門壯去治鄞如暨兩邑皆有像以祠久之以卓異徵授工部主事擢陝西道監察御史出巡按甘肅甘故重鎮而邊兵窮困每舉責於弁約十金贖一級亡所得級則殺口外民以償故往往開邊釁而弁得冒功邀賞章知其弊著令寇非大舉不許以零級邀功按甘二年封事凡百八十上崇禎十七年二月差巡視京營當是時流寇李自成已破太原轉畧忻代破甯武宣大等數踵至章奉巡視之命按京營額兵當十一萬有奇除疾疫什一羸弱什二勦畧占役及市偏竄名什四三其所存者四分財一而閏月餼已半載士饑疲不任甲閱視則革筭木薦敝兇整鈍戈幾如兒戲有介而馳者九發不中騎平蹶問之則都司也喟然語同列曰戎事至此尚可為乎吾死是職矣已泣下霑襟會有南歸者索家訖查登筆書曰金晉既殘關門告急臣子不敢復問身家語不及私俄賊入居庸三輔望風瓦解都城簾嚴章與科臣

光時亨分堞城守。三月十九日。賊破彰義門。章猶手發三礮擊賊。時亨踉蹌至。急呼章易服遁。章奮曰。事至此。惟有一死。遂戎服上馬。賊騎自後至。叱呵下馬。時亨遽下馬。蒲伏請降。章策馬走。且厲聲曰。我視兵御史也。孰敢叱賊。賊刺其股墮馬。乃踞地大罵。賊益怒。攢槊刺之。至死罵不絕口。日莫。家人至城上覓其尸。僵坐不仆。張口怒目。勃勃如叱賊狀。以板扉昇之歸。光時亨者。亦進士。方事急時。都御史李邦華密疏請皇太子監國南京。上心動。而一時倡異議。率臺諫閥然起。而詆排邦華者。即時亨也。後以從逆論死。逮南都。并市。

金鉉字伯玉。武進人。而籍於順天。舉鄉試第一。崇禎戊辰成進士。年十九。自以不習吏。請改銓。得揚州教授。內遷國子博士。擢工部主事。是時。上方銳意綜核。命內臣張彝憲總理戶工二部錢糧。敕為彝憲特建署。鉉抗疏。畧曰。皇上御極之始。不旬旬而殛除大慝。至斷也。還埽除之役。杜奸預之漸。至明也。乃不數年。復尋復轍事。權浸重。體統適尊。在外邊境有總監等之總督矣。在內二部新設總理。又躋之部堂矣。皇上誅一忠賢。而今扶植而擁樹者。且不止一忠賢。臣誠至愚。竊所未喻。既而彝憲抑諸司行堂屬禮。鉉又疏言。彝憲妄自尊大。儼然部堂自居。強抑曹郎。夷之屬吏。臣不敢以妄贊皇上之臣。為奔走中貴之臣。亦不忍以七尺讀書之軀。為扶服刑餘之軀。挫

士即拜朝廷所關甚鉅。上怒有旨切責。竊憲聞之意得甚。是日入新署。廟導呵殿如尚書。竊憲闕堂皇。南面據案。黃衫緋衣列侍階下。吏抱文書。雁驚行俟命者。左右數十百人。而曹即無一至者。先是鉉集郎官議。吾曹與總理職事相關。第令掾吏持文往。有一人登竊憲堂。即屬假子。當提吾鞶。夫踢其面。故諸郎官白尚書。先期各以公事出。而竊憲愈且恚甚。曰。此必金主事也。以驗放十六門大器。誣劾鉉。故候軍機。欲殺鉉。尚書力爭之。得削籍歸。後十餘年。起兵部車駕司主事。巡視皇城。與王章視京營。同日拜命。時賊已破大同。而宣府監視則太監杜勳。居庸則太監杜之秩。鉉疏言大同陷。勢且逼宣府。宣府不守。則京城危。撫臣朱之馮忠勇可捍一面。第恐內臣掣肘債事。乞專任撫臣。而急撤宣府居庸內監。不報。賊至宣府。杜勳率鎮將迎降。朱之馮死之。至居庸。杜之秩亦開關降。鉉聞指膺大哭。鉉有弟銓在旁。亦大哭。鉉顧語銓曰。今我與若哭朱公。數日後若旋哭我也。十九日。賊入都城。鉉倉皇歸與母訣曰。從母乞此身殉王事。母曰。汝讀書知大義。今日始向我乞身耶。趣之出。又命僕追往以朝衣隨。鉉趨皇城。見宮女踉蹌出走。喧傳帝崩。又聞王章死城上。失聲曰。唉。芳洲已先我。蓋鉉與章素交厚。約同死。芳洲者。王章號也。遂具衣冠北面再拜。投御河死。僕奔告其母。章氏曰。兒得死所矣。吾命婦。義不可辱。赴井死。妾王氏從之。死。弟銓收殮。

舉號哭三日。亦投井死。初熙祚死湖南時。事甫聞而國亡。未及邀贈諡。南都建。乃追贈熙祚左都御史。諡忠毅。章贈大理卿。諡忠烈。鉉贈太僕少卿。諡忠潔。而忠潔尸沈御河。逾月賊去。求遺骸不可識。家人識其綢環。持歸以衣冠殮。忠毅尸殘於亂兵。惟忠烈以喪歸。祭葬如著令。

邵長蘅曰。予亦武進人也。故知三公特詳劉故著姓。居郡城西偏。相傳地有故柏。因號柏樹劉氏云。金氏世居荆村。王氏世居奔牛鎮。蘇子瞻詩。卧看古堰橫奔牛。是也在邑西數十里。烏乎。甲申之變。天柱崩。地軸仄。畜鳴人頭。豎掃紫極。時中外慷慨仗節者多有。而吾邑乃得三人。偉哉。予為合傳之。今讓明史者有所考。

房景春阮之鈿合傳

房景春。字和滿。江都人。萬曆壬子舉人。崇禎間官房縣令。阮之鈿。不詳其邑里。以薦舉官穀城令。與景春同時。當是時。流賊在鄖襄間者。號十五家。亦稱十三家。張獻忠羅汝才為渠率。獻忠尤桀黠。怵於新敗之降。總理熊某承制。命監軍道張大經受其降。獻忠入據穀城。不肯放兵。謾言曰。予我十萬人餉。為三郡扞圍。三郡鄖襄荆也。熊某者。故多易。好大言。且貪立奇功。遽信之。疏為請銜。給以六月餉。獻忠具軍狀備調遣。然竟不應。而汝才諸家賊。蹂躪黃光隨間。僵尸千里。會總兵左良玉龍在田大破

賊於雙溝斬二千餘級。汝才懼叩太和山提督太監乞降。熊某疏言臣於射華順洞四股主物其餘九股主撫。今汝才已輸誠請赦罪授游擊將軍詔許之。率所部分屯房竹上保四邑。時鄖屬列城灌莽。房縣以景春故稍稍翦荆棘集流移完保聚。汝才依之解甲耕屯。是歲崇禎十一年也。明年五月獻忠反穀城。先是獻忠部賊數掠掠之。細執以告獻忠。始猶稍懲以法。既而掠愈甚。之細數言之曰。縣官自不與餉耳。得餉當自止。穀城下有河。當漢沔滙處。獻忠立關徵稅。月推數千金。軍士於草間得義勇營關防。制府即以給之。獻忠浸驕。制府又檄張大經入穀城護獻忠軍。大經客某得出入幕府。談獻忠于支。當極貴。獻忠心動。反益亟之。細屢開示禍福。獻忠銜之。之細度無可如何。憂憤成疾。累月不視事。及是遂毀城篡囚徒劫庫兵殺傷吏民。之細聞變遽飲鴆未絕。賊突入索印。之細握手不與。賊怒揮刀刃之。奪印去。縱火燔官舍。骸骨為燼。獻忠未反時之細題壁云。讀盡聖賢書籍成此浩然心性。勉哉殺身成仁。無負賢良方正。蓋自知不免云。景春聞獻忠反。度賊必犯房縣。呼其子鳴鑾往覘。汝才為之備。鳴鑾諸生。負忠勇多力而健鬪。賊素憚之。是日馳入汝才營握手語曰。君不念香火盟乎。口血未乾。亡從前。初汝才之乞降也。景春以制府檄單騎往撫。汝才及其黨白晝黑雲祥。啞血盟。故鳴鑾云然。汝才唯唯。鳴鑾見其目數眦曰。是賊叵測。

國朝文匯

卷十三

二十六

甲 集
國學扶輪社印

亟入城與守備楊道選授兵登陴。景春遣間使縋城求援。制府凡十四反。最後以寸
赫蹠刺血書告急。終不報。既而賊大至。獻忠白幟。汝才兵赤幟。俄白與赤交麾其眾。
四面環城攻之。白背黑雲祥策馬呼曰。亟以城讓。我曹保亡它。景春厲聲曰。吾頭可
斷。城不可讓。賊又持張大經檄諭降。景春怒。大罵碎其檄。鳴鑼戰且守。相持五晝夜。
發大礮擊賊多死。賊負版穴城。城將崩。鳴鑼積薪。熱鎔油下灌之。又斬賊前鋒。上天
龍於城下。已又擊獻忠傷足。士氣益奮。而指揮張某故與賊通。開門延之入。城陷。楊
道選巷戰死。景春被執。脅之降。不應。賊先殺同縛者數人。漉血滿前。景春不為動。引
頸受刃。鳴鑼伏父尸。且哭且罵。賊又刃之。至死罵益厲。僕陳宜亦死。同時有主簿朱
邦聞與其家人俱不屈死之。鉅死以五月六日。景春後之鉅二十五日死。事聞。贈太
僕寺卿。建祠。鳴鑼與陳宜並得祀。總理熊某以受賊給太辱。國縋騎逮至都。論棄
市。

論曰。明季寇禍烈已。原其所由。失策在撫。一誤於楊鶴有耀州之撫。再誤於陳奇瑜
有車箱峽之撫。三誤於熊某有穀房之撫。而賊跋燎原。明事卒不可為。已善乎鄒撫
戴東疏畧曰。羅汝才詭占屯部。帶刃以耘。一有勃橈。奮杖而起。張獻忠據邑弄兵。其
人豺狼。萬一兩部俱動。則荆襄之禍。不知所終矣。以臣愚計。賊散則難追。合則易殄。

今猶檻羊牢。獸周陸二三百里內。命理臣率鄆郢之卒。督臣掃關隴之兵。出其不意。可以滅此朝食。不報。嗚呼。謀賊不從。不滅。覆用。誰職其咎哉。予悲二公之死。乃具論焉。又按綴冠紀。畧載章春父子事頗詳。特以房姓為郝。或別有據。姑並著之。

賀向峻汪參傳

賀向峻字葵忱。丹陽之將壘人。甫髫髻。補邑諸生。豪宕負奇氣。好呼盧博塞諸戲。又好客。客日十數人。浮白酣呼。醉則指切時事。罵詈貴人。相與抵掌大笑。以為樂。甲申燕都失守。聞愍帝死。國則痛哭。疊曰。喀出血數升。久之留都擁立。柄國者方營菑直漁聲伎。植朋黨。外則藩鎮擅兵恣睢。向峻知事不可為。益憤憤。居恒切齒曰。賀某奇男子。一腔血竟灑何地。乙酉五月。王師拔金陵。披髮狂走數日。呼汪參。昧首跨兩刀。率壯士十餘人馳去。

汪參字中子。故周鍾門人也。先是參從鍾客京師。會賊入。參和藥進曰。先生負盛名。當死。先生死。亡過今日。鍾謝曰。生幸教我甚善。然實無意引決。參趣之再三。唾曰。吾誤矣。遂易丐者服道歸。向峻遇之逆旅。一見語合。握手約兄弟甚驩。參善馳射。舞稍向峻喜擊劍。每中夜呼起舞。劍槩相摩。鏗然有聲。聞者心掉。時時麻衣繩屨。彷徨草澤間。抵暮相持慟哭。返人目為兩狂生云。去則之大石山。旬日聚眾千人。聚金壇。

破之。會大軍徇江南諸郡縣。向峻為主兵者。畫計策不聽。或勸去之。曰。共舉事。棄之不義。吾與城俱碎耳。兵敗被執。不屈。遂遇害。死時年僅十九。初城破時。汪參跳而免。已稍收其餘卒。復搏戰城外。殺傷過當。參知事不濟。步行拔短刀。手格殺四五人。參亦被重創死。參未死前數月。周鍾以汚偽命逮繫。詔獄論棄市。

贊曰。嗚呼。申酉之際。江左偷安。羣狐柄國。強鎮環列。擁甲以嬉。及乎王師南牧。魚爛獸駭。一夜絕跡。向之憑城社盜。威福者。捧馬足乞哀。肉崩恐後。而慷慨蹈難。至捐脰穴胸不悔者。固兩諸生也。異哉。然吾聞長老家言。同時以諸生死事。貴池則吳應箕。宣城則麻三衡。武進則吳福之。張龍文。崑山則朱集璜。陶爰。長洲則顧所。皆死未三十年。鄉里已鮮能舉其姓氏。而史亦未必與徇節諸臣同傳。悲夫。悲夫。

歐敬竹石士鳳傳

歐敬竹。武進市人也。舌短好大言。無生產。浮寓城南弋橋。為人修破扇。餬口。多得百錢。即獨飲市中。輒大醉。醉後仰面卷舌而歌。市中人皆笑之。甲申三月間。變招鄰人與飲。曰。行與若訣。若盡我一卮酒。其妻提壺適來。睨之笑曰。子休矣。聞舊官皆作新官。又安在子。敬竹曰。姬何知此。而翁所以欲死也。竟闔戶自經死。同時有石士鳳。率石士鳳者。亦武進市人家。貧無妻子。畧識字。有一僕。亦無妻子。歐敬竹死後數日。士

鳳市酒脯祭其先拜且哭哭已邀鄰人與痛飲竟日迨夜潛出戶赴忠義祠池中死忠義祠者故祀宋信國文天祥而姚善陳昭王安節以下十三人配姚陳諸公皆宋末守常州城陷死之語具載宋史及郡邑志士鳳死人無知者比曉其僕踉蹌出號哭於市曰主人死矣覓其尸不得至池旁覓雙屨乃得尸先是士鳳未死時自翦紙為位大書曰明布衣石士鳳之位納之忠義祠位次十三人下又先以三金予其鄰鬻棺者曰世亂吾無用此姑寄汝家士鳳死遂取棺以殮其僕亦終身不娶今尚存邵生曰諸生段堅者為行人也與予善數為予語石士鳳事甚詳其僕堅尚識之亡友董以甯作歐敬竹傳為敬竹死忠義祠池中非也蓋誤合兩人事為一耳嗚呼毘陵當德祐之難嘗以焚死炤應炎以不屈死安節諸人以戰死下至黃冠浮屠皆畢死域內外死者百萬計積骸至井池溝壑皆滿明亡死者乃歐敬竹石士鳳兩人也嗚呼兩人可以不死然竟死嗚呼悲夫

八大山人傳

八大山人者故前明宗室為諸生世居南昌弱冠遭變棄家遁奉新山中雞髮為僧不數年豎拂稱宗師住山二十年從學者常百餘人臨川令胡君亦堂聞其名延之官舍年餘意忽忽不自得遂發狂疾忽大笑忽痛哭竟日一夕裂其浮屠服焚之走

還會城獨身獨伴市肆間常戴布帽曳長領袍履穿踵決拂袖翩跹行市中兒隨觀譁笑人莫識也其姪某識之留止其家久之疾良已山人工書法行楷學大令魯公能自成家狂草頗怪偉亦喜畫水墨芭蕉怪石花竹及蘆雁汀鳥隴然無畫家町畦人得之爭藏弄以為重飲酒不能盡二升然喜飲貧士或市人居沽邀山人飲輒往往飲輒醉醉後墨濡淋漓亦不甚愛惜數往來城外僧舍雖僧串粥之索畫至牽袂捉衿山人不拒也士友或餽遺之亦不辭然貴顯人欲以數金易一石不可得或持綾絹至直受之曰吾以作鞵材以故貴顯人求山人書畫乃反從貧士山僧屠沽兒購之一日忽大書啞字署其門自是對人不交一言然善笑而喜飲益甚或招之飲則縮項撫掌笑聲啞啞然又喜為藏鈎擲陣之戲賭酒勝則笑啞啞數負則奉勝者背笑愈啞啞不可止醉則往往欬歔泣下予客南昌雅慕山人屬北蘭澹公期山人就寺相見至日大風雨予意山人必不出頃之澹公馳寸札曰山人侵早已至予驚喜趣呼筇輿冒雨行相見握手熟視大笑夜宿寺中翦燭談山人癢不自禁輒作手語勢已乃索筆書几上相酬答燭見跋不倦澹公語予山人有詩數卷藏篋中秘不令人見予見山人題畫及他題跋皆古雅間雜以幽澀語不盡可解見與澹公數札極有致如晉人語也山人面微頰豐下而少髭初為僧號雪箇後更號曰人屋曰

驢屋驢曰書年曰瀘漢最後號八大山人云。澹公杭人。為靈巖繼公高足。亦工書能詩。喜與文士交。

贊曰。世多知山人。然竟無知山人者。山人胸次汨淖鬱結。別有不能自解之故。如巨石室泉。如湮絮之遏火。無可如何。乃忽狂忽瘖。隱約玩世。而或者目之曰狂士。曰高人。淺之乎知山人也。哀哉。予與山人宿寺中。夜漏下。雨勢益怒。簷溜潺潺。疾風撼窗扉。四面竹樹怒號。如空山虎豹聲。悽絕幾不成寐。假令山人遇方鳳。謝翱。吳思齊輩。又當相扶攜慟哭至失聲。媿予非其人也。

閻典史傳

閻典史者。名應元。字麗亭。其先浙紹興人也。四世祖某為錦衣校尉。始家北直隸之通州。為通州人。應元起拔吏。官京倉大使。崇禎十四年。遷江陰縣典史。始至有江盜百艘。張幟乘潮。闖入內地。將薄城。而會縣令攝篆旁邑。丞簿選快怖急。男女奔竄。應元帶刀鞭出。躍馬大呼於市曰。好男子。從我殺賊。護家室。一時從者千人。然苦無械。應元又馳竹行呼曰。事急矣。人假一竿。直取諸我。千人者布列江岸。矛若林立。士若堵牆。應元往來馳射。發一矢輒殛一賊。賊連斃者三。氣懾。揚帆去。巡撫狀聞。以欽依都司掌教巡縣尉。得張黃蓋。擁纛前驅。清道而後行。非故事。邑人以為榮。久之。僅循

資還廣東英德縣主簿。而陳明選代為尉。應元以母病未行。亦會國變。挈家僑居邑東之砂山。是歲乙酉五月也。當是時。本朝定鼎。改元二年矣。豫王大軍渡江。金陵降。君臣出走。宏光帝尋被執。分遣員勒及它將畧定東南。郡縣守土吏或降或走。或閉門旅距。攻之輒拔。速者功在漏刻。遲不過旬日。自京口以南。一月間下名城大縣以百數。而江陰以彈丸下邑。死守八十餘日而後下。蓋應元之謀計居多。初薙髮令下。諸生許用德者。以閏六月初。縣明太祖御容明倫堂。率眾拜且哭。士民蛾聚者萬人。欲奉新尉陳明選主城守。明選曰。吾知勇不如閻君。此大事須閻君來。乃夜馳騎往迎。應元。應元投袂起。率家丁四十人。夜馳入城。是時城中兵不滿千。戶裁及萬。又饒無所出。應元至。則料尺籍治樓櫓。令戶出一男子乘城。餘丁傳餐。已乃發前兵備道。曾化龍所製大樂火器貯堞樓。已乃勸輸巨室。令曰。輸不必金。出粟穀帛布及它物者聽。國子上舍程璧首捐二萬五千金。捐者麇集。於是圍城中有大藥三百罌。鉛丸鐵子千石。大礮百。鳥機千張。錢千萬緡。粟麥豆萬石。它酒醑鹽鐵易彙稱是。已乃分城而守。武舉黃畧守東門。把總某守南門。陳明選守西門。應元自守北門。仍徼巡四門。部署甫定。而外圍合。時大軍薄城下者已十萬。列營百數。四面圍數十重。引弓叩射。頗傷城上人。而城上礮礮機弩乘高下。大軍殺傷甚眾。乃架大礮擊城。城垣裂。應元

命用鐵葉裹門板貫鐵絙護之。取空棺寔以土障隙處。又攻北城。北城穿。下令人運一大石塊於城內。更築堅壘。一夜成。會城中矢少。應元乘月黑束橐為人。人竿一燈立牌院間。市城兵士伏垣內。擊鼓叫噪。若將縋城斫營者。大軍驚。矢發如雨。比曉獲矢無算。又遣壯士夜縋城入營。順風縱火。軍亂自蹂踐相殺死者數千。大軍卻離城三里止營。帥劉良佐擁騎至城下。呼曰。吾與閩君雅故。為我語閩君欲相見。應元立城上與語。劉良佐者。故宏光四鎮之一。封廣昌伯。本朝總兵者也。遂語應元。宏光已走江南。無主。君早降。可保富貴。應元曰。某明朝一典史耳。尚知大義。將軍胙土分茅。為國重鎮。不能保障江淮。乃為敵前驅。何面目見吾邑義士民乎。良佐慙退。應元偉軀幹。面蒼黑。微髭。性嚴毅。號令明肅。犯法者鞭笞。貴且不稍寬。然輕財。嘗賜無所怯。傷者手為裹創。死者厚棺殮。酹飯而哭之。與壯士語。必稱好弟兄。不呼名。陳明選寬厚。嘔煦。每巡城。拊循其士卒。相勞苦。或至流涕。故兩人皆能得士心。樂為之死。先是貝勒統軍畧地蘇松者。既連破大郡。濟師來攻。面縛兩降將。城下說降。涕泗交頤。應元罵曰。敗軍之將。被擒不速死。奚喋喋為。又遣人諭令斬四門首事各一人。即撤圍。應元厲聲曰。甯斬吾頭。奈何殺百姓。叱之去。會中秋。給軍民膏月錢。分曹攜具登城痛飲。而許用德製樂府五更轉曲。令善詠者曼聲歌之。歌聲與刁斗笳吹聲相應。竟

三夜罷。貝勒既覘知城中無降意。攻愈急。梯衝死士鎧冑皆鑄鐵刀斧及之。聲鏗然。鋒口為缺。礮聲徹晝夜。百里內地為之震。城中死傷日積。巷哭聲相聞。應元忼慨登陴。意氣自若。旦日大雨如注。至日中有紅光一縷起土橋。直射城西。城俄臨。大軍從煙嵐霧雨中轟擁而上。應元率死士百人馳突巷戰者八所。當殺傷以千數。再啟門。門閉不得出。應元度不免。躍身投前湖水不沒頂。而劉良佐令軍中必欲生致應元。遂被縛。良佐箕踞乾明佛殿。見應元至。躍起持之哭。應元笑曰。何哭事至此。有一死耳。見貝勒挺立不屈。一卒持鎗刺應元貫脰。脰折踏地。日暮擁至西霞禪院。院僧夜聞大呼。速斫我不絕口。俄而寂然。應元死。凡攻守八十一日。大軍圍城者二十四萬。死者六萬七千。巷戰死者又七千。凡損卒七萬五千有奇。城中死者無慮五六萬。屍骸枕藉。街巷皆滿。然竟無一人降者。城破時。陳明選下騎傳戰至。兵備道前被殺。身負重創。手握刀僵立倚壁上。不仆。或曰。闔門投火死。

論曰。尚書序曰。成周既成。遷殷頑民。而後之論者。謂於周則頑民殷則義士。夫跖犬吠堯。鄰女詈人。彼固各為其主。予童時則聞人嘖嘖談閭史事。未能記憶也。後五十年。從友人家見黃晞所為死守孤城狀。乃撫其事而傳之。微夫。應元故明朝一典史也。顧其樹立乃卓卓如是。烏虜可感也哉。

侯方域魏禧傳

侯方域字朝宗。南邱人。祖執蒲。官太常卿。父恂。崇禎間。官戶部尚書。方域既世家子。幼從其父。宦京師。習知中朝事。而於君子小人門戶始終之故。尤熟悉。喜結納名士。與貴池吳應箕。宜興陳貞慧。最善。阮大鍼者。故魏奄義肥。屏居金陵。謀復用。諸名士共為檄。大鍼罪。應箕貞慧主之。大鍼愧且悲。然無可如何。詞知方域與二人者相善也。私念得交侯生。因侯生以交於二人。事當已。乃屬其客陽文耀。方域方域覺之。謝客不與通。而大鍼家有伶一部。以聲伎擅名。能歌所演劇。號燕子箋者。而會諸名士以試事。集金陵。朝宗置酒高會。趣徵阮伶。大鍼心竊喜。立遣伶往。而令他奴誦之。方度曲四座稱善。奴走告。大鍼心益喜。已而抗聲論天下事。其語叫呶。語稍及大鍼。遂戟手罵。詈不絕口。大鍼聞之。乃大怒。而恨三人者尤次骨。後數年。南都擁立。大鍼驟枋用。興大獄。將盡殺黨人。捕貞慧入獄。應箕亡命。方域夜出走。渡揚子。依鎮帥高傑。得免。方域僕寫任俠。使氣。好大言。過人不肖。平面視。然一語合。輒吐出肝肺。譽之不容口。振友之阮。能不恡千金。然亦喜睚眦報復。居鄉時。扞文網。崇禎末。劇寇李自成圍汴急。詔侯洵出督師。援汴。方域進曰。大人受命討賊。廟堂議論牽制。奏請不應。徵調難集。願破文法。以賜劄首誅一甲科令守。而晉帥許定國。師噪當斬。以徇軍事。

解成立疾驅渡河就左良玉於襄陽約陝督孫公傳庭犄角於秦賊乃可圖也恂叱曰是跋扈也小子多言趣遣歸方域既負才名以明經累舉於鄉輒報罷尋邑邑致疾卒年三十有七是歲順治十一年也明季古文辭自嘉隆諸子視為秦漢稍不厭眾望後乃爭矯之而矯之者變逾下明文極敝以訖於亡朝宗始倡韓歐之學於舉世不為之日遂以古文雄視一世末年游吳下將刻集集中文未脫稿者一夕補綴立就人益奇之既歿而文章乃大著初陳貞慧就逮入詔獄鍛鍊久之曾大鉞賊脫歸後十餘年卒於家王師下金陵吳應箕謀起兵被執不屈死方域著有壯悔堂文十卷詩六卷又遺稿一卷校行魏禧稍後出其文章與方域並名於時

魏禧字叔子一字冰叔贛之甯都人其生以天啟甲子後方域六歲然不相識方域既蚤沒而禧名繼起興之埒故世或稱侯魏云禧年十一補邑弟子員試輒冠其曹後十年會甲申之變愍帝死社稷禧聞號慟從博士後日哭臨縣廷居則憤惋叱咤如不欲生謀從曾給事應遠倡義復讐不果已乃謝棄諸生服隱居教授禧負才畧善譬畫理勢修幹微髭目光奕奕射人每事前決成敗懸策而後驗者十常七八方流賊之熾也承平久人不知亂且謂寇遠猝難及禧獨憂甚移家翠微峯居焉翠微峯距甯都四十里四面削起百餘丈中徑折自山根至頂若谷劈然緣坑鑿磴道梯

而登其上。穴如甕口。因直閣為守望。士友稍稍依之。而彭士望林確齋亦至。士望南昌人。字躬菴。遭亂喜結客。立義聲公卿間。與禧立談定交。遂偕林翠妻。子來家。翠微林故南昌宗室子。變姓名為林確齋。世所稱易堂諸子也。其後數年。甯都中寇被屠掠。而翠微獨完。禧既謝諸生。益肆力為古文辭。授徒窮山。弟子著籍者常數十人。喜讀史。尤好左氏傳。及蘇洵。其為文主識議。凌厲雄健。不屑屑撫擬如世之貌似大家者。遇忠孝節烈事。則益感慨激昂。墨盡淋漓。故其所為新樂侯劉文炳傳。及姜珠江天一諸傳。尤工。年四十。乃出游。涉江通淮。游吳越。思益交天下非常之人。聞有隱逸士。不憚千里造訪。於吳門交徐枋。金俊明。西陵交汪灝。乍浦交李天植。常熟交顧祖禹。毘陵交惲日初。楊瑞。方外交樂地。福木。皆遺民也。康熙十七年。詔中外舉博學宏詞。禧亦在舉中。被徵以疾辭。郡太守縣令更督趣就道。不得已。舁疾至南昌。就醫藥。撫軍某疑其詐。以板扉舁之。至門。禧絮被蒙頭臥。稱病篤。乃放歸。後二年赴維揚。故人約舟至儀真。暴心氣病。一夕卒。年五十七。著有文集二十二卷。詩集八卷。左傳經世若干卷。兄祥字善伯。弟禧字和公。並有集行世。

論曰。侯方域魏禧。操行不同。予論次兩家文。乃合傳之。方域才氣踴弛。似陳亮。其遭大獄瀕死。亦似之。然亮猶登第一夕而卒。而方域竟致諸生。悲夫。明宣德中。周文襄

忱薦龔翊為太倉學官。翊辭不就。語人曰。吾仕無害於義。恐負金川門一慟耳。而禧之論。以謂翊一門卒。非有知己之恩。國事之責也。既已歷三朝。身逢賢聖之王。而瞻然不肖少污。其志賢已。嗚呼。禧儻自謂與。

書龔先生事

先生名穆。字孟遠。金邑人。世居新塢鄉之龔巷。隱居躬耕授徒。王文肅公與白康敏公昂皆其弟子。明成化初。文肅以學士歸。候先生。先生方與比鄰通功。桔槔灌田。文肅拱立桔槔下。先生曰。子先入吾室。吾償其功。畢乃歸耳。文肅抵其家。久之。先生歸。文肅拜。先生答以長揖。贈金帛。不受。受其有核。即與文肅通夕對談。晨起。文肅辭。先生曰。曩子有也。吾亦有一肉。出而食之。別去。後推為鄉飲賓。不赴。先生他行事。不概見。予慕其人。殆法高卿漢陰老父儔也。是豈有貧賤富貴在其意中哉。萬曆間。唐太常鶴徵慕邑志。傳先生於隱逸。可謂無愧予同里某君者。粗有文筆。九工擘窠書。國初。客楚大將軍幕府。再致千金。僑居武昌。因家焉。晚益饒於貲。買兩少妾。有賈庫在安陸。聞某君好奇而喜游。所至住住作斗大字勒崖石。題名其後。嘗撫岫嶺禹碑。立石大別巔。又營生壙於大別。自為誌銘。系以詩。其人風流儻曠。亦自可傳。近見邑志。顧列之龔先生後。削名隱逸。非其倫矣。善乎范曄之論逸民曰。蟬蛻翫埃之中。自

致寰區之外。異夫飾智巧以逐浮利者乎。斯言得之。近世巖穴之士。乃以大將軍幕客充隱。可慨夫。

族兄靜山提學哀辭并序

庚午中冬。余自豫章東歸。兄握手語絮絮。不忍別。曰。明年使事竣還里。當訪子青門草堂。余曰諾。今年六月。聞兄歸平湖。遣奴子持一札訂草堂期。報曰。中秋後過毘陵也。八月行盡。余方訝其不至。復附書往。會有傳兄溘遊道山者。余愕未取信。十月朔再遣奴子走平湖。不數日持行狀歸。呼兄真死矣。越明日為十月八日。弔服為位而哭。兄於室禮也。余時病喘兩月餘。氣忡惛僅續如絛。按狀兄歿以閏七月十九日。蓋余附書既未達。而訃又不時至。距兄死蓋七十有九日。而今始得哭。兄嗚呼。悲夫。兄起家順治辛丑進士。官內閣中書。厯戶刑二部郎中。以按察司僉事提學江西。滿考歸里。以疾卒。初官中書時。會滇變起。朝議用兵隴蜀。中書當選一人隨征。同列皆有難色。兄毅然請行。從安西將軍入蜀。重格貝子以兄知兵。令參其軍事。為畫利害。懸決勝敗。輒中。嘗一不用兄策。軍困於蟠龍山。絕糧月餘。將士飢疲無人色。兄意氣自如。有餉羊肉者。笑曰。此人肉也。死生有命。吾不忍啖此。卻之。會援至。得出。靖逆侯張勇鎮鞏昌。召飲帳中。詢平蜀方略。兄左手引卮。右手以箸畫地談戰守機宜。及

蜀中水陸險要扼塞岷峨聽候喜曰經生中有此直邊才也將薦補隴右道缺或
兄之不果嗚呼國家滇黔用兵以來智者効謀勇者効力自卒伍之賤以至市井
屠販推理剝殺亡命之徒往往奮身弄刀稍或樹頭顱微倖取功名富貴過其望者
不可勝數兄以一書生據馬鞭跋履三千餘里崎嶇盤紲鳥道瘴癘虎豹虺蛇鋒鏑
矢鏃死生呼吸之間歷三年之久大帥知其才矣然不獲以功名顯乃僅循資平進
浮沉卽署十餘年迨驛駭擢用而兄死矣嗚呼豈非命哉憶己未余客京師始識兄
相見詢諸系世次同祖康節公又同族姚江為兄弟行則大喜兄時官曹卽獨李于
侍京邸呼之出拜余亦入拜邱嫂於房自是別未幾輒相見乙丑南歸別最久戊辰
余自嶺表還會兄履江右任遂留署中前後閱兩期故余知兄尤深也兄伉爽和易
不治畦畛與人語衝臆而吐然遇意所不可輒面指斥人或難以詼調為諧語刺譏
雖權要人不避也人以此諒兄然亦往往以此嫉兄故宦終不顯在江右名能知人
得士諸生俎豆兄於李空同湯陽家文莊賢侯廣成峒曾蔡忠襄懋德間四公皆前
明視江右學者也論者不以為過讀書務博涉強記詩文濡筆伸紙數百言立就然
不欲筆文士名持論少許可詩推新城王士禎文推甯都魏樞同郡則推朱檢討彝
尊而尤喜余文每得一篇輒咨賞彌日或訾余文太濫笑曰濫處正不易及君非知

文者。嗚呼。兄之知我。乃勝我自知。兄今已死矣。嗚呼。悲夫。兄諱延齡。字靜山。別號耐軒。卒年五十有七。又聞李子翼以哀毀致疾。後兩月亦卒。翼字汝為。力學攻文章。曩侍兄京邸者也。嗚呼。天道慘酷。胡至斯極耶。將買舟力疾往。會兄喪。思所以弔余哀者。乃為楚音以當哭。其辭曰。

隴阪崎嶇。水鳴咽些。蜀山巖峯巖巖。盡不見日些。猿狖吟嘯。虎豹慄些。封豕長蛇。薦吞食些。君胡來思。激忠肝些。書生投筆。逐戎旃些。人肉為醢。骨為薪些。入虎穴幸而得全些。嗟哉。數奇。獨苦辛些。偃仰郎署。逾十年些。九江五老。迎使車些。清秋日。水晶縣玉壺些。歸來兮。即君之新居些。華軒突宇。網戶朱些。砥室鬆几。陳詩書些。胡為乎舍此而逝。曾不留叶些。去歲別君。在南浦些。朔風飛霰。雜以雨些。余祛君裾。離思苦些。今歲扁舟。登君堂些。像設塵筵。素幃張些。呼君不應。涕泗滂些。總幃綵綵。兮。鐙青笑。嗚呼。哀哉。兮。何以為情。

國朝文匯甲集目錄

卷十四

錢陸燦

字湘賓號圓沙江蘇常熟人順治丁酉舉人有楓蓮齋集

天游子集序

曲水村莊記

太湖汎月圖記

宗之府君家傳

言貞女傳

明故秀才吳去見墓誌銘

陳廷敬

字子端號說巖山西澤州人順治戊戌進士官至大學士諡文貞有午亭集

李善感諫封禪論

贈靜明子序

張子潛詩序

老姥掌游記

郭先生逸事記

一

一

三

三

五

七

九

九

十

十

十一

甲

集

記女奴景事

十二

旭白韓君傳

十二

廖氏傳

十三

翰林編修汪鈍翁墓誌銘

十四

監察御史陸君墓誌銘

十六

故永從令張君行谷墓誌銘

二十

熊賜履

字敬修一字素九湖北孝感人順治戊戌進士官至大學士諡文忠有易齋集

荆南墨農全集序

二十二

默默軒記

二十二

張伯明先生殉難紀畧

二十三

毛際可

字會侯號鵲洲浙江遂安人順治戊戌進士官河南彰德府推官有安序堂文鈔

趙簪論

二十五

泊庵說

二十五

雲間燕集序

二十六

歲寒堂文集序

二十六

孫字台文集序

二十七

峽源瀑布記

二十七

蔡忠烈公廟碑

二十八

汪總制公逸事狀

二十九

張貞生

字幹臣號晉山江西廬陵人順治戊戌進士官翰林院侍講學士有庸書

桂巖集序

三十一

國學生退庵方公墓誌銘

三十一

曾王孫

字道扶浙江秀水人順治戊戌進士官四川按察使司僉事有清風堂集

送王都御史撫楚序

三十三

讀惠民錄書後

三十三

海豐縣知縣杜公墓誌銘

三十四

國朝文匯甲集卷十四

天游子集序

錢陸燾

天游子者。祝氏諱萬齡。字萬仙。君之別號也。其世籍浙金華之蘭谿縣。其家於虞也。授經徒子三十六年。以儒為醫四十餘年。年五十六卒於康熙九年。今二十六年矣。庚戌已前。余交游揚州金陵間。與君不相聞問。老而歸里。則君已前死於余為尚論之友。而無由讀其詩書。而知其世也。一子孝恭。醫世其業。捧持其父所著作曰萍鄉雜俎。廸說諸書。請是正於余。因得為難艾其中冗穢。定為二百餘則。而以其所作詩甚少。而工附焉。凡五卷。俾孝恭繕寫天游子集序之。索君之書。想見君之為人。蓋古篤行君子學道人也。言規行矩。著為勸戒。周情孔思。則在篇帙。其於書無不讀。引經據史。疏文闡意。往往斷之以天游子一段。以示竊取之意。玩其辭旨。將欲以醇醖之化。反當今而為住古。嗚呼。何其端憂而憫俗也。然余尤窺其學道有得。其論次聖賢。皆涵養其無私之體為樂。故君亦自言俯仰山水。花枝月影。雲牕竹戶間。靜坐則凝塵蔽榻。妙氣來宅。出行則南垞北汜。酒帘茗旗。皆有悠優自得於胸中者。幾不復與外物相關矣。此其所以天游子自號也。孝恭曰。先君於書無不讀。尤粹於莊子。金剛經。皆有註解。本藏於家。是已。夫天游何取乎。即取之莊子逍遙遊首篇。其遊之發端。

也。今夫世人之游野馬也。塵埃也。蜩與鸞鳩也。則君固以六月息而圖南。其說在乎大宗師篇之論游。曰。聖人游於物之不得遊而皆存意。而子以為游於菴而許由曰。不然。庸詎知夫造物者之不息我黥而補我劓。此之謂游。是游是者。不聞人之天。而聞天之天。尻輪神馬。鼠肝蟲臂。一也。反是。則胥易技係而已矣。醫卷槍囊而已矣。然則君豈更駕哉。少而儒。長而醫。足不出鄉閭。名不挂仕籍。棄世則無累。無累則正平。因其據其所自得於天游者。託諸筆墨。以自見。金剛經曰。應無所住而生其心。夫無所住之心。即與天游之心也。君不更駕。君豈更註金剛莊子哉。即金剛莊子註君此書。則君至今在也。余又告孝恭曰。蘭溪之祝多異人。康熙丁巳年。余遇君家子堅仙翁於常州。論文鍊藥者累月。亦云有族人在虞山。余無以應。余送子堅歸蘭溪。詩曰。多年不讀華佗傳。此地忽逢倉海君。子堅約過虞山相訪。并訪族故。又曰。上靈洞口白雲出。烏目山前紅鶴迎。今子堅又十七年別久不至。而如先公之好學善著書者。又不得見余。則以先公為吾尚論之友。徒恃其書在耳。復何以益吾子。吾子之先有祝賢者。學養生曰。若牧羊然。視其後者而鞭之。吾子勿以已養。而以傳先人之書。以傳先人為養。母謂先人久矣。驅羊入金華山去也。勉之哉。是為序。

曲水村莊記

曲水村莊去奚浦故墅里許。而瀕於江。吾弟國子生東表所居也。大江自京口而下。至暨陽城。至福山鎮。環其東南。暨陽已下隸散邑。兩江口一鹿園。一奚浦也。自我始祖千一公之六世兄鏞居鹿園。弟珍居奚浦。皆以江口入潮為其墅。先奚浦墅最盛。故老相傳。南市口北店巷。人居攢簇。漁鹽輻輳。鹿園不如也。不知何年奚浦市廢。今所見甃梁階城基跡累累。吾家烏程應天科名綽楔尚存。而曲水村之去墅里許。則自柳溪竹深二公兄弟別營其第宅故也。竹深之後徙於城。而柳溪至今擅奚浦以為家。柳溪七世則我宗之府君。益大其業焉。以曲水名其村者。義何居。余嘗案其江口鹿園之水。其入之勢也。直不一里而為鎮。而奚浦不然。其港口既窄且深。又斜而複。迎水之入。則已數為其曲折。編蒲抽柳以記其漲縮之痕。故村落散於其曲水之上。而吾家之業特著。府君合分眾離。用樹丕基。異居諸子。而東表得曲水。愈益繕完塗墍。坐其為莊也。若深有意乎曲水之意。而自以其意思規度而成就之。巷之啟也。際其濬也。戶之闢也。迺其狀也。街之除也。巡其行也。牆垣之曲而周。依其濬也。前後堂屋之次第高下。隨其演迤而升降也。村安乎水。而莊安乎村。而凡居民散在曲水之上者。皆以我東表為司命。乃吾窺東表之意。常若有缺然不自足者。我自通十府君珍為奚浦之別子。柳溪克篤前烈。以有此甯宇。吾當奉我先君。敬承其基緒。柳溪

偏其堂曰振德曰甯善楊長史翥記之曰一門百口庭無閒言東西七十里無爭訟焉左右百餘家無凍餒焉夫柳溪之德與善如是斯有以大啟我先君以蔭及於余其何敢忘諸於是東表大為之堂落其成而額之曰柳蔭遂矩其堂之右高殺修之二層以為閣東表讀書其中以聽濤名之閣瀕於江白晝而望濤之形則固邛然足以駭矣而獨又取乎聽吾又窺東表之意固必有適然其自得者當其靜夜擁鐙歸神曰母而忽而有感乎吾之耳而忽而有合乎吾之心深溉胸中灑練五臟記濤之氣又聞於師者似神而非夫固有所合之閣之下架石栽花各以其時蜚空英芳媚客而勸酬此皆先府君位置手澤也堂之左闢為書室將以底吾子若孫延師讀書記以代古者左右閤塾之制其後則為寢堂溫室良奧之地不為綺疏簾額一切鏗米韞威悉準朝典如先世約法綜敘莊之前後其地多茂林修竹清流映帶凡曲水之曲砂渾至是而清石潭至是而渟或碧而空或飀而汲或寬而接或激而溝之而苗以溉或灑其餘而蔬以灌瓜以實或盆而沼之而荷以擎要莫不於曲水乎取之壯之主人顧而笑曰此皆先府君釣游憩息地也夫人世廢興何常靜則為三月三日流觴之致動則為八月望日諸侯之觀吾猶是水矣因屬其八十翁老兄為之記則吾又窺東表之意擴景物諧地勢固已詳於美川八景石田之圖與宮保之詩篇惟

汲汲柳溪已來之流風餘韻及府君平生蹤跡魂魄猶樂思此當書以俟我後之人
不迷其世云爾陵煒遂以其意書為記

太湖汎月圖記

太湖汎月圖客為吳子柳亭圖也。吳氏父子家世讀書好古為洞庭山人其父亦昭
君隱居不仕而柳亭年方壯待詔國子先亦昭顏其所游憩之舫曰月山行柳亭思
其親而有是圖也若曰山之行也必不離於湖將以月夜汎於湖旁其父所游憩
之處云爾今見於圖者一小舫繫柳黃葉紅之岸蘆荻稍稍不見尾見舟子中為若
席兩重燭檠研几掩映蓬牕一童子吹鑪火坐船頭把盃東面者不問知其人為柳
亭也古貌道裝露頂散襟帶東面則紙上空地渺瀰涵洞沈浸諸山莫非湖也湖之
上下邊傍莫非湖也則亦莫非月也柳亭東望望此記如是止矣余曩嘗從葉子
聞周其人知其鄉隱君子亦昭而恨不一至洞庭訪亦昭而登月山行之畫舫今柳
亭茲舫之製其即亦昭公之製之舫歟然似無可著月山行三字之額其無過削其
底之闊者十之七縮其板之修者十之五六而殺其人之怡愛與行廚之具者十之
三四歟故其詞不以行而以汎行也者生地渡水之勢也飛鳥空直之路也汎則在
子汎汎若水中之鳧杜甫信宿漁人還汎汎之汎也行則東南出三江口而西北則

賢界夫椒二次之間無所不之焉。汎則不離於湖。而不止於湖。如候潮馬。如待客馬。蓋皇皇乎具有所思也。意者柳亭之思其親。而如望其歸者歟。太湖廣五百里。羣峯出於波濤之上。凡山之得湧。屏列於湖之濱者。無不挾湖以為勝。故亦昭言山不兼湖。柳亭言湖不兼山。而湖山之行止。必不能無待於月。蓋山與湖千古嘗在。而月則不能無晦朔弦望之不齊。薄食疊珥。乖雲變氣之怪異。山水常在。而月有時而無也。昔者行。今者止。昔者步步事後之思。此夕茫茫月下之悲也。余之記是圖也。事在圖外。而意在圖中者也。杜子美登兗州城樓之作。思其父。閨官司馬於此。而公來趨庭。日落句曰。孤嶂秦碑在。荒城魯殿餘。託懷古以思其父也。柳亭睹水上之茫茫。月照今而不復照古。把盃而問其為孤嶂荒城之悲。又何如。雖然。無柳亭之思其親。則已耳。如柳亭之思其親。月又何夕而無也哉。此可以告天下之凡為人子者。其不徒為一夕之清游勝賞而已故記。

宗之府君家傳

府君宗之公。諱上述。錢氏常熟邑西北區之奚浦里人。奚浦與祿園相去二里而遙。在西北最荒僻。對堯江口。錢氏子孫乃興。他姓不在此族焉。錢之祖武肅王十二世。千一公。轉通州而渡江。為海虞之祖。四世都官公。生二子。長曰通九公。鑄居祿園里。

為祿園之祖。次曰通十公珍。居美浦里。為美浦之祖。公通十公後也。此祿園美浦之分也。自通十公之子祥五公子。曰柳溪。為竹深公洪。兄弟知名。為景泰十才子之二。詳宮保列朝詩集小序中。竹深則宮保之六世祖。而柳溪則公之七世祖也。此又美浦支竹深柳溪之分也。竹深之後。大行公憲副公宮保公世最貴。而柳溪之後。則烏程令學。學第庠。尤以儒素壹行遺其子孫。常居故墟。事先疇人。謂竹深柳溪之食報功名。各有厚薄。其於人事。則稱先世之意也。均。故號曰美浦錢。自通十之作美浦。凡七世。至公之父景山公。景山之世。兩逢大災。陶復陶穴。風餐露息。鮮有甯宇。而公道生。蓋公之繼母許出也。公任戴冠。見其家以射策申科起。攻苦文字。罔晝夜。學。曾有景山公之喪。門戶倚仗。賦役磨札。幾不得近筆硯。公歎曰。天運則然。夫吾才固有所用之矣。按公以早歲廢儒。廢儒業也。而不廢儒行。其才亦有他儒所不逮者。故燦細致公行狀。以符於曩所見聞。而書其大者。教孝教友。敦睦姻任卹。載在周禮司徒。鄭注曰。善於父母為孝。善於兄弟為友。親於九族為睦。親於外親為姻。信於友為任。振憂貧為恤。此六者。公則備之矣。書公之孝。即公自遺景山公以至許孺人之世。送往事居。治喪治祭。四方觀禮。抑又善體父母之心以為心。蓋公前母楊孺人出伯氏。萃美公也。而同母出為子超公。先是景山公新柳溪公之舊第為一宅。公首以讓。

伯氏景山公則已遺別構一宅公與子超公並居也公即又讓子超許孺人晚而事佛公無不先意以承飯僧鄧尉孺人慨然於山徑之崎嶇計甃石必三百金而可公曰惟母命其諸施舍皆如之書公之友則不惟以宅讓其兄與弟而已卒其子超二公前後以訟蔓其費公捍之如頭目然豐官私之通所償皆如之凡弟且耽且豫者六十年無一言憾及已而撫厥諸孤皆如之書公之睦燦有從叔宜甫公久下第而家日落且通官也公以甘金出諸囚燦有從叔靖甫端甫相繼殞併不克葬父母也公卜地助之一日禮其六棺其諸疏族景伯初陽生則衣食死則殯殮皆如之書公之嫻如辛卯之春葬黃孺人之父若母黨者千人費無所訾省其諸賻急內外家之族皆如之書公之任重然許謹交際鄉城之友或訪公於其家或以文墨游於諸子者至必流連款洽茗酒慰藉別必贖貽稠疊緩急稱情冬窮歲除乞貸者趾相錯不以無為解不以數為嫌至有故人病不能出者必緘金為衣褐貲以余所見殷某龐某瞿某皆如之書公之恤美浦故南沙縣地臨塘負江驚濤怒秋則有潏順治八年是也坎脈厥塞則有旱順治十八年是也流人望食以公家為歸傾圉設粥以為常其諸死者枕籍撈撈無算其輕財好施事皆如之或曰子之件繫公行事然也然惟公之才有以致之昔先王之制禮也本出於人情之所同然人人而孝友睦婣任恤

故觀於鄉而知王道之易也。夫惟範其才于禮耳。禮之盛衰世之升降也。當公之世猶有急公之旌焉。猶有賓筵之請焉。歿公之身。無訟牘連染。無蜚語媒禍。花時月夕擊牲開筵。有承平王孫故態。或曰公儒也。近于俠然。鄒魯間彬彬實行君子。正如是公為人體裁持重。眉宇軒豁。其與人樸易而鯁諤。其教子如其人。子皆養和柔教。有聞於太學。子亮邑諸生。前卒別見孝孫傳。

陸燦論曰。公壽六十時。余有序引陸游為會稽五雲陳氏老傳。而自歎先世本魯墟農家。祥符間去而仕。二百年竟無人得歸故業。竹深之後。科第蟬聯鼎食。徙而城居。而柳溪之後有公。獨世其業於奚浦里。故奚浦之錢得比五雲。而為務觀所歎羨無疑。雖然。如公者。平生急病讓夷。助縣官活生人。其於國家本末之間何如也。今太平盛際。方以周禮之治治天下。其所謂尸祝社稷者。必自公始。將表其閭。就其家。而訪遺書焉。乃若蘊義生風。謂八廚以財救人。而俎豆公於度尚。張邈諸人間。則公猶不屑矣。

言貞女傳

貞女言氏。蘇州府常熟文學里人。飲賓愚之孫。茂才福之子。子游夫子之七十世孫。七歲諾為同縣張鑽之妻。鑽蚤孤游學在遠。不知其所終。貞女諾張。又六十一年。守

節於父兄之家卒。貞女未諾張已喪其母鞠氏而茂才義不再娶茂才三子一女子嫁錢氏踰年夫卒寡節以老。一男子郡學生恂如。又一女子則貞女也因其叔母蘇氏以活而朝夕起居在飲賓茂才所代郡學君郡學君得恂於讀厥祖父慶女紅之隙跪受教孝經小學四子列女傳。闢翻倒背與郡學君參語貫串其義而尤長於禮郡學君既娶雞鳴盟稱奉其嫂以朝於祖父厥祖父慶當是時貞女雖一遺母喪然為女於祖父之手其正也貞也者正也比及笄而歸不歸雖然謠曰死矣夫游無方不可知矣又踰時不歸張之宗黨請嫁貞女茂才意未定貞女欲衽拜堂下曰大人前顧未以兒身諾張氏歟兒聞之禮十五許嫁而笄許嫁笄而禮之因著纓鄭注云纓以明有所繫也然則兒之踰於笄而纓之期也久矣吾祖之吊自夏曾子不當指以示人曰夫夫也為習於禮者乎兒禮宗之女也夫女子未聞以身許人之道然未聞有違其父以身許人之道則益未聞有順其父以身再許人之道曾子曰女未廟見而死孔子謂歸葬於女氏之黨示不成婦也未成婦則不繫於夫而仍繫於父母兄弟之家夫已嫁矣以未逮三月廟見之期而死猶得繫於女氏之黨則如兒之未嫁而笄而纓者不可知乎而張氏隨啖始來貞女誓曰張之死矣夫游無方不可知吾甯忍急於鬼其夫乎即鬼其夫不得繫此身於張獨不得繫此身於言氏之黨乎

不亦亡於禮者之禮乎。截髮泣三日而茂才之意始許。而張氏之望始絕。其姊之寡居於錢者。聞之歎曰。善哉。吾妹之不忍絕縷於張也。而妾甯不忍磨笄而死於錢乎。於是姊妹相許為師友。貞女於是謂其家之人曰。女子之嫁人者。移其父母之孝。孝其舅姑。吾之不獲歸於張。且張之舅姑無復在者。自今以往之年。則當移其舅姑之孝。孝於父母。而痛吾母之又不在此。凡內則所載。所以適父母舅姑之所者云何。其在父母舅姑之所者云何。其父母舅姑席鄉社。趾衣衾。簞席枕几。杖屨敦弁。扃匱之屬。一器一事。進退惟祇飭者云何。貞女一一致之於其祖父。皆代郡學於學。而祖父命人代之。貞女弗欲。而姑與之。而姑使之。而後復之。一一以其身為禮經。貞女蓋曰。吾祖父之笄吾而著纓也。明有所繫。而不得繫也。則不得不退。而自繫於女之竇。女之竇所當專盡於祖父者如是而已。貞女既代兄而奉其嫂。以朝於祖父。於是又謂其家之人曰。女子之不得嫁於人者。移其舅姑之孝。孝於其父母。而痛吾母之不在也。又傷吾姊之盡節於錢。不得歸也。自今以往之年。則當推其父母之孝。孝於吾之元兄與巨嫂。事郡學君如父。事嫂金氏如母。郡學君方與諸名士。蒞禮編詩。掉鞅文學。家計不一嘗省。貞女奉其嫂朝於祖父。退而無攸遂具。如孟子之母所云婦人之禮者。皆代其嫂。機杼軋軋。刀尺琅然。不倦益勤。里之婦童而為夜作。居無何。有兄之

我儼然諸子女掃地亦骨立泣而慰其嫂無憂諸子女婚嫁倚辦於姑之十指出其
所與郡學君貴事經義課諸子讀諸子書而為善人為良士今之請傳其姑者廉與
游於吾門者時昌皆其遺教也貞女蓋曰吾祖父之并吾而者纓也吾兄知之明有
所繫而不得繫也則不得不多所繫於女之實女之實所當兼盡於兄嫂子姪者如
是而已案貞女之專盡於祖父與兼盡於兄嫂凡繫於祖父兄嫂之香而自盡其女
之實六十八歲而卒其貞也如此凡貞女前後所降夫亡母喪已又喪其祖父兄送
往事居悽愴板蕩變之變也變而不失其正貞也者正也非徒以女子之十年不字
故貞之也云爾順治十八年張御史某按吳給粟帛獎其門擬上於朝不果康熙
二十二年重修邑志前高侯士鶴謬推陸燦領其事書貞女未能詳也至是廉來請
為其傳遂敘次其事以告於閭史俾天下後世知子游之學之澤不替於其家即女
子有如此者而亦豈非吾邑乘之光如后妃之德冠二南者哉

贊曰凡貞女之為極難備於易卦為坤初六履霜堅冰已兆所天傾而虞淵墜也自
時厥後錯綜用六或直方大或含章或括囊黃裳故得出歿於龍戰元黃之血有相
之道謹謹奉其衣褐弄瓦無非無儀之身全受全歸於乎嫩矣昔聖人之於坤也卒
又繫之辭曰用六利永貞蓋戒其變也變而不失其貞者謂能立乎六之外而用六

則雖其遭時處會不合元亨。而自坤之乾利貞全矣。如貞女者。手輯綱常。則如武城之紱。踐更事變。則如褐襲之裘。豈徒聞禮而已。蓋進乎道者。夫子而在。共姜紀叔姬。豈足錄哉。

明故秀才吳去見墓誌銘

在昔崇禎年。余與吳去見定交。以氣誼聞東南。既而讀書曹莊之里。晨夕靡間。酒後戲言曰。百年之內。我兩人誰最後死者。墓中一片石。勿落他人手。嗚呼。去見前死。死而葬。後廿餘年。余乃得稍知古文字法。追理墜言。謹援筆而補誌。君之墓。君諱杰。字去見。江陰名家子。世居曹莊。以甯監先生為父。以終宮詹文貞為外祖。甯監少有雋才。補博士弟子。文貞未第時。見而器之。以第四女女焉。甯監從文貞遊。好讀書。取友不好治生。夫人亦謹伺文貞意。相其夫子。不屑屑問田舍。以故家中落。連舉五丈夫子。乳媪之履。慨相藉也。夫人實以鍼指佐百需。又數年。而五丈夫子俱就外傳。去見其長君也。十二歲學為文。呈文貞。文貞顧甯監而喜曰。是兒成我宅相者。且非獨舉子業也。吾觀其文章。夙慧而有老筆。當以古文雁行。歐蘇子隆就孺子第。記吾言勿忘。比文貞遭僉禍。考死詔獄。去見才束髮。侍其母夫人。日夜啼哭。已而歎曰。楊子幼讀其外祖司馬遷太史公記。因作為春秋。以材能稱。今寶園不有遺書在。乎。寶園

者。大負讀書處也。告其母夫人。請退自閑一室。雖誦苦吟。蓋寒夜篝燈。布帷中晷。至納足於氈。以違蠶室。其精勤如此。業已告成。兩試院童子科。江陰常熟俱高等。而常熟報先至。遂為常熟諸生。當是時。吾郡二張先生倡明古學。八股引用五經說。無旁剿。楊子常顧麟士兩先生篤信傳注。講背語氣頭訖。去見才高學博。參伍東虞山而出之。所著時藝。膾炙吳中。詩義尤專門名家。麟士定為近體第一。去見之為諸生年十七耳。甯臨家益落甚。去見傷其父之窮。旦暮思欲以科目自奮。若不能轉漏侍者。以故癸酉一試不當。遂乃坎壈失職。幾以謂已矣。國亡。人莫我知也。余與讀窮當益堅。大才當晚成。二語稍為援据。罕壁龔其有以自廣。去見遂訂甲戌讀書之約。相與督課如嚴師。甯臨竊聽。余兩人讀甚歡。典衣酒家。以需夜酌。然去見傷其父之窮。日益甚。仰天歎。憂生憾世。意墨墨不自得。顧時扁舟載書吏往來吳越間。與其名家豪傑交遊。而余亦應趙月潭太史之聘。乙亥從梁溪往還。便道必先過其家。飲酒論文。信宿極歡。然後去。丙子余舉經明入都。廷對。五月還金陵。就試京兆場前。亟問訊去見。從友人所致尺牘中。得詩二首。有垂老身名猶繫戀。未成毛羽尚盤桓。家貧況值親垂老。舌敝應知氣亦寒。等句。余固已悲其流落不耦。而駭其不用吾言自寬。佗倅壹鬱。壽命不得長也。余歸而去。見果病體中小極。顧猶執手牀前。慰勞無恙外。

以麟士不得終場為恨已而泣曰世卒莫我知吾終無所指指鄭重屬望予而別數日計至年二十有三嗚呼去見以圖史為精神以朋友為性命以性理經濟之學為根本所著詩騷序記雜文數卷俱條理可觀若天假歲月吾見其進未見而止而惜乎中道夭竟不驗文貞之言嗚呼可哀也有金元亮亮臣者與余同日補常州府諸生介以友去見當是時舉文字大雲社於香山此三人為莫逆交亮臣居徐市去余家河陽五里而近曹莊則七里而迷一二日急足走問訊已儲昔酒待徐市河陽常來宿留而去居無何去見死不數年亮臣又死余以吾妻徐氏女去見之子亮臣無子抱伯氏女則以余第七弟耀為之壻皆兩君身後事追而汴之墓草久宿其骨已朽惟吾筆尚在庶幾恃以不死兩君而余文傳不傳又未可知追銘去見亮臣得附著亦王荊公表征處士之例而余尤不勝其哀焉去見生於萬曆四十二年甲寅七月卒於崇禎九年丙子九月其冬權厝於盛塘祖塋之次娶夫人秦氏守節二十年亦卒一子燁即余所妻以徐氏女者撫於祖幼孤寡獨力田以養其親真孝有父風孫某某燁出銘曰

盛塘之庵香山里君讀書時花始蕊其東數武鬱佳城瘞君於此秋葉零焉君詩文送律庫轉輪藏中人天護銘辭但書歲甲子鶴者今威龍者耳

李善感諫封禪論

陳廷敬

唐高宗既封泰山。欲偏封五嶽。作奉天宮於嵩山南。監察御史襄行李善感諫。史稱自褚遂良韓瑗之死。以言為諱。無敢逆意直諫。幾二十年。及善感始諫。天下皆喜。謂之鳴鳳朝陽。嘗讀歐陽文忠公書。有云。事柔闇之君。言人主則易。言大臣則難。蓋謂勢之所在。雖人主有時而獨輕。而進言者必貴攻其所難。而後可以反其極重之勢。此諫者之則也。高宗之世。勢不在人主。大臣而在中宮。方是時。言人主大臣則易。言後宮則難。言其難。幸而見從。則宗社之福。不幸不見用。如褚韓輩。然後可以與於輕重之數。而不媿乎忠諫之名。言其易。雖舉天下之事。極比而毛剔之。猶無益也。何也。非其勢之所急也。而況其一枝一節之硜硜者哉。善感之言。既美矣。而愚猶以為未盡也。當高宗惑溺武后。武后竊弄國柄。前有言者上官儀。後有言者郝處俊。若儀處俊者。可謂言其所難者矣。此兩人所言。皆在褚韓死後。而史謂二十年無敢有逆意直諫者。何與。記曰。君子表微。況儀處俊所建白。尤皎皎在人。都記者乎。而善感顧獨蒙美名。世之畢智竭忠。盡力於所事。而名不彰顯於世者。豈真有幸有不幸耶。

贈靜明子序

余行天下。見磊落權奇之士。其人皆超然高舉。不能與世近。顧余獨慕好其人。其人

亦脩然翩然引而余近也。比居里中。與時俗相偃仰。有客過予而笑問之。向者夫子接塵而游。不肯耽偷懦。習熟見蠅營蟻殍者。思掉頭脫去。故所求與游。大半皆權奇高舉之士。今則為纖人頑夫之行。雉媒之翳。以求龍友。宜厯落俊邁非常之人。去夫子而不顧也。余嗒然無以應。久之訪舊游於里中。靜明子居環堵之室。鍵戶觀物。蓋與世絕不通者。壯而且老矣。今年已八十。道日以高。守日以固。益落落不與世通。余欲越肝度陌。契闊相存。追憶向者班荆畫灰之語。為雞豚田社之游。而邈然不可遂得。回念客之言是也。甚矣哉。余之僂也夫。居無何。靜明之子從余游。致其父之言曰。老人非好為固也。辱夫子之知。今老矣。不可以俯仰於時。以辱夫子。夫子有意於老人。其贈之以言乎。雖然。余何以贈之。嘗記靜明子少時。英姿曩儻。經奇男子也。影塵鈎瑣。身事感迫。斂其輪囷陸離之才。潛摭載籍。儒墨道德陰陽名法六家之書。抉摘鈎稽。得於心而適於用也。若數甲乙而傾度篋也。而尤精於律歷之學。立術數揆儀度。觀璇機之運。審三光之行。推前校往。協律正紀。授民時而成歲功。與新法卷合而考晰。麻元綜校分度。其說尤為精密。蓋其龍挫七曜。探索三垣。重黎羲和者流。而甘石二家所取衷也。豈猶夫兔園村夫子咿唔一卷書。以自號為儒哉。靜明子自開闢以來。掃除所習故學。而獨好黃老之書。箋注道德經。其大指如太史公所云六家

之弊曰。神太用則竭。形太勞則敝。故剝務先定其神。而獨以道家為宗。嵇叔夜曰。非淵靜者不能閑止。老子曰。知止不殆。經言能慮能得。而本之定靜。靜明子具有道丈人也與哉。夫道則吾不知。余知靜明子深於律麻者也。麻家測圭景。察經宿。睇視弦。望晦朔。光魄虧盈。以定其符驗。皆可得而見者。孟子以為千歲之日。至可坐而知也。夫何以斗二十一度去極至遠矣。日在焉而冬至。而羣物於是乎生焉。此其可見而不可見者。存夫黃鐘萬事之根。而律首焉。冬至萬物之初。而麻始焉。此其不可見而天下之可見者。莫大乎是。推之至於先月建子。時平夜半。天地貞觀。日月貞明。天下之動自夫一者。靜明子於天地人之道。必有以窺其微矣。他日余將毀闢撤垣。造膝而問焉。毋徒使客謂余不能得天下奇士。漠然相視而笑也。

張子潛詩序

余年弱冠在翰林。是時故司寇東谷白公在位。以耆儒長德。賓接後進。研鑽文學。余摠衣捧手侍公。相見促數。公每稱吾邦邑之賢。以相淬礪。余益始知陽城有詩人張子潛其人云。公嘗語余。子潛初困阨。鬻豆腐于市中。無書藉筆札。從鄰人借得書。流觀掩卷。不更尋誦。若夙生所記。手畫心溫。精魂奔會。當其得意。茅店孤燈。蟻輪馬磨。踣躅行吟。甕牖堵牆。歌聲出金石。市兒俗子。莫不烘笑。已而又言。老人愛其門前芝。

草鹿麋田之句。故別字之曰麋田。後五年。余休沐而歸。求觀其詩。如登海岱之舶。如入五都之市。珠璣犀貝。無有不具。姑以其所為業。推類而喻之。如玉禾之露。而澹旨圓潔也。如蘭有珍饌。齊和華錯。而氣馨色腴。崑山之脯。元圃之藟。讓其濡潤豐美也。迨求其人。而邈乎遠乎。不可即也。後二十年餘。余倦游而歸。子潛擔簦負笈。見余于樊川之上。而詩愈益工。蓋不以余之離流世故。思維風塵。而猶謂其可比于知言之數也。乃子潛歸。而經涉旬月。袖其新詩盈卷。自名曰喜見吟者。過以眎余。余受簡疾。讀分陰移晷。膝席絮語。歎其法備味永。芳外惠中。有加曩昔。至所云喜見者。非他人則余也。夫余也。何足以當之。住者曹郎鄭君。見黃公黎洲而悅之。名其集曰寒村見黃景。自序陳後山年三十有一。見黃豫州盡棄其學。而學焉。寒村子見黎洲。亦年三十有一。遂以見黃自名其集。黃公遺老宿儒。倡道于浙東。寒村子之以名其文也。非直以其文之謂也。余白首廢學。而子潛亦華顛窮老。方負其雋辭麗句。以見余為喜。誠出而交游天下之士。如黃公其人者。見其所未見。其所為喜。當益有進焉。雖然。余嘉其志。不以為媿。而樂道之。為喜見吟序。

老姥掌游記

上黨南三百里。有山曰方山。又南十五里曰洞陽山。又南十五里曰樊山。上黨地形

郭先生逸事記

郭先生文雄字鳴上。文水人。居太原。為諸生。以高選貢於國學。奇才多逸氣。不事家
人生業。恥與俗伍。喜交遊四方賢。偽名流。時以其意寄之於酒。東鄰有王生好高論。

嗜酒俗人見輒避去郭先生獨喜與之游王生擁背數千金種秫歲釀酒數百石兩人閉門高飲閒醒則吟誦書詩以自娛樂與世人絕不復通順治中余年十七省試於太原是歲試人多至滿林屋別編葦蓬以居余適居蓬中與郭先生交膝坐心異其人既散明日郭先生携王生載酒過余又三年余再試於鄉至則獨見王生主其家郭先生為選人於京師蓋至是王生貧且盡初郭先生意多所忤蕭然寄食於玉生王生傾囊倒廩以奉郭先生歡郭先生安之余嘗見世人居室雖親兄弟以幾微有無見於顏色或操戈構鬪甚塗人者不可計數今兩人友耳王生盡貧無恙郭先生受而安之是皆有不可及者余由是益異之其後郭先生為令於崑山王生適過之郭先生為令清念王生義不得忘以千金為王生母壽王生揮其金不顧曰君為廉吏而以千金贈我是况我也義當與君絕王生拂衣去遊太行山谷間時時過余家郭先生為吏自苦無何死於官無妻子崑山人憐之葬之縣中山原之上送葬者數萬人號呼聞咽街衢至葬所不絕起塚立祠其傍吏民歌思之至今不衰王生後為小吏於南方過余言曰吾不能折腰牛馬間竟棄去不顧郭先生生而無室家獨以其生平所得施於吏民朱仲卿所謂桐鄉民愛我詎不信與郭先生無妻子即使返葬視朱公言後世子孫奉當我不如桐鄉民其意尤堪悲夫既生才矣而困苦折

辱之。使之無以為家。而託命於友生。非王生之高義。郭先生將遂偃蹇以死。不得至於為吏。既為吏矣。且死無以為葬。而崑山人葬而祠祭之。久而歌思之。若是則造物者之果無意於斯人耶。抑亦郭先生之懷才奮義。有以自致之。而然耶。王生有子。余覘其皆能有所成立。王生雖貧以老。而不靳其後。天之果非無意於斯人也。故世之人。有如郭先生之所遇者。視其為吏。可以彊為善也已。吏部侍郎徐公果亭。崑山人也。語及郭先生。使余記其軼事。以王生之賢。故牽連書之。王生清源人。名鼎若。郭先生之善政遺愛在崑山者。崑山人述之。今不備書也。

記女奴景事

女奴景。贊夫柴乙。皆從予京師。乙病。景輿以歸。及家而乙死。既瘞。景時節哭瘞所。虎銜飯來。熟晚。景哭極。底不見虎。樵人遙見呼景。景近虎尺許。虎卒不傷也。其家諸柴數逼。景嫁。不從。朝夕虐酷之。居二年。人或益不堪。謂當以告吾家。景曰。吾居主家久。主嘗不預外人事。吾某氏人。豈以吾事累主耶。諸柴愈勾。勾僕同將奪之。景乘夜奔。訴之縣。道遇虎。當路。景趨過虎傍。虎臥如故。景抵邑門。坐守至天明。開門。趨縣庭。號訴。縣令哀其情。召諸柴數而筆之。後令行案境中。景遮道訴。又數而筆之。愈筆。虎愈慘。景非死無所之矣。乃念乙死時。言主家遇我厚。我死終不能報主人恩。甚恨之。

景於是提攜其九歲女。六歲男。泣涕匍匐。乞食野宿。走京師。行五閱月而達。計程二千里。中多峻山大水。水潦秋方盛。深及要腹以上。景凡涉水。則先負一兒抵岸。再返負其一兒。日數涉。涉幾死者數矣。蓋其艱如此。至之日。家人以告子。詢之言歷歷。感其事。不禁泫然泣下。左右觀者無不皆泣。女奴傲者耳。義所不責。而能卓然自立。使人感動如此。此豈非出於其至性者耶。夫士大夫之行。其大於此不可為量數。而能如景之出萬死一生而不愛者誰哉。或曰。景習於主家。蓋道誼所熏染也。夫士大夫豈無載藉師友耶。而忠孝節烈之行。往往存於椎魯僕婢。至義足以馴猛獸。誠足以濟生死。百世之下。將有聞而興起者。豈以其微顯異哉。故傳其事。庸以告天下之為士君子者。

旭白韓君傳

韓氏其先魏王琦。家在相州。宋亂。相州數被兵。國子祭酒曰永寶始遷洪洞。當其時。洪洞之韓。累數世不仕。然皆屈首受詩書。尤精黃岐之學。能以業其家。所活人大多。功蓋與古之良相者侔。洪洞之人曰。真韓王裔孫也。前明成化中。以進士起家。累官戶部尚書。曰文有直聲。最後抗章梟劉瑾罪。武宗驚泣為不食。瑾矯旨奪尚書官。下詔獄。瑾誅。復尚書。嘉靖初。數薦不起。進太子太保。賜誥褒美。卒贈太傅。諡忠定。忠定

公子士聰高唐知州。士奇刑部主事。皆以瑾故奪官。于是韓氏始大顯名于時矣。君諱光曉。字旭白。高唐公五世孫。祖汝松。家齊用素饒。不省計。喜施。至靡財。單幣。洪洞人謂韓氏世有其德。父承寵。濟南同知。敦樸謹愿。能繼父志。不屑以財自雄。然時以其留餘稍稍用。鹽筴才足給食指。遂移其家津門。在濟南既不樂仕宦。解其官。歸曰。吾韓氏世有德于洪洞。吾其可遠先人之廬墓。且洪洞人愛我。吾必歸。歸次曲陽。無疾而卒。君時獨從。哀號路側。過者酸鼻。既歸葬。會京東兵。君母亢留張灣。及於難。君卒遭變。執喪行古制。雖士大夫習禮者。莫能過焉。濟南公二子。君其季。與伯氏異母。君母亢安人。初亢氏善富貴。亢之來歸也。豐其食。金累數萬。濟南公曰。李亢之自出也。金必歸季。後君皆以金歸伯氏。里中貧賤素怨伯氏。訟伯氏欺其孤。君曰。我固以讓吾兄。由是訟者大屈。君事兄如嚴父。侍兄之子如己子。人高其行。化漸于鄉焉。君嘗為博士弟子員。新立名譽。如孀者矜其能。將遺書督學使者。使黜君。然其人陽與君交。驢僮奴數數來。奴誤謂遺君者。遂以書抵君。君視書。嘿然。語奴非遺我也。奴持書去。後君竟用是黜。君終不語家人以故。妒者後覺之。大漸恚。曰。吾傷長者無面目自活。其意度行事多此類。封文林郎。娶亢氏。封孺人。子象起。主事。象起初為福山令。有異政。

陳子曰。今人爲其父母傳者。直以爲誌表之餘事耳。豈真能和文字之可貴哉。夫人不皆有奇德卓行。故傳者尤往往難之。象起之求傳。其親獨異焉。曰。誌以納諸幽。表以揭其外。然而不皆可行。世致遠也。於傳乎是重。敢以煩公。余見今戶部尚書福山王公。嘗數稱福山之政有異。王韓婚也。故語韓事有足徵。及退而考其家世。奇德卓行。果皆可傳也。是以敘著于篇。嗚呼。韓君之賢。知文字之可貴如此。而大司農謂韓君曰。今之名能文而可爲子先人傳者。陳子也。夫王公擇人而使爲文。則福山之爲政。其得于鄉邑賢大夫也。有由然矣。

廖氏傳

嘗觀建文廟遺事。未嘗不掩卷欷歔。至成祖殺方孝孺。連引九族。則又不禁瞋目豎髮。恚恨其所爲。今三百年。一時忠臣烈士。事多湮滅無傳。余在吏局。搜羅散失。苟幸得之。則喜以悲。而況得見其子孫苗裔耶。廖永忠。巢縣人。楚國公永安弟。有功太祖。時封德慶侯。子權嗣。封孫銘鑄。受學孝孺。孝孺被禍。禁勿得收其屍。銘鑄兄弟獨往。慟哭收葬之。成祖怒。戍之金山。余既載其事。後見廖生鳳徵文。奇其人。請與居二年。矣。不知其巢縣子孫也。生之言曰。金山距松江百里瀕海。子孫世襲指揮千戶。明之末年。鳳徵之祖某。知天下將亂。金山軍民並處。且有變。移家之松江。清兵南伐。衛

堅守不下。積屍與城堞等。兵乃躍上城。伯相某於城樓上手格數人。與其長子某皆自刎死。次子某亦歸。遺散其家人。自焚親屬二十餘口。還刎父屍傍以死。鳳徵之祖以郡居弗及於難。搆屋申浦之南。教子孫以農賈為業。國初徵領旗軍子弟為運漕千總。戒勿住。今雲間廖無二姓。皆果縣裔也。今吾乃知生烈士之子孫。而益歎慕其先有當稱述者。或以節死。或以見幾去。其致命遂志者為忠義。臣潔身遠害以教其子孫。可謂賢人君子矣。吾獨惜其名字皆失而不可求也。故為記其略如此。

翰林編修汪鈍翁墓誌銘

康熙二十九年十二月十日。翰林編修汪先生琬卒。明年其學者為狀。以其孤書幣走京師。乞銘於其友人陳廷敬曰。先生治命也。公母辭。予是以不辭而銘。先生字若文。又字鈍庵。晚而天下學者皆稱曰鈍翁云。順治中。廷敬在翰林。太宗伯端毅龔公以能詩接後進。先生與今宰相合肥李公天馥。今戶部侍郎新城王公士正。吏部郎中潁州劉公體仁。監察御史長洲董公文驥。及海內名能詩之士。後來先會。顧予亦以詩受知龔公。日與諸子相見於詞場。先生初見予詩。大驚。語新城曰。此公異人也。蓋是時予年踰弱冠矣。先生雖以詩與諸公游。實已歸然攬古文魁柄。自立標望。抗前行而排後勁。噉鋒踏堅。騰蹕萬夫之上。予既感先生知己之言。又方年少志銳。雅

不樂以詩人自命。至是始學爲文。先生又語人曰。我國以爲異人也。龔公既歿。諸子或散去。或留。其後先生以戶部主事病免。歸長洲。廷敬嘗侍

上禁中。問今能爲古文者誰與。輒舉先生以對。先生方臥。堯峰不肯起。學者又皆稱堯峰先生。王公以戶部郎中召見。懋勤殿曰。廷敬與俱來。各以所爲詩來。既進。見退。留臣問士正學行。明日改翰林侍讀。自是

上銳意嚮用文學之士矣。詔舉博學鴻儒。廷敬遂奏疏薦先生。兵部尚書宋公德宜亦別爲疏。同日以薦。而余以母夫人憂去京師。有司敦迫先生以來。竇康熙十七年也。明年詔試。

上親拔其文。授翰林編修。與修明史。先生既以道德文章爲己任。由是有側目之者。益思歸故山。在史館六十日。撰史彙百七十五篇。杜門稱疾者一年。以病免而歸。歸十年而卒。年六十有七。始先生以孤童自奮讀書。一目能五行俱下。盡三遍不忘。順治十一年。經魁其鄉。明年舉進士。時進士觀政於諸曹。先生以二甲得通政。未幾假而歸。研古纂辭。一掃絕今文陋跡。嘗慨然念前明隆萬以後。古文道喪。沿溯宋元以上。唐韓柳宋歐蘇。近明之唐應德王道思。歸熙甫諸家。蓋追宗正派。而廓清其夾雜不醇者。卓然思起百數十年文運之衰。此先生之志也。自戶部福建司主事。分司大通。

橋歲滿進雲南司員外。尋改刑部河南司。遷山東司郎中。以例降北城兵馬司指揮。轉戶部山西司主事。選權江甯西新倉。還而歸卧堯峰也。凡職事之餘。觴詠之次。無時不以古文自娛。而四方賢士大夫。苟知文之可貴。求為金石鏤刻傳敘之作。以示後裔。附不朽者。惟先生是歸。先生由文見道。務為經世有用之學。故向所歷京朝官。及一再分司。皆有名蹟可稱紀。為刑部郎時。河南巡按御史。覆奏部民張潮兒手格殺其族兄生員三春。罪當死。詔法司核議。先生以潮兒母先為三春所殺。宜下御史復訊。為復讐論。引律文祖父母父母被殺。而子孫擅殺行凶人者。杖六十。又引罪人本犯應死而擅殺者。杖一百為據。他疑獄必援經附律。務毋枉縱。降而為兵馬指揮也。不變易剛直。閭學某公欲并其鄰人居。會鄰人之母自經死。閭學欲因以重其罪。巡城御史故閭學所取士也。以之屬先生。先生卒辨其枉誣。閭學怒。必欲置鄰人於理。先生毅然爭於同官。同官欲上聞。事乃得解。旗人與民事。縛民至司。其黨數十人。皆偃仰卧踞廳事中。官出視事。岸然屹不動。先生舉手讓衆人。厲聲言曲在民。當盡法。若曲在旗。敢厲民乎。卒直民而懲旗人。關壯繆廟道士弟子。為人所殺。無主名。禱於神。神告以夢。鞠一瞽者。得其情。其人匿西山中。雜建徒黨。與督索之。遂正厥辜。道路死暴尸者。親為收瘞。答治奸民之以假命噬人者。懲豪家奴以勢凌貧人者。

當任滿且去。空北城民炷香於道。提酒漿送者。填溢階巷。當道大官呼殿至者。擠塞不得行。問之曰。民送兵馬司也。兵馬司秩卑而職冗。士大夫左官於此。往往偃蹇不屑其事。故前此無得民心。至去時請留遺愛。如先生者也。及再入戶部。部設左右餉司。先生在左司。尚書王公宏祚以郎拜侍郎。晉秩正卿。故嘗物色諸郎。推重先生曰。君異日當繼此席也。先生亦感王公言。盡心郎事。勾校歲年存貯錢糧。得移文十四司及右司。會戶科都給事中姚君文然疏言。夏稅以五六月。秋糧以九十月。請下部察糧項。果足充一季兵餉。則緩徵實便。於是先生大集諸司。窮日夜會計。得存貯銀二百四十萬兩有奇。以復於王公曰。兵餉可以無虞。而緩徵可行矣。退而緝其遺意。撰為兵餉一覽。書成。朝議格不行。書置篋衍中。先生曰。異日有為緩徵之政者。吾書可取而視也。議民輸糧加漕。贈外五米十銀。為官收官兌法。而旗弁之橫息。議裁吳三桂兵餉。以充國用。而強藩之勢沮。其端皆以先生發之。分司於北。則條議三閤及車河利弊數事。分司於南。則上其羨餘金如千。一皆洗手。蒞事有潔清名。世徒目先生為文章之士。豈知其施於用者。卓卓自持。守樹立有如此哉。先生性狷介。雖交游天下賢人文士。而庸眾人往往不悅其所為。而深中者尤忌畏之。以故自登仕籍。前後退而閑居者二十餘年。雖其不合於流俗。亦先生泊然有以自樂於中也。自史職

歸也。曰：尤手一編書，窮年矻矻，若為諸生攻苦者。客問之曰：吾老猶冀有所得也。四方賢士從遊請業者，曰：益眾。為設科以誨之，使學者悠然以得，快然以解。如春風時雨也。世有知先生所張設於時者，如彼。豈知其歸而老也，以其所自得使人各得其所得，有如此哉？以先生之才，所施於隱見之際者，於世賢豪之士，不無缺望。而先生之所自得者，固亦已厚矣。惟

上重念文學砥行之儒，嘗論本朝人物，首稱數先生，則先生之所以自得者，亦不可謂徒然已矣。予自踰弱冠，與先生游，既數年而別，別而復合。又別十年而先生歿。始終之際，先生惓惓於予者，是豈可漠然忘於心也哉？先生先世徽州人，明初葉遷蘇州，隸衛官籍。曾大父禧，萬歷丙子舉人，贈中大夫江西右參政。大父起鵬，贈參政公。第三子有文名，父膺天啟丁卯舉人，贈奉政大夫刑部郎中。妣徐，贈宜人。先生喪父，方十有一齡，家貧自立，為世大儒賢矣哉！子男五人，長筠，諸生。次衡，殤。次是樞，監生。次穀，詒。廩膳生。次景，蘇場女四人，皆嫁士人。其學者，顧君希喆，實為狀賢而有文者也。銘曰：

生不憂卑顯，且顛仕以行樂否已焉。退斯進學文乃傳，惟汪夫子僉謂然。五湖欽心，嶽嶽賢斗杓所建。四氣旋漢津海梁，迴狂瀾霧縈披抉光晶穿。末流俗學相賞緣，取

青姬白子所懷遺經獨抱老愈專。迥如一手障百川。生徒婉孌相後先。宗麟集翼風氣還。天長地極元會殘。斯文不沒星芒寒。鄙夫斯寬薄者敦。光我銘石永不鐫。

監察御史陸君墓誌銘

余聞靈壽令陸君廉且賢。清苑令邵君廉而剛。將皆屬于朝。或謂余剛者易折。且多怨恐。及公余應之曰。果賢與。雖折且怨。庸何傷。于是具疏草袖中。將上會。

上御宮門。急召九卿舉廉吏。既進。升階未盡一級。

上獨目廷敬。班定又數目。若詔使言者。蓋是時余侍臬掌都察院左都御史事。以進言為職。又嘗數薦人以故。數目廷敬使言。自念班下六卿。既未承明詔。欲以次對。六卿有言他守令。廉語未竟。

上乃問臣廷敬廉者果為誰。臣奏言陸隴其邵嗣堯皆天下清官。雖治狀不同。其廉則一已。而兩人皆擢為御史。未幾陸君以言事去職。卒于家。其門人張子雲章排繒君行實。問銘于余。按君以理學聞于世。其于學術是非邪正之辨。有宜識其大者。顧余薦君以廉吏。而君以學術為政事。今以余所聞在官之事。實之張子所為狀。而學術邪正之辨。亦由是以著明焉。君蓋仕為蘇之嘉定令。嘉定大邑。賦多俗侈。掣格于上下。素稱難理。君夙潔清自勵。守約持儉。至是苦節堅操。屹不可動。上官嚴憚之境。

內肅然甯輯。任時令饋遺上官。動以千百。君歲時一起。居通書問而已。吏之宿猾隸卒之叫罵。得里閭者。皆絕迹屏息。然黠民無敢復鬪訟。不逾年而化理清平。尸有樂生之風。民戴君如父母焉。君不事刑威。專用德化。而民畏愛之。邑有某甲橫行里中。里中人患苦之。先是數數以利啗令長恃以無賊。至是知君不可動。則求君故人為之游說。君遇故人。氣夷語和。談讌極歡。察其言涉甲事。則變容易色。客竟不得申其語。會甲僕奪薪者婦。被訴而僕匿甲家。君發吏捕之。且趣駕自往。甲皇遽出僕。寘之法。甲以是膽落。遂折節改悔。卒為善人。民有訟于者。君曰。我無德化民。以至斯也。對之泣下。民父子亦泣。子號咷請罪。掖其父歸。而善事焉。有弟以盜訟兄者。君廉知其弟婦翁所導也。杖數之曰。為子壻計。乃忍斷其手足耶。兄弟皆感泣。好如初。蓋君以德化民。而民化之如此。俗多惡少。聚黨毆擊。君責其尤者。校於衢。出入誠視。察其色悔而釋之。其黨悉解散去。邑之興廢以千數。君諭之曰。若輩事我無所賴。盍易業自謀生乎。眾皆感泣去。而歸農。有依戀不忍去者。然公之任鄉閭。不見吏胥。民有宗族爭者。則以其族長逮之。鄉里爭者。則以其鄉耆逮之。又有自追牌。則兩造要而來。不煩吏也。徵糧用掛比法。多者書其名以俟比。而及數者自歸。又立甘限法。令民以今限之不足。而倍輸于後。民甘心焉。一士人經月無所輸。君視其舊籍曰。是非故逋賦。

者詢之以新遭憂也。卒不呼而糧辦。舊有行杖錢日數千緡。自君不事敲朴。而正供外。民不費一錢矣。嘉定產米少。歲額白糧常糴之鄰境。價高下由人。緣為奸利。君為平糴定價。民以不病。自餘雜派悉除之。民得休養。益輸將惟恐後。為令之明年。軍興徵餉十萬。君自度必以不辦免。乃出令謂不戀一官。願無益于爾民。而有害于急公。于是戶給一縣官名刺。勸以大義。民爭先輸。不匝月而十萬之數具足。君生日。遠近民扶老携稚。填塞縣道。取諸神祠中燭架列堂上。燃燭焚香。羅拜堂下。煙燭徹天。父老有百歲者。詣前願一識令君。曰。自我為民。不知幾甲子矣。未見有如今君者也。而為仕者或不悅。會徵市肆錢。奉行者濫及村舍。君報徵止于市肆。于是上官劾君。謂清絕一塵材。非肆應。部議降調。嘉定民罷市。日相率號巡撫門。巡撫不自安。為請復君官。章未下。又以盜案落職。盜案者。甲與乙訟。甲遇盜傷而歸。語其弟曰。乙殺我。言訖而絕。甲弟訴于君。君視乙非殺人者。以實報。上官謂仇盜未可遽定。無何捕得真盜七人。獄上部議。以初不直指為盜。坐諱盜例革職。君曰。邑有盜。長吏固宜有罪。民間之空邑。詣督撫為辨。莫之省。民既知不可留。則架材結絲。戶設香案。人持辦香號泣以送。或負粟豆及他物來獻。君不受。有委之而去者。即嘗所憊父者。或謂有再造恩。亦不自知涕泗之何從也。民刻木為位。旌幢鼓吹迎歸。以祠。旃檀之氣溢于道路。

經月不散。君自莅嘉定。不事刑威。而民畏愛者。不憚鄭重而敘述之。誠有感於凡吏者之皆宜然。而無貴以擊斷為能也。其在嘉定也。蔚州魏公象樞為詩盛稱之。及魏公為都御史。抗章言隴其不宜罷。又疏舉廉吏十人。以君為首。得還職。為真定靈壽縣。靈壽土瘠民貧。役繁而俗薄。君勸課耕耨。以盡地力。請于上官。與鄰縣更役。以蘇民困。省除公費。以養民財。貽書邑縉紳。變陋俗。以端風尚。反覆曉譬。化關狠輕生之習。其為民厚生正德。若謀其子弟也。尤申明鄉約。鄉長保甲地方之制。謂此周禮比閭族黨之遺意。所以美風俗而遏奸宄盜賊之源也。請之上官。重其任。俾各專其職。功罪有歸。無牽連推諉之弊。其舉鄉約。必擇知文義行端慤者。親為講解。孝弟睦婣之訓。使之教于鄉。規條備具。巡撫于公成龍下。其法行之他郡縣。且訪民利病于君。君條六事上之。曰。請緩征。曰。勸墾荒。曰。興水利。曰。廣積穀。曰。存留宜酌。曰。番丁不宜溢額。謂自古稅斂。必俟極穡登場。今正月開徵。民間尚未播種也。且四方甯謐。司農不至告匱。可通融總計。以上年撥剩之銀。暫抵今年春夏之餉。俟秋成催解。以補庫額。無損國賦。而民力以舒。先之畿輔。推及天下。興唐虞三代之政。此其首務也。其五條皆具有法則。得其人皆可實見諸行事。在靈壽七年。徵入京師。去之日。民號泣攀轅。一如去嘉定時。君吏治之績如此。此廷敬之所為以君對也。授四川道監察御史。

湖廣巡撫于養志有父喪。督臣請在任守制。下廷議未決。君上疏謂治天下不可不以孝在任守制。非所以致孝也。天下當承平之時。湖廣非用兵之地。其人非賢耶。固不當使之在任。誠賢耶。則必不肯在任守制。使之解任全孝。正所以深愛惜之。若使因督臣題請而留。皆將援此為例。其不思僥倖奪情者鮮矣。名教自此而弛。綱常自此而壞。疏入。養志解任。又疏言捐納縣令。賢愚錯雜。特立保舉法以防之。近并保舉亦得捐納。則賢否全無可憑。夫保舉莫重于清廉。若保舉可以捐納。則清廉二字亦不可捐納而得也。不待辨而知其不可矣。臣竊怪近日督撫于捐納之員。有遲至數年既不保舉。又不參劾。不知此等果清廉乎。非清廉乎。即在清濁之間。然既以捐納出身。又不能發憤自勵。則其志趣卑陋可知。使之久居人上。不僅貽患小民。亦且上干天和。竊以為不但保舉之捐納。急當停止。而保舉之限期更當酌定。乞勅部察捐納之員。到任三年。而無保舉者。即行開缺。令其休致。庶吏治可清。選途可疏。時陳御史請停保舉。而開先用之例。君再疏請速停保舉之捐。永開先用之例。謂捐納先用之人。皆奔競躁進。故多一先用。即多一害民之人。又申言三年開缺之請。詞加激切。奉旨同往會議。又議言捐納一途。惟恃保舉以防其弊。今併此而捐之。且待次年三月停止。此輩有不捐納者乎。澄敘官方之大典。蕩然掃地矣。此臣請停保舉之

捐不得謂無容議者也。議者或以三年無保舉。即行休致為太刻。夫此輩原係白下捐納得官。踞于民上者。三年亦已甚矣。況休致在家。儼然縉紳。為榮多矣。即云設立限期。反生營求。此在督撫不賢。則誠有之。臣不敢謂天下必無賢明督撫也。此臣請定保舉限期一議。不得謂無容議者也。時有謂捐納所以給軍需。欲坐以遲悞之律。擬革職奉天安插。聖恩寬厚。且察知無他。俾仍舊職。以是年秋改調歸。君自以身在言路。指陳無隱。有所獻納。宿齋豫戒。

上每聽其言。以為與朕意合。及累陳捐納事。

聖明洞鑒其誠。惻而嫉之者眾矣。及罷言路。歸後二年。因簡賢臣視學政江南。

上又獨念君欲起用之。而君已不能侍矣。觀

上之所以知君。與君之所以獲

上之知者。不可謂非天下之厚幸也。雖不究其用。而一時端人正士。感發奮興。爭思

有所樹立。以答

主知而裨國事。其于世道人心所關者。豈非以君之故。而有所激厲也哉。君既屏居洲水之上。布衣蔬食。益以明道覺世為己任。而天不慙遺。竟以康熙三十一年十二月十七日。啟手足矣。距生之時。前明崇禎五年十月十一日。得年六十有三。娶朱氏。

子二人。長定徵。早世。次宸徵。女二人。夫學以致用。余件繫君治行。不厭其煩細者。將使後之學者。任民社國家之責。有所取法焉。君充養完粹。夷然氣清。溫然色和。居常必肅衣冠。端作止靜。正而不拘。安詳而不放。事無巨細。處之必以誠。人無親疏。接之不見其情。酬酢紛紜。未嘗不整以暇。踐履篤實。不以論說爲先。而發之于言。書之于冊者。無非仁義中正之旨。所著三魚堂文集。問學錄。增刪四書大全。松陽講義諸書。其得于心身而措之事物者。可考鏡其源流本末矣。君諱隴。其字稼書。原名龍。有所引避。改今名。唐宰相宣公之後。居嘉興府平湖縣華亭鄉。陸氏自宣公以來。世以文獻爲吳越間族望。宋季有諱正者。世稱靖獻先生。入元再徵不起。靖獻之曾孫宗季。明永樂末。以賢良辟至京。奏對仁宗稱旨。屬疾辭職。賜鈔幣還。正統中。傾其家以活饑者。有詔旌門曰尚義。子珪。出粟活人尤多。景泰中。賜爵迪功郎。迪功之孫溥。任豐城尉。嘗督運夜過采石。舟漏。仰天跪而祝曰。此舟中粒米非法。願與江魚之腹漏旋止。及旦視其鱗。有三魚。覆水行塞之。人咸以爲神。豐城之子東築堂泖口。顏曰三魚。君著書仍三魚堂之名者。志世德也。泖口即今所居華亭鄉。自東之遷。五傳而至君。大父諱德。父諱元。皆諸生。以文學行義名于邑中。祖妣李氏。妣鍾氏。曹氏。君既仕。封其父文林郎。妣皆贈孺人。生君者曹孺人也。君生而粹清。端居寡言笑。經史上口。

輒成誦既長慨然以古聖賢人為必可師法不為科舉奪志講學授徒非義不取新
然自立年二十七補邑弟子員食餼又十年舉于鄉又四年而成進士其令嘉定則
康熙十四年也在靈壽七年為言官一年計君前後仕不過十年而其所建立如此
此余之所謂廉而賢者也銘曰

天地之大敦化川流清任與和或剛或柔雖聖難兼往路徂修苟正其趨而亡險阨
若通康莊我馬不墊周行載馳循途乃至偉哉英賢軒後較前跂予望之如山不蹙
如江如河赴彼九淵天下善士士皆知之我銘君藏敢為我私曾吐薦口忍緘厥詞
故永從令張君行谷墓誌銘

故永從令張君諱子廷字願卿其家在太行山谷間之郭峪故一字行谷太行西來
幾萬里至陽城迤南百里斬然而盡如化城蜃樓列嶂北向郭峪在其中謂之鎮郭
峪方三四里各倚山巖麓為離落相保聚或間百步或數十步林木交枝炊烟相接
自前明至今官侍郎巡撫翰林臺省監司守令者嘗相續不絕於時蓋近二百年所
矣顧郭氏今無聞而張氏其先獨歸然以科目顯曰好爵嘉靖某科進士戶部主事
曰好古嘉靖癸未科進士四川按察司僉事摧折權貴真聲著聞曰以漸萬曆癸卯
科舉人景州知州僉事公君之高祖也考西園公諱多學邑庠生耆年長德立行教

子鄉黨宗焉。君順治辛卯科舉人。己亥科進士。性直亮。刻厲學問。長于十歲。予兄事之。平居侃侃自矜重。予每謂君之才如此。又名家子。當有所樹立。坐仕為貴州黎平府永從縣知縣。南荒深昧之區。日以益聞。此天地之運使然。亦必賴世有賢人君子。能變其舊俗。與之維新。雖蠻獠窮鄉。使異類為君子。故君之所以施於永從。及永從之人。所以報君者。不過區區百里之間。而其效可垂之百世。風勵天下。不可沒也。黎平以永樂十一年始置府。永從以正統七年始置縣。縣逼湖廣四川雲南之介。山谷巖峻。雜苗分族而處。俗凶獷。不知禮義。飲食言語。與中土不相通。耕沙磧溪淖。以自食。輸糴布為租。唐宋以前。羈縻而已。君至。則身歷山峒間。親為誦說。朝廷設官化民之至意。於是始以中土之法治之。延師儒。立黨塾。未幾而絃誦之聲。響應溪峒矣。常平倉制未設也。歲饑。則苗民皆竄去。賦既不辦。而縣隸役皆遠。偃他郡邑及滇蜀人。君設倉庾。積貯逾年。得數千石。仿義倉之法。時其斂散。於是雖凶歲。苗民恃以不饑。苗俗昧婚禮。世傳鬼竿跳月之陋。君憫焉。置官媒。聘幣有額。民便樂之。月吉讀法。諄復感人。爭者願息。久則雙殺閭閻之氣。以銷民俗浸變。而縣以大治。署雍安。如治永從。去雍安。民攀號不忍舍去。嗚呼。若此者。可以觀民情矣。彼貪饕殘忍者。據百里之地。日取其人。而刀俎之雖其境在中土。禮義素所漸摩。風俗素稱朴厚。而使

其人怨讟並興。嗷呼狂走。而曾不之悔。謂民實負我。不可化誨。夫民果負我哉。又誰則不可化誨者也。抑治其民不張君若耳。使君得一郡若一州。或不在蠻獠邊徼之地。其所樹立。當又何如哉。君之治行見於為令者。僅若此為可惜已。滇中之亂。脇大府遇害。永從孤城不可守。君攜縣印。跣行匿山峒間。旬日不得食。苗民跡君所在。銅鼓巖進裨來食君。求得君家人。悉以送君所。夫當顛沛流離之際。而苗民之不忘其恩如此。彼中土之民。平居無事。而嗷呼狂走。豈其禮義之漸摩。風俗之朴厚。其性習反有異於蠻獠邊徼之人乎。是尤可為太息者也。未幾叛者平。君竟無害。攜印詣軍門陳情。父年老願歸事。比歸。家人無一失者。當是時。西園公已老而尚健。人曰。天之所以報君父子也。君初為諸生。我先公以元日訪西園公。聞君讀書聲。歸謂廷敬曰。張氏子元日猶讀書耶。予聞而自傲焉。西園公教君嚴。至不令苟一步趨。安一語言。西園公生君一子。君生亦一子。曰之麒。庚午科舉人。君歿之麒走二千里。銘於余。余不得辭。且曰。子世家。自子祖父及子。皆好學問。力行仁義。其後必昌乎。是皆可銘也。君生於前明崇正元年十月二十日。終於大清康熙四十五年四月三十日。得年七十有九。君母於孺人。君娶王孺人。生之麒。女五人。一適江西建昌府知府王君嘉植。一適甲戌科進士內閣中書田君沅。餘皆嫁為士人妻。孺人生於天啟七年二

月二十九日。終於康熙四十四年八月二十九日。年八十。以某年某月某甲子。合葬君孺人於某山之原。之麒女七人。以族兄之子國梁為子。之麒既別矣。予為君銘。未發。扈從河上濟甯道中。聞之。麒舉子。名曰某。予謂後其必昌者。以理斷其必然。而事固已可驗。已銘曰。

猗嗟觀士為吏可哀。天之生嘉穀。伍蒿萊。推較其本根。穀美哉。我友行谷君。今若此。往事猶增傷。來誓止。命不稱君才。時有以。銅鼓之深巖。君所廬。蕉黃荔子丹。襟有疏。君遠遊歸來。眇愁予。太行之谷人。堯風古。飲沁水。清流耕瘠土。剪紙招君魂。與君語。公侯必復始。昔有云。君之孤兒賢。且學文。千秋及百世。繩繩繼。我華其銘者。信勿替。

荆南墨農全集序

熊賜履

予齊年友徐子竹逸。自戊戌聚首長安。一別且三十載矣。今年秋。命其子某謁余于石城。而以所著墨農全集見示。予讀而序之曰。嗚呼。徐子殆庶幾乎有道之士矣。古之有道者。流性定于內。而心境湛如。舉凡可欣可戚之事。一順以應之而已。無與蓋其所自得者甚深。即外物莫得而櫻之也。苟非其人。胸懷齷齪。匙所測知。不幸坎壈當前。則呻吟呼號。不勝其鬱鬱無聊之感。此匪獨為性地之偏。亦足以見自待之特薄也。又其甚焉者。本無牢騷不平之氣。而名場偶激。則取古人之所以歷艱經險。太息咨嗟者。一一摹倣而蹈襲之。乃至構為詞章。互相標置。以取譁于當世。此又與于浮薄之尤者矣。且夫境遇亦何常之有。可欣而欣。可戚而戚。為歌為泣。各率其固然而已。張皇矯激。胡為乎。如離騷天問。窈墨幽懷。可謂怨矣。而美人香草。與洞庭木葉之文。又何其婉而多風耶。至于陶靖節嘯傲東籬。飄飄霞舉。昔賢稱其詩平夷冲澹。出于自然。由斯以觀。古人之所以處窮通得喪之故者。良有道矣。徐子生平之境遇。予固未得而悉之也。然即其一度絕儼。萬里孤征。日與旄旆為伍。迨解組歸來。高堂風燭。四壁愴涼。并極人世所難堪之境。徐子則淡然泰然。優游自適。若絕不知生平役役于艱難辛苦之為者。晚年時花種竹。以咏以觴。胸中自得之趣。時時于詩筒酒

屐中寓之。故其為文宕而逸。澄粹而春容。庶幾乎和平大雅之遺。而略無所為。張皇矯激之態。以為之累。嗚呼。若徐子者。其可不謂之有道之士乎哉。予也賦性下急。孤憤填胸。比來深自創悔。而躁氣時乘。即制之未盡。讀徐子之書。則又為增一愧矣。徐子其亦以有疑我乎。是為序。

默默軒記

予愚齋之右偏。有小亭一區。形如笠。大如蓋。頽然叢篁亂樹中。前有石山如拳。雙柏夾立。高可數丈。儼若崇牙。週圍敞豁無蔽。得月最早。予每獨坐其中。輒竟日不出一語。因而名之曰默默軒。嗚呼。默之時義大矣哉。夫默識深通者也。默修實踐者也。此自大賢以上事。予蓋有志焉。而未之逮也。若夫緘默以取容。雖亦君子明哲保身之道。而世之奸人鄙夫。則往往以之設坎阱。伏機械。陰試其毒。予不見不聞之間。以為害于當世。此則聖賢之所必誅。而吾黨之所首戒者也。嗚呼。默之時義大矣哉。或曰。吾子之在朝論治。諄諄如也。在野論學。侃侃如也。嘗聞其好辨矣。未聞其尚默也。今則潛焉。遂焉。幽元沉闕。與斯人相喻。千行生於穆之天。殆所謂默而成之者非耶。抑或有所大不得已焉者存乎其中。而姑為是隱忍以待之。若子瞻之諷君。實有所為。年來學啗啜之說者。即曰。予庸淺人也。而昌克為此。或曰。噫嘻。我知之矣。獨不見夫

所謂憂離者乎。其九章曰。胸兮沓沓。能靜而幽默。其卜居曰。吁嗟默默兮。誰知余之
廉貞。意吾子其殆有取于斯也。與。予曰。唯唯否否。既乃漫應之曰。將無然。

張伯明先生殉難紀畧

先生諱國勳。字伯明。黃之西陵人也。弱冠即以學行知名。下筆數千言立就。個儻有
大略。不屑屑舉子業。薦紳名公卿。不憚折行輩事之。資剛毅。嚙笑無所假語。及天下
事輒慷慨義形於色。無賢愚耆孺咸知欽畏。士夫之下車至止者。未嘗不式其廬焉。
明崇禎六年。以明經授蒲陽儒學博士。蒲陽士風素號佻達。不推飭。先生至。則痛裁
抑之一繩。以禮法俾秩然軌于正。士習為之一變。時流寇猖獗。屠戮中原。靡才遺。蒲
陽鄰豫境。適當衝突。三載間。薄城下者五六。先生同邑令張公紹登百計守禦。城賴
以全。先生因詣鄆郡。上平寇三策。當事莫能用。蓋時事已大可知矣。九年冬。賊以數
萬騎突江北。復圍蒲陽。賊固知其舊難下也。指城上呼曰。多與金帛及諸貝物。即當
解去。眾議事且急。與和便。先生正色曰。賊有求而我與之。是賄賊也。與之而去。且喪
我威。況與之而未必去。而復求其何以饜其欲。不如堅守以待救。遂與令弁某等率
眾登陴。晝夜死守。兩月餘。城中糧盡。至羅鼠穀為食。使使告急。鄆無一赴援者。勢窮
城陷。或謂先生曰。公師也可以無死。盡去諸。或為先生危曰。賊側目公甚。是未可櫻。

其鋒不如縋城匿他所。先生毅然不顧。反署肅衣冠北面再拜曰。臣力竭矣。復詣大成殿謁先師。賊眾擁洋池。舉火焚殿。先生抱先師本主大哭。賊執先生曰。若非守城張教官乎。先生曰。死即死耳。奚問為。指賊大罵。賊怒。剗右手燃其指。先生罵益急。賊益怒。遂支解投之烈燭。次子世補并家屬十二口俱死之。時崇禎九年十二月初四日也。長子世祐自西陵聞變。奮劍走蒲陽。求遺骸于骨山。血壘青燐碧燼中。亂草疊骸。莫之可辨。行路哀之。世祐遂截指血書告城隍神。徒步北上伏闕下。以先生殉難狀聞。會楚撫軍及直指使合詞上其事。敕贈先生國子監學正。祠於鄉。歲時致祀。世廢一子儒學生。奉祠事如例。嗚呼。先生一寒羶耳。非有綰符民社之責也。而城亡與亡。至肝腦塗地。不顧可不謂烈與。夫子臣弟友。生人常道耳。不幸而變難。是值則死其所事。捐糜無悔。分義應然。烏足為異。自世衰道微。倫紀掃地。彼夫朝仇敵。暮君臣。彈冠結綬。相率下逆。闕之拜。而頽然柳柳。葵露東門外者。血肉固猶未冷也。從來仗義死節。率皆沈淪淹蹇。廢斥疎賤。君王不識面。孔不知姓名之人。而所謂青年華袂。白首崇階。朝廷所心膂而股肱之者。固其開門納款。上殿勸進。而奔走伏謁之恐後者也。甚或平時標榜名節。殺自附於當世賢豪君子者之流。一旦屈膝亂賊。稽顙僞行。同狗彘。醜不知羞。方櫻取高官厚祿。以驕妻妾。誇鄉里。流俗狙于聞見。亦遂習而

安焉則反若前日激烈赴死殺身成仁者為驚世駭俗希奇未曾有之事而為之縮
頸吐舌噴噴焉異之世道至此可謂寒心矣先生惟求其理之是心之安而且與日
月爭光矣嗚呼是豈先生意哉先生徂矣三十餘年英靈如在蒲陽廟食尸祝不衰
即向之所謂北面寇仇喪心寡廉恥者亦或凜然於當年之義氣而咨嗟歎息不能
已此可見天理之在人心有終難滅沒者然使其或遇先生之遇而仍不能為先生
之為則以幾希之偶露乍見者恒汨於其所習而奪於其所便也使因其見端而務
為擴充之則暴虎馮龍比何人不可以為而謂有今古之異乎正無事歎先生為不可
及也嗚呼斧斤削伐牛羊芻牧之餘日戕月剝萌蘖幾何綱常名教未知飄泊何所
聞先生之風其亦可以興矣世祐字公望下帷數十年蔚然名宿今復銳志絕學與
余為切劘友以彈先生未竟之緒先生有子矣況我國家表忠旌節幽隱不遺前代
諸臣闡揚略盡近且開局蘭臺叢集文獻為龍門涑水全書貞烈如先生自當與東
林諸子并千古亦無俟鄙言之贅矣先生有靈尚鑒之哉

趙奢論

毛際可

趙奢與秦戰。下令軍中曰。敢以軍事諫者死。軍候有一人言急救武安者。立斬之。其後軍士許厯請以軍事諫曰。秦軍氣盛。當厚集其陣以待之。又曰。先據北山者勝。卒因其言以有功。封許厯為國尉。余曰。拒諫大惡也。國家以此備事。况決機兩陣之間乎。古良將之受諫而克敵者。不可悉數。即宋襄成安君之屬。不用善言以致敗。千古為之惋惜。然猶未嘗咸以斧鑕如奢之甚者也。夫陣之當集。與北山之當據。奢苟能早知之。不必待許厯之言而始從之也。如必待許厯之言。使厯自愛其死。鑒于覆轍。緘口而不言。則秦趙之勝負。尚可必歟。後之論史者曰。奢恐進諫之人。語泄而聞於敵。余曰。否。否。善馭眾者。當使若腹心臂指之相親。而又申明漏言之禁。如秦使白起代王齮將。其事大于一夫之進諫遠矣。未聞趙人之知之也。乃鈴閣深嚴之地。使人不敢一進秘謀。而虞敵人之我伺。然則為將之道。必獨斷而始有濟耶。又有為奢解者。以為軍候之策誠疎。而許厯之言適當。夫成敗之計。此事之不可以一槩定者。不知軍政之大。信賞與必罰而已。今以軍事諫一也。而斬與封互異。則三軍之眾。惶惑莫知所適從。吾恐奢此後亦將無以令其下。又何必論其言之當與不當哉。昔吳起為將。有不待命而斬級以還者。卒斬之。以為違令者雖有功必誅。審若是。許厯亦

可斬也。然而許厯必不可斬也。則甚矣下令之誤也。後其子括敗於長平。死者四十餘萬。從無一人預言其失策。意括徒讀父書。或亦襲其遺令。而當時無一敢言如許厯者。此所以一蹶而不可救也歟。

泊庵說

余友夏子樂只。卜宅於葛嶺之東。而自名其居曰泊庵。或曰。夏子所居。枕湖之濱。望之汎汎然。與鷗鳬相上下。類乎偃帆停檝。而休息乎平沙淺瀨之傍者。名之以泊也。固宜。余曰。泊之義大矣哉。今夫舟行者。屈指戒途。過都越國。雖曠日持久。而其心恬然安之。一旦阻淺河渠。守風洲渚。以及積雨之所濡濕。嚴寒堅冰之所凝涸。則焦勞拂抑。儼然若不可以終日。蓋人情之不樂於泊也甚矣。然當其凌彭蠡。涉洞庭。下巫峽。浮呂梁。問津錢塘。身試不測之險。濤驚浪駭。檣楫傾缺。長年三老。束手相向。迴望有偃帆停檝。休息乎平沙淺瀨之傍者。慕之渺然如在天。上然而已。無及矣。夏子負不羈之才。曠然高寄。閒賦小詞。徧紀湖山諸勝。興至則仿大癡倪迂數幅。以寫胸中滄遠浩落之致。偶有以榮利相勉者。夏子則高詠如此風波。不可行之句。以自傲。蓋幾幾乎邀世無悶者。與。豈止以此名其居也哉。或曰。昔之高流逸士。有為浮家泛宅。往來苕霅間者。美必其泊之足云。余曰。昔之人不可以身試不測之險。而止往來於苕

雲間其亦猶是泊之義也夫。

雲間燕集序

余總角時已聞雲間有夏樂仲陳臥子杜素浣徐闇公諸先生以文章風節相引重編紵羔雉之盛甲於海內及壯于役四方欲遊而中輟者屢矣今年秋偶以便道相過寄寓同年張梅庵之北園風味古澹多亭池竹樹之勝不知在閩閩間也已而同人折節下交斗酒相勞淹留旬日每漏深燭跋輒拈毫分韻自五七言古以及近體詩餘諸作損成卷軸命余為序余謂宴集之餘倡予和汝昉于春秋大夫賦詩言志然不過約畧斷章未嘗專有所撰述可以壽金石而被管弦也嗣是如南皮之會金谷蘭亭之遊清思麗句泉湧雲蒸至今文彩照耀赫赫若前日事何其盛也夫士君子聚散離合之間盱衡時事者往往三致意焉余二十年前薄遊茂苑名流稅駕傾動一時壇坫為之改色其後世途多故士風不無摧折余屢過其地故交零落幾有邈若河漢之感况遐陬僻壤冠蓋輪蹄所不至者乎而雲間一郡乃猶舉行勝事風雅流連是固山川靈異之所萃而亦當事君子之所擁衛而嘘植之也獨是在座耆舊華髮蒼顏為余言覩記所及今尚不及曩時之一二有歎歔泣下者余亦為之中席而思臨文而歎憾不能躬逢其盛而與之揖讓獻酬於其間也雖然運會與時為

升降。今

天子者定告成。右文興學。以賓興俊良為重事。而後來之秀。又復振振未艾。如此余齒甫逾半百行。且芒鞋竹杖。復攬勝于三泖九峯。聲氣未隔。舊盟可尋。篇什之富。當有更倍于今日者。姑書之簡端以俟。

歲寒堂文集序

西陵為人文淵。數詩才佳。鹿雲蒸霞蔚。其以古文詞名家者。則指不多屈。康熙癸亥。余自大梁南歸。林子鹿庵方以文章顯名當世。乞言者屢恒滿。余意其人必少年英銳。閉戶著書。故一出而不可禦。及相見。髮瑳瑳白矣。問其齒。長余隨肩以上。吁。嗟乎。鹿庵何其深藏後出若是也。大抵有志于古之業者。必不輕見其能。如蘇明允學成數十年。尚浮沉閭巷。及其名動京師。年已遲暮。豈嘗汲汲于聲援結納哉。鹿庵為文高超淡潔。亦復離奇變幻。不名一體。昔李文饒謂靈氣恍忽而來。庶幾得其髣髴。至其記載諸文。則舉其人之寢興語默嗜好憂思。與夫胸中鬱結不可告語之故。皆于行間紙上遇之。班馬而後。不易邁也。鹿庵門下生。曾梓其歲寒堂文集問世。比者以書遺余。又謂閱余松皋集而益生愧悔。更刪定諸作。名曰存稿。夫余才分謏陋。曾不能望鹿庵之項背。而謬舉之以自厲。其精進若此。然則余之垂老而無成者。何足怪。

哉。鹿庵家貧。一椽容膝。然床頭嘗貯斗酒。客有以撰著通刺者。輒笑曰。君等汲汲求名者也。使海內盡知我不足榮。無一人知我不為辱。我自與我周旋。科頭送客。語之曰。故衣方質酒家。尚遲報謁耳。當其酒酣耳熱。落筆頃刻數千言。此與張長史大醉以墨濡髮作書時何異。而世之拘拘于模擬步趨以為文者。宜乎其二十九日醒也。

孫宇台文集序

余友孫宇台。隱君子也。居恒以著述稱名。家吳越數千里。求文者。戶外之屨恒滿。或曰。身將隱矣。焉用文為。孫子殆未忘夫文之見哉。余曰。否。否。曩西陵有十子焉。皆以鴻才碩學。住復馳騁。謂勳名可立致。數十年來。落落各行其志。鹿京雞髮為浮圖。祖望浮沈于羽士。際叔處里中教授生徒。而虎臣去矜坎壈。惓惓以至於歿。孫子獨放浪山澤。越江淮窮閭。越遊覽所至。卷軸益多。余避地會城。將有西陵文選之役。同人競以新篇相投。舊鐙披誦。意每服膺孫子。夫孫子文如商周彝鼎。剝蝕之餘。光怪益露。又若習戰昆明池。旌旗舳艫。頃刻萬變。彼以一體求之者。皆不足以盡孫子者也。今年元夕。余與飲楊輿百水樓。時漏下數十刻矣。醉後談笑譁譁。不異少壯。遂計數十年以前。其意氣豪上。必什倍于今時。乃絕世離羣。如脫敝屣。斯豈無所得於中而能然耶。古來肥遯不返之士。若披衣巢父輩。并匿其姓氏不傳。至於淵明和靖諸君。皆

丈米風流照耀後世。然則士固辨其真隱與否耳。如謂隱者必期無文。則世每有沈酣聲華利達之場者。彼固未嘗一親翰墨。即安見巖穴之子。吟弄墳籍。抒寫性靈。遂足病其為處也哉。

峽源瀑布記

峽源之勝。往來於寤寐者十餘年。如聞人說江瑤柱。雖復津津齒頰。終不若一染指之為快也。庚子秋。偶遊古明。遂與詹子易諸子訂峽源遊。旅行陂陲榛莽中。約十步一息道左。聞泉聲出石齒間。輒藉草烹茗啜之。十餘里至峯頂。下瞰有廬井翼然者。是峽源古村落也。山四圍陡絕。中間阡陌條暢。曼衍如掌。幾不知此身在萬山中。因思古桃源避秦事。或大率類此。而惟隱見滅沒於彭澤右丞心脫間。遂疑靈境之難聞見耳。薄午。小憩村舍。示易以疲劇不能從。以為茲水固吾籟壁間物。可以付之臥遊。而予則足為心目所迫。不暇問其履之折與否也。復鼓餘勇行斷澗中。又數十盤而瀑布已在目矣。蓋峽源之水。蜿蜒百折。而萃於此巖。巖復束之以石。若瞿唐之有灩澦。凡石之趾多外拓。而茲石則斬然內斂。故水獨能空懸數百尺。如瀉簷溜於階砌間。下復承之以巨石。跳沫濺珠。不可名狀。予坐卧其下。見奔者如雷。隊者如石。翔者如鶴。立者如鶩。隨風者如雲散。如嵐合。如煙之縷縷而上浮。若日光映射。則有

素若練者。燥若錦者。五色陸離。若虹霓之飲於澗者。其靈奇浩瀚之致。頃刻萬狀。不暇應接。已而暝色四合。僕夫戒途。遂歸。乃土人以為瀑之觀。盛於夏。而茲遊在秋冬之際。為不逮向時遠甚。予笑謂之曰。昔人論瀑布云。夏瀑如怒。冬瀑如喜。然予則謂觀瀑布者。如目接暗鳴叱咤之人。雖當天語。煦煦而精悍之色。自射人眉宇。終不減從壁上觀時也。同遊者以為知言。

蔡忠烈公廟碑

余道過長沙。閩中鄭子璣踵門請曰。吾鄉江門蔡公。明季嘗為郡司李。值張獻忠之變。城陷不屈死。士民立廟。屢置祠左。更置祭田。以供裡祀。其墓道封樹秩然。野牧有禁。暨吳逆構亂。僧徒路為已有。祀田貿之豪有力者。并湮沒其墓。歷有年所。吾鄉之有事於此方者。鳩衆効力。重葺廟貌。俎豆一新。而墓之越在榛莽者。終匿不以告。乃籲請于署善化令。按蹟以攷得之城南醴陵坡。斷碣尚存。復上其事於丁中丞公。中丞公令所司修墓樹碑。以禮致奠。而憲副趙公更為勒石廟側。更求大君子一言以垂不朽。遂不敢以不文辭。公諱道憲。字元白。江門其號也。閩之泉州晉江人。年十七舉于鄉。登崇禎丁丑進士。筮仕雲南。推官外艱歸里。服闋補授長沙。潔已奉公。以申雪冤獄為己任。歲壬午。賊破荊州。惠藩擁眾走長沙。明年復臨武昌。羈臣某以衛卒干

人繼至。又八月襲岳州。總戎某亦棄城來奔。未幾皆望風他竄。壁壘一空。公不得已。褰騎帥尹先民者。勉與共事。巡城。督殺賊無算。已而尹帥師潰出降。賊蟻附入城。公危坐案署。賊重公才望。百計欺誘。不為少屈。遂以刃加頸曰。公忠臣。能一笑而瞑乎。公揚眉振足笑語如平時。復厲聲曰。天朝何負若輩。不釋甲歸命。將無噍類矣。賊怒斷公足。公以手麾之。復斷公手。繼以寸磔。公且號且罵。聲聞數百步。死事之慘。未有如公者也。事聞。贈太僕寺少卿。諡忠烈。嗚呼。臨難捐軀。為人臣極則。而有出於一時之慷慨者。若公則以死自處。非一日也。長沙為蜀漢滇黔之障。用兵者所必爭。然惠藩以宗室屏垣之重。而某某皆號為封疆大吏。使與公相為犄角。致死弗去。猶可為士庶之倡。乃冀延旦夕之命。竄迹不遑。而公以書生末吏。獨置生死于度外。豈待啖血罵賊之後。而始以金卽予公哉。又有幹役凌國俊等九人。始終從公不去。賊欲其勸公以降。國俊曰。使我公而屈節。吾去不俟今日矣。賊以刀脅之。復笑曰。使吾畏死。亦去不俟今日矣。卒以衣裘屍哭奠畢。皆同殉公而死。自非公之忠烈。素見信于人。區區賤隸。亦何感發而激切若是乎。彼人臣而懷二心者。毋論為公之罪人。即以視國俊輩。其賢不肖為何如也。余向作今大梁父老母為言。當巨寇圍汴。固守數年。矢集闕逆之目。其勳績為明季十餘年之冠。城潰後。嬰城以守者。皆幸乘舟北渡得免。

然至今日。已有不能舉其姓氏者。而公赫赫與常山睢陽比烈。則公之一死。為有明宗社之不幸。豈遽為公之不幸也哉。銘曰。

公起閩海。早捷南宮。星沙司獄。國室為空。生也不辰。運遘陽九。伏莽鳴張。荆襄失守。飛渡洞庭。既潰岳師。古稱天險。與寇共之。六軍宵奔。過無留者。公以一本。欲支大厦。孤忠不屈。乃攢千肌。清揚婉笑。其甘如飴。甯殲吾軀。民不可戮。臨絕之音。百身莫贖。有廟翼翼。作配靈均。左徒魚腹。精爽為隣。伐石作碑。樹之墓門。銘詞徵實。用慰忠魂。匪徒慰忠。亦以風世。瞻拜其下。讀之隕涕。

汪總制公逸事狀

憶總角時。聞先府君語曰。吾邑先達。始終不名一錢者。吾祖銓部公及歲星汪公耳。後數歲。汪公殉寇難。喪過里中。先府君與諸姻黨道祭。哭皆失聲。余雖幼。亦旁立助哀。公名喬年。字歲星。明天啟壬戌科進士。官刑部。出守青州。陞登萊道。視學秦中。歷任三邊總制。寇陷襄城。死之。公仕宦不攜家室。諫決告令。錢穀鉤會。暨督學試生儒。皆身任校閱。無入幕賓。一子早夭。故其遺事罕有能紀述者。父執余國枹。曩以計偕。過山東。有執鞭卒。訊邑里。輒訝曰。君里有汪公者。其嗣子遺疾。吾青人士登泰山祈禳者以千計。今無恙乎。曰死矣。卒撫膺泣下。迨余李鄆郡。與青州黃綬為同官。問之。

則曰。吾少未習公。然吾鄉人至今稱汪夫子。里謠有汪不解擔之語。以其聽斷明決。不俟信宿弛擔也。余繼政令陝右。其故老為余言。公視學時。以儉率諸生。章服盡布。素校士必焚香告天。誓無所私。故拔置盡一時寒士。後井姓者繼公。時人為之謠曰。有學莫忙須待汪。有錢莫省須待井。迄今兒童猶傳誦之。又曰。公久厯外任。即津要歲時無所餽遺。有以竿牘至者。皆峻拒不少徇。羣小欲中以法。然以其名高不果。值流寇潰決。西事已不可為。公時撫秦。遂以邊才陟公總制。名為尊顯。實假手于寇。以快其忿。又余間從先府君登黃州赤壁。有八十老翁。舊為公部曲者。曰。公任總制未數月。赴援河南。師次襄城。刃既接。大帥賈人龍等久蓄異志。皆潰去。公孤軍城守。賊圍環匝。號數十萬。百道攻城。公登埤坐矢石間。隨機以應。殺賊數千人。賊憤甚。左右泣諫曰。眾寡不敵。公益自為計。公怒奮拳折其一齒。無何城陷。猶手刃三賊。被執。公罵不絕口。賊割其耳鼻磔死而去。襄人建忠烈祠以祀。近常州進士陳玉琪以文章名。嘗記李容父可從同公遇難事。與其言頗符云。嗚呼。當世所稱家乘墓義。為子若孫揚其祖父者。事多溢美失實。今公死三十餘年。遺行罕所紀述。而余所習聞。則多得之於老儒退校及行道素不謀面之人。可以知公之大畧矣。公有女。余族祖母行也。以疏屬未嘗見。頃同避地錢塘。始詳訊之。則亦不能具述。曰。公有才武。膂力絕人。

念四方多故。嘗休沐居里。輒馳騎習弓刀擊刺。夜豪露以宿。不敢稍自暇佚。又聞奉旨難喪歸葬。數遇寇掠。從吏謂曰。此死事。康吏汪公柩也。若輩欲尸祝之。則請留。不然。橐中無物可掠也。寇愕然。羅拜去。嗚呼。公死而清節重。為賊之所景慕如此。公故諳邊事。習勤苦。且兵單援絕。尚能與城殺賊。向非猝任於此。不可為之時。遲以歲月。其雄畧必有可觀。乃忽忽不得一展。僅以身殉。為可哀也。夫御史新安呂兆琳。與余為昆弟交。尊人忠節公。與公死事相後。先生平嚴氣正性。亦大率相等。丙辰夏。余書忠節傳後。因類及公。兆琳訝所未聞。深為歎慨。余退而悲公之志行。未載正史。當世賢士大夫。猶未能盡知也。因雜記其所聞者如此。

桂巖集序

張貞生

予同年度遠江子。以名進士來宰於越。凡五年。與民休息。賦清訟簡。集噉麀酒。陋規悉除。謂邑故理學名區。視事之餘。更按前賢語錄。率諸生講明。時有啟發。一月兩課。士習歸醇。戶祝菴歌。報最上考。予跡之。意其必瘁簿書勞案牘者。一日偶叩公署。則繩牀竹几。僕從數人。清風滿座。官舍蕭如。案頭有鈔本數帙。閱之。則其先四世祖秉心公所彙桂巖集。而欲重付之梓者。集中所載。俱江氏先世科名。并所受上賜詩。及行實遺文。名公翰墨。凡十二卷。而其發源之長。流慶之遠。則實自漢臣沈籍一事始。而後來論者。稱江姓登進士第。與由他科顯達者。自宋以來。至四百餘人。遂以漢臣之沈籍減稅。為陰德。昌後積善餘慶之報。予讀而三歎。謂執此以語漢臣之食報。則然而要豈漢臣當年沈籍之初心哉。當吳越王錢俶臣宋之日。獨命漢臣奉賦稅圖籍以獻。時從王歸者。俱得顯官。漢臣僅一鎮海軍節度判官耳。使稍萌富貴之心。則奉版圖來歸。宋必首以為功。何難坐致尊顯。陰及後裔。而漢臣不此之計。但謂吳越久厚歛於民。倘宋仍按籍徵民。民何以堪。遂沈籍於河。赴汴自効。幾置重辟。嗟乎。推漢臣之心。此時惟知備一死以救浙民。不知有身。遂計祿位。又逞計後之人能食報。

無已耶。其後漢臣以發斥身死。宋命王永住均田稅卒。因舊籍無徵。獲更錢氏稅五斗。定為一斗。全浙百姓。世世賴之。即宋祚南遷。亦獲席寬稅休息之餘。藉以偏安百數十年。則漢臣沈籍。不特有裨浙民。且有功宋室。而終宋之代。卒無一推原其功而載諸史者。使不得元史張子長書始末以傳。則漢臣當年一段心血。直與草木同腐。豈不悲哉。雖然。吾人夫念誠欲造福生民。惟無瞻回顧慮之心。斯可直行其意。務底有成。董子曰。正其誼。不謀其利。明其道。不計其功。凡濟世救人。惟從不忍一念擴之。使充已飢已溺萬物一體。推其心之所至。可以不愛頂踵。可以不計得失。又有身後之名。與身後之子孫。今

聖明莅宇。視民如傷。軫念災荒。屢詔蠲免。無如下之奉行。者非病邪移。則應掣肘。孰有一重念斯民痼瘼切身。拯諸水火。不知其他者。而於越父母。獨能愛民剔弊。起諸瘡痍。德意下逮。撫字心長。且於鳴琴之暇。留心家乘。舉先世陰德懿行。置之案頭。以當座右銘。而更欲重付之梓。以廣流傳。噫。一夫不獲。時予之辜。吾知其志固有在矣。

國學生退庵方公墓誌銘

退庵方公。自庚午送女熊宜人北過淮而逝。去今二十有七年矣。公季子廣裕始述狀泣而請銘。人子於親生。無以養。及奄然長逝。始則猶憶音容。久則并忘風木。至於終歲不一禮先塋者。公嗣君獨於骨枯代革之後。譜其遺行。而徵不朽之言。予是以

既篤公之高致。尤感公有孝子。而志公生平。公諱日愈。字仲學。別號退菴。先是由山左之汶上。家於饒。數世再家於南州。科名鼎盛。世稱新建方氏。大父吾源公。登嘉靖乙卯歲薦第一。二子虛谷公。麓田公。同舉於鄉。父子兄弟出一榜。人奇之。丙辰。吾源公授順天學博。虛谷公成進士。授無為州州牧。性剛方。嫉邪。及遷比部郎。以議方士獄。執法忤旨。拂衣歸。舉二子。長若谷。官鴻臚。最晚得公。及比部公捐館。若谷公秉家因與公各母有間言。族屬更因為利。時有以貲產計者。公厲辭却之。謂吾先大夫正色立朝。安用此捐清白為膏腴之澤。玩好之珍。槩未嘗一寓目。持簿籌畫。若谷公櫬歸。公飲泣撫二孤。若己子。恩勤訓誨。不遺餘力。終身未嘗一齒及前事。鄉人有修閭牆者。皆聞而愧悔。其友恭感人如此。公性情樂易。雅好賓朋游從。衣被寒暖。食客常滿。毫無德色。然一躋通顯。半刺不通。雖中路家漸落。一無所干。人以是益服其高。公美髯豐頤。善臨池。酣咏脫然。不汲汲競榮名。止一隸大學。遂甘恬退。因更自號退庵。云。噫。公之高躋。予不及見。而獲交其季子。淹通能文。與人接。尤恂恂善下。及領鄉薦。教授塗邑。邑人士宗之。俱先德行。後文藝。今且於公即世年遠之餘。持狀跪銘。擗踊動地。使予不孝抱終天慟者。不知涕泗何從。嗚呼。觀公之子。可以知公。可以風世矣。銘曰。

菜根不餒。敗絮不寒。難人所易。易人所難。有客至止。如坐芝蘭。客自通顯。爾自考槃。
雲卿學圃久而嶺岼。

送王都御史撫楚序

曾王孫

昔杜祁公知乾州。未滿歲。權知鳳翔府。二邦之民爭於境上。一曰。此我公也。汝奪之。一曰。今我公也。汝何有焉。間嘗讀史至此。蓋未嘗不歎鳳翔之幸。而乾州之不幸也。向非祁公之德。有以入人者深。而信於人者久。烏能令所過者不忍其去。而將至者樂其為我有如此哉。自宋迄今。六七百年。祁公之後。未聞有相爭如乾鳳之民者。豈在位者皆賢。不祁公若耶。抑天下之民。有以異於乾鳳也。無乃史氏之溢其辭。而不必有其事耶。迨觀我王公。而知古今有相及也。公由郎官。不次擢為江漢。受聖天子特達之知。益自奮。期於上不負

君。下不負民。自不負所學。自十七年秋。臨蒞斯土。當是時。郡縣大半新經恢復。落落殘黎。皆湯火餘生。扶瘡痍。服南畝。以供賦稅。而四郊伏莽。猶有存者。前此用兵之際。上下姑息。官吏無復廉隅。不肖者有以自存。而賢者無以自見。民生吏治。均不可問。公至。首絕餽遺。以為標準。務休息民生。登之衽席。而猶總總以澄清吏治為己任。數月之間。民有起色。吏知自好。縱有踰轍。不敢恣肆矣。期年而流移盡歸。荒蕪盡闢。寮屬皆爭自濯磨。穎脫末見。住住而有挽頽俗而起波靡。如響之應聲。影之隨形。徒異其化行事舉之神且速。而不知公晝夜圖維。如蠲通郵。災與夫激濁揚清之苦心積

慮所以怙斯民而飭官方者。為深且遠也。於是政成而

天子嘉之。今年夏四月。晉公副都御史。巡撫楚疆。蓋自戊午秋至庚申夏。未滿二歲也。公仁義忠孝。根乎天性。而應務接物。一本至誠。至愛民之心。人皆知之。聞命之後。江右之人。莫不曰。公我父母也。非父何怙。非母何恃。江右之不恤而惠楚。非楚之懟而誰懟。楚與江右。境相接也。楚之人曰。公治江右。江右既已治矣。天無私覆。豈惟江右。江右之民。知公之不可留也。千里而遙。百里而近。山椒水末。窮鄉僻壤。莫不踰越險阻。親冒波濤。扶老携幼。躋公堂而獻朋酒。咨嗟涕洟。以致其攀轅卧轍之誠。蓋無虛日。公雖止之而不能禁也。夫士君子道修於身。發而見之事業。爵祿之榮。若固有之。所難得者民心耳。今江右之民心繫屬於公如此。噫。可以觀公矣。公之德有以入人者深。而信於人者久。一如祁公。故能使江楚之民。一如乾鳳之民。而民顧有幸有不幸。公其何以兩利而並全之耶。春言節鉞行有日矣。某備員下吏。受知最深。竊嘗奉教而得其用心之所存。故不敢以世俗之所以榮公者為公榮。而道其得於民者以為公賀。且以風世之君子。使有所興起焉。

讀惠民錄書後

澤州封吏部尚書陳太公。值州無年。盡出其家世所藏穀。以興鄉人。鄉人謀建祠祝。

之事已上巡撫。達禮部。太公聞之。固讓乃已。於是鄉人樹碑衢陌。以頌其德。而四方名公鉅卿。聞風向慕。競為詩文。以反覆詠歎之。成捐粟惠民錄若干卷。其得而讀之。喟然興嘆曰。美矣哉當。

聖天子憂民沛澤之時。而有敦鄰賑里之舉。不責其償。并不居其名。此千百年來所絕無而僅有者也。誠足以為天下保任其鄉者倡矣。而未足以盡太公也。太公當明季寇亂之時。築樓以衛其鄉。寇攻之。至縋樓請救。縋絕而墜。已死復甦。又當國初叛將之亂。以甘言脅公。公怒。手裂其書。罵不絕。賊使者吐舌抱頭去。是其於興亡順逆之際。見之最明。守之最堅。至生死存亡。不可奪。而豈僅僅好行其德。不伐其功。若史遷之所謂游俠者乎。昔楚令尹之毀冢。鄭之罕宋之樂之餽貸。左史稱之。漢田疇之保塞。魏志傳焉。然三子皆執國柄。民同其休戚。而太公不在其位。田疇因民心之思漢。馮恃險阻。足以自守。而太公當明季。民心潰散。所在倡降。又國家定鼎之初。山澤之民。往往畏顧首鼠。而太公獨堅持一節。以免民於不義。跡其所為。較乎與日月爭光。巍乎與泰華並峙。使之得居位行志。撫養斯民。干城宗社。不為挽之不來麾之不去之汲長孺。即為成敗利鈍。非所逆料之諸葛武侯。而豈惠民一德之所能盡乎。雖然。好施博濟。仁者之事也。又聞太公於易簣之月。盡出家所有資。易米以賑鄰里。

夫一息尚存。惟仁是務。所謂中心安仁。天下一人者非耶。宜乎有大司寇公者出而柱石。皇家霖雨蒼生。以嗣其志於無疆也哉。某忝附大司寇公譜末。又嘗爲屬吏。并悉晉人口碑。其詳因論次所聞書於後。以備錄所未載云。

海豐縣知縣杜公墓誌銘

公諱允中。字仲用。姓杜氏。河南閩鄉人也。其先爲河東洪洞人。遷閩鄉凡八世矣。杜氏世以經明行修重里閭。雖仕首宿耳。未有顯達者。公仰承先志。益自奮勉。於書無所不讀。爲文雅健肆而益醇。早歲食餼黌宮。順治辛卯登賢書。戊戌成進士。辛丑除江南蕪湖令。丁內艱未仕。服除。知山東海豐縣。時值旱災。舉邑皇皇。公至。即力請緩徵蠲租。因設法賑濟。民慶更生。凡賦役皆開誠勸諭。不事鞭朴。輸將亦無敢後時者。折獄立剖。民無冤滯。除鹽弊。立社學。皆實心爲之。丙午同考。所取皆知名士。邑中有不便於民者。不避嫌怨。必再三申請。院司甚重之。時上計合省卓異。首屈指公。已列薦剡矣。適權貴人奉差道經里中。公先期以公事奉檄上省。權貴人謂爲避已也。心嫌之。語主者曰。杜公雖才。奈年邁何。主者恐拂權貴人意。遂令告致去。嗟乎。縣令爲天子治此一方。民有災卹焉。有疾苦請焉。催科以情。治獄以法。而不援焉。如公者可謂宜民之吏矣。三載勞瘁。一言去之。此治平之難觀。而有才不用者爲可惜也。公事

繼母以孝聞。與兄極盡友愛。以弟聞鄉里。推為祭酒。既歸。屏門謝客。效五柳先生晨夕以盃中物自娛樂。時年不過五十餘耳。志趣冲澹。不復有仕宦意。出入攜少陵詩一冊。酒酣朗誦。意氣淋漓。藉以自適而已。家居二十餘年。以康熙二十八年三月二十一日卒。年七十八。曾祖完。祖自慤。父炳俱不仕。公娶清河張氏。繼娶太原王氏。子男三人。楫棠俱候選。州同知椿廩生。好學能文。女四。適庠生陳厚。養鴻。繼京。王考三王輔世。孫三人。之進之過之邁。擇於三十年某月某日。葬於本縣某鄉之原。次子棠先期至京師。乞銘於予。以余知公為審也。銘曰。

藹藹其容。嶽嶽其行。或使或尼。我字我正。就豐其有。孰書其施。文彩既耀。乃蹟於時。有才未竟。胎厥後人。吾銘新宮。千載永存。